

Yanj nihánj taj xna'anj daj qui'yaj nij apóstol cune' Jesucristó man nata' se-nana so' rihaan yuvī a

Nana nihánj taj xna'anj daj ca'mii Jesucristó rihaan nij apóstol cune' so' man nata' se-nana so' rihaan yuvī gaa ataa quinan' Jesucristó xta' a

1¹⁻²Dan me se yanj ca'née 'unj rihaan so' asij rque me se rihaan yo' cachrón 'unj nana che'é nu' se vaa qui'yaj Jesucristó do', che'é nu' nana tucu'yón Jesucristó do', asij tacoo, ndaa se quinan' so' xta', qui'yaj Diose a. Dan me se asino ca'ne' so' suun rihaan nij apóstol cune' so' man nata' se-nana so' rihaan yuvī, ndaa vaa cataj Nimán Diose rihaan so', gaa ne quinan' so' xta', ne dan me se nu' nana che'é yo' me cachronj rihaan yanj ca'néj rihaan so', Teófilo. ³Dan me se gaa quisíj cavi' Jesucristó rihaan rcutze, gaa ne guun que'ee tihaan so' man so' rihaan nij apóstol yo', che'é rej guun ya rá nij so' se vaa ya cunuu i'na' uún so' a. Dan me se vij chihaa ya güii quene'en nij apóstol man so', ne ca'mii ndo'o so' ga nij apóstol che'é rej guun chij Diose rihaan chumii nihánj a. ⁴Ne gaa vaj so' ga nij

apóstol, ne cataj xna'anj so' rihaan nij so' se vaa:

—Yo'o cumán soj chuman' Jerusalén nihánj, ne se cavii soj ca'anj soj ma'. Maan se na'vij soj ca'na' se vaa cata' tu'va Réj Diose se vaa rque so' man soj, ndaa vaa cataj xna'anj ma'anj rihaan soj a. ⁵O se Juan ro', me síi cuta' ne man yuvī na uun, ne xa' soj, tzaj ne ma'an Nimán Diose catuu nimán soj rque doj güii adonj —taj Jesucristó rihaan nij apóstol cune' so' man nata' se-nana so' rihaan yuvī a.

⁶Ne dan me se cunuu chre' nij apóstol rihaan Jesucristó, ne xná'anj nij so' man Jesucristó a:

—Ne yaj me se guun chij úin ní' sij israelitá rihaan chiháan ní', qui'yáa so' na'. Cataj so' rihaan núj, Señor —taj nij so' rihaan Jesucristó a.

⁷Tzaj ne cataj Jesucristó rihaan nij so' a:

—Diose ro', me síi no xcúin cachron güii qui'yaj so' se vaa qui'yaj so' ei. Nuveé se-suun soj me suun yo' ma'. ⁸Tzaj ne asa' catúj Nimán Diose nimán soj, ne

quiri' ndo'o soj rej nucuaj, gaa ne guun soj sí nata' se-nanaj rihaan yuvii adonj. Dan me se nu' chuman' Jerusalén do', nu' estadó Judea do', ndaa chuman' Samaria do', ca'vee se ndaa chuman' gan' doj naj rihaan chumiij nihánj, tzaj ne ca'anj soj nata' soj se-nanaj adonj —taj Jesucristó rihaan nij so' a.

⁹Dan me se quisij ca'mii Jesucristó danj rihaan nij so', gaa ne ni'yaj nij so' man so', ne dan me se cavii so' xta', qui'yaj Diose, ne catúj so' rque ngaa, ne ne ca'vee quene'en nij so' man so' a ma'.

¹⁰Dan me se ni'yaj uxrá nij apóstol rej xta' rej vaj Jesucristó, tzaj ne ne ne'en nij so' daj guun, ne aj nicun' vij sí nuu yatzij catzii x'núu nij so' nanj ei. ¹¹Gaa ne cataj roj snó'o yo' a:

—Me che'é yo'o nicun' soj sij cavii estadó Galilea ni'yaj soj xta' ga. Jesucristó me se ne'en soj se vaa cavii so' quinan' so' xta', qui'yaj Diose, ne ase vaa cavii so' xta' ro', danj qui'yaj uún so' nanij so' ca'na' so' rihaan chumiij nihánj adonj —taj roj sí nuu yatzij catzii rihaan nij apóstol yo' a.

**Nana nihánj taj xna'anj daj
qui'yaj nii gaa narii nii 'o sí
nayoñ rihaan sí cu'naj Judas a**

¹²Dan me se tanáj nij apóstol quij cu'naj Quij man Chruun Olivó, ne ca'anj nij so', ne namán uún nij so' chuman' Jerusalén a. Dan me se 'o kilómetro ca'anj nij so', ¹³ne gaa catúj nij so' chuman', ne cavii nij so' xta' ve' tucua' nij so' ve' nata' a. Ne nij so' ro', me Pedró do', Juan do', Jacobo do', Andrés do', Felipe do',

Tomás do', Bartolomé do', Mateo do', Jacobo ta'ní Alfeo do', Simón sí guun tuvi' ga nij sí me rá cunú' ga gobiernó man Romá do', Judas tinúu Jacobo do' a. ¹⁴Dan me se yo'o vaa rá taran' nij so', ne yo'o achíin ni'yaj nij so' rihaan Diose a. Danj qui'yaj nij so' ga nij chana do', ga Mariá nii Jesucristó do', ga nij tinúu Jesucristó do' a.

¹⁵Ne güii dan me se canicun' Pedró tanuu nij tinuj nij so', ne ca'mii so' rihaan nij so' a. Dan me se cientó táá 'ó ico yuvii me nij yuvii cunuu chre' rej man nij so' a. ¹⁶Dan me se cataj Pedró rihaan nij so' a:

—Aj quisij ya nu' nana no rihaan danj Diose nana rqué Nimán Diose ca'mii sí cu'naj David nana a'mii che'é sí cu'naj Judas, tinuj, nocoj. Ne dan me se ya ya guun so' sí racuíj man nij sí quita'aa man Jesucristó se vaa ca'vee nari' nij so' man Jesucristó, qui'yaj Judas a. ¹⁷Ne yo'o tuvi' núj apóstol guun so', ne cata so' se-suun núj a.

¹⁸”Dan me se nica' so' sa'anj cacun' qui'yaj canaán ma'an so', ne quiri' so' 'o yo'óó, qui'yaj yo' a. Gaa ne dan me se naxru' so' rihaan yo'óó, ne canuu rque so', ne cavii xri' so' cayuu yo' rihaan yo'óó a. ¹⁹Ne nihánj me nana cachén nu' rque chuman' Jerusalén, ne che'é dan tucu'náj nij sí man Jerusalén Acéldama man yo'óó yo' a —taj Pedró rihaan nij so', ne nana Acéldama ro', me se-xna'anj nij so', ne nana yo' taj Yo'óó Ton a. Dan me se cataj uún Pedró— ²⁰'O se rihaan yanj chra' nó nana taj se vaa: “Cunuu tacañ rej cane so', ne

se cayáan a doj yuvii rej yo' ma",
taj yanj chra' yo', ne taj uún yo':
"Se-suun so' ro', nacaj yo'ó so' á", taj
uún yanj yo' a.

²¹⁻²²Che'é dan vaa che'é cata
yo'ó tinúu ní' suun ga núj se vaa
nata' so' rihaan yuvii se vaa ya
cunuu i'na' uún Jesucristó, ndaa
vaa 'yaj núj a. Tzaj ne inanj síi chéé
ga núj sij apóstol gaa vaj Jesucristó
ga núj me síi no xcuún cata suun
yo' a. Dan me se síi quene'en asij
cuta' ne Juan man Jesucristó ndaa
se cavii Jesucristó xta' qui'yaj Diose
do', me síi no xcuún guun tuvi' núj
sij apóstol adonj —taj Pedró rihaan
cunudanj nij síi cunuu chre' a.

²³Gaa ne dan me se narii nij so'
man vij snó'o, ne yo'ó so' ro', me
síi cu'naj José, ne Barsabás cu'naj
uún so', ne Justo tucu'náj nii man
so' a. Ne yo'ó so' ro', me síi cu'naj
Matías a. ²⁴Gaa ne cachíin ni'yaj
taran' nij so' rihaan Diose, cataj
nij so':

—Ne'én so' daj vaa nimán
cunudanj yuvii, Señor. Che'é dan
tihaán so' me roj tuvi' síi nihánj
narii so' ²⁵se vaa cata so' suun
nihánj ne guun so' apóstol nata'
se-nana Jesucristó rihaan yuvii a.
'O se ca'anj yanj síi cu'naj Judas,
tanáj xco so' suun nihánj, ne ca'anj
so' ndaa rej no xcuún so' ca'anj so'
a —taj nij yuvii, cachíin ni'yaj nij
yuvii rihaan Diose a.

²⁶Gaa ne tico tixaj nij so' me roj
so' qui'yaj canaán, ne síi cu'naj
Matías me síi qui'yaj canaán, ne
che'é dan guun tuvi' so' ga yo'ó
xaan nij apóstol cune' Jesucristó
man nata' se-nana so' rihaan

cunudanj nij yuvii man rihaan
chumii a.

Nana nihánj taj xna'anj se vaa
ca'na' Nimán Diose rihaan nij
síi noco' man Jesucristó a

2 Dan me se cachén cha'anj
pascuá, ne cachén yavij
chihaa chi' güii, ne quisij cha'anj
Pentecostés a. Ne güii dan me se
cunuu chre' cunudanj nij síi noco'
man Jesucristó rá 'o ve', ²ne taj
ni'yón cuno taran' nij síi ne rá ve'
se vaa nayuu rá ve', ne daj se uun
rá' unó' nana yuvaa avii rej xta'
ro', danj guun rá nij so' gaa nayuu
rá ve' a. ³Gaa ne quene'en nij so'
rasuun, ne ase vaa yaa ya'an cuxra'
ta'aj vaa rasuun quene'en nij so', ne
quitáa rasuun yo' raa 'o 'o nij so' a.
⁴Gaa ne dan me se caraa Nimán
Diose nimán taran' nij so', gaa ne
guun che'e nij so' nucuaj ca'mii nij
so' xna'ánj ino vaa, ne ndaa vaa
xna'ánj ca'veen ca'mii 'o 'o nij so'
qui'yaj Nimán Diose, danj inanj
ca'mii nij so' a.

⁵Dan me se güii dan cumán ndo'o
yuvii israelitá chuman' Jerusalén, ne
síi me ya rá canoco' man Diose me
nij yuvii israelitá yo', ne síi cavii
nu' chuman' naj rihaan chumii me
uún nij so' a. ⁶Dan me se cuno nij
yuvii israelitá yo' se vaa cuno nij síi
noco' man Jesucristó ne rá ve' yo',
ne che'é dan cunuu chre' nij yuvii
israelitá rihaan ve' yo', ne ca'anj
ndo'o rá nij so' se vaa guun a. 'O
se 'o 'o nij yuvii israelitá yo' ro',
cuno se vaa ca'mii nij síi noco' man
Jesucristó xna'ánj a'mii 'o 'o nij
yuvii israelitá yo' a. ⁷Dan me se

caráya'anj uxrá nij yuvii, ne cataj nij yuvii yo':

—Ni'yaj soj ei. Xa' nij sí nicun' a'mii nihánj, tzaj ne sij cavii estadó Galilea me cunudanj nij so' á. ⁸Ne asa' a'vee uno 'o 'o ní' se vaa a'mii nij so' xna'ánj a'mii ma'an nii ní' rihaan ní' ga. ⁹Dan me se ma'an ní' me sí cavii Partia do', Media do', Elam do', Mesopotamia do', Judea do', Capadocia do', Ponto do', Asia do', ¹⁰Frigia do', Panfilia do', Egiptó do', rej Libia naj nichrun' Cirene do', ne ta'aj ní' me sí ne chuman' Romá uún a. 'O se ta'aj ní' me yuvii israelitá, ne yo'ó ta'aj ní' me nij sí yaníj guun tuví' ga nij sí israelitá a. ¹¹Ne vaa sí cavii Creta do', Arabia do', uún a. Ne nihánj me se ndaa uno 'o 'o ní' se-xna'ánj ní', 'yaj nij so' a'mii nij so', ne nata' ndo'o nij so' se vaa sa' uxrá vaa Diose á —taj cunudanj nij yuvii yo' a.

¹²Dan me se caráya'anj uxrá cunudanj nij yuvii israelitá yo', ne ne ca'vee xcaj nij so' cuentá daj me che'é guun danj a. Ne ta'aj nij so' xna'ánj man tuvi', cataj nij so':

—Me che'é guun nu' danj ga —taj ta'aj nij so' a.

¹³Ne yo'ó ta'aj nij so' ca'nga' nacoo, ne cataj nij so':

—Cachén ndo'o co'o nij sí nihánj na vinó naca nanj chuguanj —taj nij sí ca'nga' nacoo yo' a.

Nihánj me nana nata' Pedró rihaan nij yuvii a

¹⁴Gaa ne dan me se canicun' sí cu'naj Pedró ga yo'ó xaan nij apóstol cune' Jesucristó man nata' se-nana so' rihaan yuvii, ne nucuaj

ndo'o ca'mii Pedró ne nata' so' nana nihánj a:

—Soj sij israelitá do', cunudanj soj sij ne chuman' Jerusalén nihánj do', nana xrej soj nana ca'mij rihaan soj, ne xcaj soj cuentá che'é rasuun nihánj ei. ¹⁵Ne guun xno núj ndaa vaa guun rá ta'aj soj ma'. 'O se xcaj soj cuentá, ne tihaj aga' uun rej na'yaan me nihánj ei. ¹⁶Tzaj ne nu' nihánj ro', me se vaa cataj sí cu'naj Joel sí nata' se-nana Diose gaa naá qui'yaj Diose a. Dan me se cataj sí cu'naj Joel: ¹⁷“Nihánj me a'mii ma'an Diose rihaan soj, ne taj Diose se vaa asa' nichrun' ca'anj ni'ya chumii nihánj, ne ca'nej ndo'o 'unj Nimán 'unj nimán yuvii man rihaan nu' chumii, ne ta'ní soj ro', nata' nana rque 'unj man ma'an nij so' a. Ne nij sí tachruu ro', naqui'ya ndo'o rasuun rihaan nij so', qui'yáj, ne nij chii nga ro', ca'mii ndo'o nej rihaan nij so', qui'yáj adonj. ¹⁸Dan me se güii yo' çaraj Nimanj nimán nij sí nuu rihanj do', nimán nij chana nuu rihanj do', ne nata' nij so' se-nanaj adonj. ¹⁹Dan me se gaa ndo'o rasuun nocoo quene'en soj rej xta', qui'yáj, ne gaa ndo'o rasuun nocoo quene'en soj rihaan yo'óo, qui'yáj, ne quene'en soj ton do', ya'an do', catze' do' a. ²⁰Ne guun rmi' rihaan güii, ne rihaan yavii ro', guun ton, asa' nichrun' quisij güii sa' güii ca'ne' 'unj sij 'nij ra'a man soj cacun' che'é yuvii a. ²¹Ne me ma'an sí cachinj ni'yaj rihaan 'unj, ne quinanj so' rihaan sayuun adonj”. Nihánj me se-nana Diose nana ca'mii sí cu'naj Joel gaa naá ei.

22”Ne cuano nihánj me se cuno soj sij israelitá nana nihánj ei. Dan me se aj ne'en nij soj daj qui'yaj Jesucristó síi cavii chuman' Nazaret, se vaa guun nucaj so' qui'yaj ndo'o so' suun sa' nocoo quene'en soj, qui'yaj Diose adonj. Ne dan me se xcaj soj cuentá daj sij me so', qui'yaj Diose á. 23”Dan me se tucuachén nii man so' rihaan nij síi taj ri'yunj man so', gaa ne dan me se cachrón nij síi ne noco' man Diose man so' rihaan rcutzé, ne cavi' so', qui'yaj ma'an soj a. Ne nu' nihánj me se vaa 'o guun rá Diose quirán' so', ne aj quene'en Diose se vaa quirán' so' danj ei. 24”Tzaj ne qui'yaj Diose se vaa ne ca'vee yuun che'e cavi' so', ma'. Tzaj ne cunuu i'na' uún so', qui'yaj Diose, che'é se ne ca'vee yuun che'e cavi' so' daj chihaa mǐj a man adonj.

25”O se nihánj me nana ca'mii síi cu'naj David che'é Jesucristó a: “Quene'én 'unj daj quiranj rej rihanj, ne xcaj 'unj cuentá se vaa yo'o canicun' síi 'nij ra'a manj rihanj nanj á. 'O se nicun' so' rej x'nuj, ne se ca'vee naxruj, qui'yaj so' ma'. 26”Che'é dan guun niha' ndo'o nimanj, ne ca'mij nana niha' cavii nimanj a. 'O se yo'o guun ya raj se vaa ya cavii sa' 'unj nanj adonj. 27”O se se tanáj so' nimanj rej man nij síi cavi' ma'. Ne se quiri'yuj nee man síi vaa sa' rihaan so', qui'yáa so' ma'. 28”Dan me se tihaán so' rihanj tucuáan canocoj ne ca'vee gaa i'na' 'unj a. Ne guun niha' ndo'o raj, qui'yáa so', asa' canicun' 'unj rihaan so' adonj”. Nihánj me se-nana síi cu'naj David yo' a.

29”Nuveé nana naca me nana nihánj nana cataj 'unj rihaan nij soj

cuano, man tinuj. Dan me se xii níi síi cu'naj David me se cavi' so', gaa ne cachin' nii man so', ne yaj me se ne'en níi me rej cachin' nii man so' nanj á. 30”Tzaj ne síi nata' se-nana Diose me so' gaa cayáan so', ne quene'en so' se vaa cata' tu'va Diose rihaan so' se vaa guun chij yo'o ta'níi ta'nij si'no so', ndaa vaa guun chij ma'an so' a. 31”Ne che'é dan cataj so' se vaa se quináj Jesucristó rej man nij síi cavi', ne se quixtun' nu' nee man so' ma'. Danj ca'mii so' ni'yaj so' güii cunuu i'na' uún Jesucristó a.

32”Gaa ne dan me se ya ya cunuu i'na' uún Jesucristó, qui'yaj Diose, ne taran' núj me síi quene'en se vaa cunuu i'na' uún so' adonj. 33”Gaa ne cavii Jesucristó ndaa x'núú Diose rej nuva' Diose, ya gaa nacaj Jesucristó Nimán Diose gaa narqué Diose Nimán so' man Jesucristó, danj vaa cata' tu'va so' a. Ne qui'yaj Jesucristó ga núj sij apóstol ndaa vaa ne'en soj se vaa ran' núj, ne dan me se qui'yaj Jesucristó ca'mii núj sij apóstol nu' xna'ánj a'mii soj ndaa vaa cuno soj ca'mii núj ei.

34”Dan me se ne cavii ma'an síi cu'naj David rej xta' ma'. Tzaj ne cataj so': “Ca'mii Diose síi 'nij ra'a man níi rihaan síi 'nij ra'a manj, cataj so' se vaa cayáan síi 'nij ra'a manj x'núú Diose rej nuva' Diose 35”ndaa se quisij qui'yaj canaán Diose rihaan taran' nij síi taj ri'yunj man síi 'nij ra'a manj ne quirii ta'nga' síi 'nij ra'a manj rihaan nij so' adonj”, taj síi cu'naj David yo' a. 36”Che'é dan vaa che'é ndo'o xcaj ya taran' soj sij israelitá cuentá se vaa xa' Jesucristó síi cachrón ma'an soj

rihaan rcutze, tzaj ne sí 'nij ra'a man ní' me so', ne sí ca'née Diose t̄inanií man ní' rihaan sayuun me uún so', qui'yaj Diose adonj —taj Pedró rihaan nij yuvií cunuu chre' yo' a.

³⁷Dan me se gaa cuno nij yuvií nana yo', ne quinano' ndo'o rá nij so', ne xná'anj nij so' man Pedró ga yo'ó nij apóstol cune' Jesucristó man nata' se-nana so' rihaan yuvií, cataj nij so' a:

—Ne daj qui'yaj núj, ga tinu' —taj nij so', xná'anj nij so' man nij tuvi' Pedró a.

³⁸Gaa ne cataj Pedró rihaan nij so' a:

—Canicaj nimán soj canoco' soj chrej sa', ne cata' ne cunudanj soj che'é yan quene'en yuvií se vaa noco' soj man Jesucristó, gaa ne tinavij Diose cacun' tumé soj, ne rque Diose Nimán Diose catuu yo' nimán soj ei. ³⁹Dan me se cata' tu'va Diose se vaa qui'yaj so' danj che'é nij soj do', che'é ta'níí soj do', che'é nij sí ne gan' do' a. Dan me se me ma'an sí nacunj Diose sí 'nij ra'a man ní' canoco' man so' me se qui'yaj Diose danj che'é so' adonj —taj Pedró rihaan nij yuvií israelitá yo' a.

⁴⁰Gaa ne nata' so' que'ee doj nana rihaan nij so', gaa ne nago' so' chrej nucaj man nij so', cataj so':

—Curihanj soj sca'núj tuvi' ní' sí noco' tucuaán chi'ii, gaa ne quinanií soj rihaan sayuun ei —taj Pedró rihaan nij yuvií israelitá a.

⁴¹Che'é dan me nij sí cuchumán rá se-nana so' ro', cata' ne nij so', ne güii yo' me se canoco' naca va'núj mij yuvií man Jesucristó ta' asuun a.

**Nana nihánj taj xna'anj daj qui'yaj
nij sí noco' man Jesucristó a**

⁴²Dan me se yo'o canoco' raan nij sí noco' man Jesucristó nana tucuyón nij apóstol rihaan nij so', ne yo'o guun tuvi' cunudanj nij so' a. Ne yo'o cuxra' ta'aj nij so' rachrúin chá nij so', ne yo'o chre' cachíin ni'yaj nij so' rihaan Diose a. ⁴³Ne cunudanj nij yuvií ro', cuchu'vi' ndo'o nij so' ni'yaj nij so' nij suun sa' noco' qui'yaj nij apóstol yo' a.

⁴⁴Tzaj ne nij sí cuchumán rá ni'yaj man Jesucristó me se 'o rej man chre' cunudanj nij so', ne naquiyaj rcua'aan nij so' nu' si'yaj nij so', ne si'yaj taran' nij so' me cunudanj nij rasuun yo' a. ⁴⁵Ne tu'vej nij so' to'óo nij so' do', si'yaj nij so' do', ne rque nij so' se-sa'anj nij so' rihaan tuvi' nij so' sí achiin rasuun man a. ⁴⁶Dan me se daj a güii 'anj nij so' nuvií noco' cachinj ni'yaj nij so' rihaan Diose, ndaa vaa guun rá taran' nij so' a. Ne 'o nuu chre' nij so' 'o ve', ne uxra' ta'aj nij so' rachrúin chá nij so' a. Ne dan me se ndaa niha' ndaa cochroj rá taran' nij so' chá nij so' chraa a. ⁴⁷Ne cataj nij so' se vaa sa' uxrá qui'yaj Diose che'é nij so', ne ca'mii sa' cunudanj nij yuvií ne chuman' Jerusalén ni'yaj nij yuvií man nij so' gaa ve'é mán chre' nij so' a. Ne daj a güii cunuu chre' doj sí vaj nanií rihaan sayuun ga nij so', qui'yaj Diose a.

**Nana nihánj taj xna'anj se
vaa nahuun sa' 'o sí rengo,
qui'yaj Pedró ga Juan a**

3 Dan me se aga' va'núj rej anoco' güii me se cuchi' sí cu'naj Pedró do', sí cu'naj Juan do', nuvií noco', che'é se orá achíin

ni'yaj nii rihaan Dioso me yo' a.
²Ne maan orá dan nicaj nii man
 'o síf rengó cuchí' nii rihaan nuvíí
 nocoo yo', ne síf rengó me so' asij
 ca'ngaa so' a. Ne dan me se daj a
 güii uchruj nii man so' rihaan yo'óó
 rej x'nuj ta'yaa cu'naj Ta'yaa Ve'é
 Ndo'o Vaa a. Ne yo' me rej achíín
 so' caridad man nij yuvií atúj nuvíí
 yo' a. ³Dan me se quene'en so' man
 Pedró do', man Juan do', se vaa
 catuu roj so' rá nuvíí nocoo, gaa ne
 cachíín so' caridad man roj so' a.
⁴Gaa ne ni'yaj uxrá Pedró do', Juan
 do', man so', ne cataj Pedró rihaan
 so' a:

—Ni'yaj so' man rój á —taj so'
 rihaan síf rengó yo' a.

⁵Gaa ne ni'yaj síf rengó man roj
 so', che'é se guun rá so' se vaa rque
 roj so' sa'anj man so' a. ⁶Gaa ne
 cataj Pedró rihaan so' a:

—Taj vaj a doj sa'anj rihaan
 'unj ma'. Tzaj ne rque 'unj se vaa
 rihaan 'unj mán so' ei. Dan me
 se che'é ma'an Jesucristó síf cavii
 chuman' Nazaret taj xna'anj 'unj
 rihaan so' se vaa na^xumaan so'
 ne cachee so' á —taj Pedró rihaan
 so' a.

⁷Gaa ne quita'aa Pedró ra'a so' rej
 nuva' so', ne cachrón caya Pedró
 man so', ne nu' nari' nucuaj tacóó
 so' do', xtucua' so' do' a. ⁸Gaa
 ne dan me se güié so', ne canicun'
 caya so', ne cachéé so', ne dan me
 se catúj so' rá nuvíí nocoo ga roj
 so', ne cachéé ndo'o so', ne güié so',
 ne cataj so' se vaa sa' uxrá qui'yaj
 Dioso che'é so' a. ⁹Gaa ne quene'en
 cunudanj nij yuvií se vaa cachéé
 so' ne cataj so' se vaa sa' uxrá
 qui'yaj Dioso a. ¹⁰Ne quene'en nij

yuvií se vaa ma'an so' me síf yáán
 rihaan ta'yaa nuvíí nocoo cu'naj
 Ta'yaa Ve'é Ndo'o Vaa ne achíín so'
 caridad, ne ca'anj ndo'o rá nij yuvií
 che'é se vaa nahuun sa' síf rengó
 yo' a.

Nihánj me nana nata' Pedró rihaan nij yuvií a

¹¹Dan me se quita'aa síf nahuun
 sa' yo' man síf cu'naj Pedró do',
 man síf cu'naj Juan do', ne che'é
 se ca'anj ndo'o rá nij yuvií, che'é
 dan cunánj nij yuvií cunuu chre'
 nij yuvií rihaan roj so' rque chingá
 cu'naj Corredor Salomón a. ¹²Ne
 gaa quene'en Pedró man nij yuvií,
 ne cataj so' rihaan nij yuvií a:

—Cuno soj sij israelitá ca'mij á.
 Me che'é ca'anj ndo'o rá soj se vaa
 chéé síf nihánj ga. Me che'é ni'yaj
 ndo'o soj man rój ga. Nuveé ma'an
 rój me síf guun nucuaj qui'yaj
 cachéé so' ma'. Nuveé che'e se
 sij nocó' sa' ndo'o man Dioso me
 rój, ne cachéé so' qui'yaj rój ma'.
¹³Dan me se Dioso síf nocó' xii ní'
 síf cu'naj Abraham do', síf cu'naj
 Isaac do', síf cu'naj Jacob do', me síf
 qui'yaj cavii sa' ndo'o ta'níí ma'an
 so' Jesucristó nanj adonj. Tzaj ne
 nij soj me nij síf tucuachén man
 Jesucristó rihaan nij síf taj ri'yunj
 man Jesucristó, ne nda' se guun ya
 rá síf cu'naj Pilato se vaa ca'anj unj
 Jesucristó, tzaj ne cataj soj rihaan
 síf cu'naj Pilato se vaa guun rá soj
 cavii' Jesucristó adonj.

¹⁴”Dan me se cataj soj se vaa ne
 guun rá soj ni'yaj soj man síf sa'
 nimán yo' ma'. Maan se cachíín
 ni'yaj soj rihaan síf cu'naj Pilato se
 vaa quirii so' taga' man 'o síf ticavi'

man yuvī a. ¹⁵Ne ticavi' soj man Jesucristó síi guun nucuaj qui'yaj gaa i'na' nimán ní' a. Ne Dioso ro', qui'yaj cunuu i'na' uún Jesucristó, ne ma'an núj me síi quene'en se vaa cunuu i'na' uún so' nanj adonj. ¹⁶Ne che'é se cuchumán rá síi nihánj ni'yaj so' man Jesucristó ro', che'é dan nari' nucuaj so', qui'yaj Jesucristó adonj. Ne dan me se nahuun sa' nu' so', ne aj ne'en taran' soj daj quiran' so', ne aj cuno soj daj taj ma'an so' nanj á.

¹⁷Ne nihánj me se ne'én 'unj se vaa che'é se ne quene'en soj daj sij me Jesucristó, ne che'é dan cavi' so' qui'yaj soj ga nij síi uun chij rihaan soj nanj ei. ¹⁸Tzaj ne Dioso ro', me síi cataj xna'anj asij naá ndo'o gaa rqué so' nana nata' nij síi nata' se-nana so', ne dan me se cataj xna'anj Dioso se vaa síi ca'nej so' tinanii man yuvī rihaan sayuun me se quiran' ndo'o so' sayuun a. Ne nihánj me se quisij ya nu' ndaa vaa cataj Dioso se vaa qui'yaj ma'an Dioso nanj ei.

¹⁹Che'é dan canicaj nimán soj canoco' soj chrej sa', gaa ne ca'vee tinavij Dioso cacun' tumé soj á. ²⁰Gaa ne ca'vee quisij güii cunuu cuij rá taran' ní' sij israelitá, qui'yaj síi 'nij ra'a man ní', ne dan me se Jesucristó síi cune' Dioso man tinanii man ní' rihaan sayuun me se ca'nej Dioso man so' ca'na' uún so' rihaan ní' a. ²¹Cuano nihánj me se me rá Dioso cayáán so' rej xta' ndaa se quisij güii naqui'yaj sa' Dioso nu' nij rasuun ndaa rá se vaa nij rasuun asij naá ndo'o ndaa vaa cataj xna'anj nij síi sa' síi nata' se-nana Dioso gaa naá a.

²²Dan me se síi cu'naj Moisés cataj rihaan xii ní': "Dioso sij 'nij ra'a man ní' me se cavii yo'o tinúu nij soj, qui'yaj Dioso, ne guun so' síi nata' se-nana Dioso ndaa vaa 'yaj ma'anj a. Ne cuno soj nu' nana nata' so' rihaan soj á. ²³Ne dan me se a me ma'an síi na'vej rá cuno se-nana síi nata' se-nana Dioso yo', ne nu' quirii yanij nii man so' sca'núj ní' sij israelitá, ne quirii' nu' so' nanj adonj", taj síi cu'naj Moisés gaa naá a. ²⁴Ne dan me se síi cu'naj Samuel do', cunudanj yo'o nij síi nata' se-nana Dioso do', cataj xna'anj taran' uún nij so' uún che'é güii yaj ei.

²⁵Ne rihaan ma'an nij soj ca'mii nij síi nata' se-nana Dioso, ne ma'an nij soj me nij síi cavii sa' qui'yaj Dioso, ndaa vaa cata' tu'va Dioso rihaan xii ní' gaa naá ei. Dan me se rihaan xii ní' síi cu'naj Abraham cataj Dioso: "Dan me se cavii sa' nij yuvī man cunudanj nij chuman' naj rihaan chumii, qui'yaj ta'níi ta'nij si'no so' a", taj Dioso rihaan Abraham a. ²⁶Gaa ne aj ca'neé Dioso man ta'níi Dioso rihaan chumii, ne cuchi' ta'níi Dioso asino yaan rihaan ma'an soj, qui'yaj Dioso, che'é rej canicaj nimán 'o 'o nij soj, ne tanáj xco nij soj tucuáán chilii, ne ca'vee qui'yaj ndo'o Dioso se luj che'é taran' nij soj ei —taj Pedró rihaan nij yuvī cunuu chre' rá nuvií nocoo yo' a.

Nana nihánj taj xna'anj daj ca'mii síi cu'naj Pedró ga Juan rihaan nij síi uun chij rihaan nij yuvī israelitá a

4 Dan me se gaa ca'mii síi cu'naj Pedró ga Juan rihaan nij

yuvii, ne cuchi' nij xrej do', tanuu uun chij rihaan nij tanuu 'yaj suun rá nuví nocoo do', nij síi saduceo do', rihaan roj so' a. ²O se ne guun nihá' rá nij so' gaa cuno nij so' nana tucu'yón Pedró ga Juan man nij yuvii nana se vaa Jesucristó me 'o síi cunuu i'na' uún gaa cavi' so' a. ³Ne dan me se quita'aa nij so' man roj so', ne caxríj nij so' taga' man roj so' 'o yan' a. 'O se aj ti'nuu me orá yo' a. ⁴Ne que'ee nij síi cuno se-nana roj so' ro', cuchumán rá nana yo', ne veé danj quisíj 'un' míj snó'o canoco' man Jesucristó ta' asuun a.

⁵Ne yo'ó güii me se cunuu chre' nij síi nicaj suun do', nij síi uun chij do', nij síi naqui'yaj cuu se-tucuanj Moisés rihaan nij yuvii do', chuman' Jerusalén ga ⁶síi cu'naj Anás síi guun xrej atá suun nocoo doj do', síi cu'naj Caifás do', síi cu'naj Juan do', síi cu'naj Alejandro do', taran' nij tuvi' nij xrej atá suun nocoo doj do' a. ⁷Dan me se canicun' caya síi cu'naj Pedró ga Juan tanuu ve' man nij xrej, qui'yaj nij xrej, ne xná'anj nij xrej man roj so', cataj nij xrej a:

—Me rej quiri' roj soj rej nucuaj do', me síi ca'ne' suun rihaan roj soj do', ne qui'yaj roj soj danj ga —taj nij so', xná'anj nij so' man roj so' a.

⁸Gaa ne caraa ndo'o Nimán Diose nimán Pedró, ne cataj Pedró rihaan nij so' a:

—Cuno nij soj sij nicaj suun rii ta'nga' rihaan nij yuvii do', cuno soj sij uun chij cuno nana cataj xna'anj 'unj rihaan nij soj á. ⁹Nihánj me se naqui'yaj cuu nij soj man rój che'é se cunuu 'ee rá rój ni'yaj rój 'o síi rengo, ne me rá nij soj quene'en

soj asa' ca'vee nahuun sa' síi rengo nihánj a. ¹⁰Che'é dan xcaj nij soj do', taran' nij yuvii israelitá do', cuentá se vaa Jesucristó síi cavii chuman' Nazaret me síi qui'yaj ca'vee naxcaj rój man síi rengo nihánj, ne 'o vaa nucuaj so' a. Ne nij soj ro', me nij síi qui'yaj cachrón nii man Jesucristó rihaan rcutze, tzaj ne cunuu i'na' uún so', qui'yaj Diose a. ¹¹Ne xa' Jesús, tzaj ne so' me yujej quiri'íj nij soj sij cune' ve', ne yaj me se guun so' yujej sa' doj rihaan taran' nij yujej man tacóó ve' yaj nanj adonj. ¹²Ne taj vaj a doj yo'ó síi guun nucuaj qui'yaj cavii sa' ní' a ma'. Orún' so' me síi vaa rihaan chumii nihánj síi ca'neé Diose, ne orún' so' me síi ca'vee tinanii man ní' rihaan sayuun nanj adonj —taj Pedró rihaan nij síi uun chij yo' a.

¹³Dan me se quene'en nij so' se vaa ne cuchu'vi' Pedró ga Juan ne sca' uxrá ca'mii roj so', ne xcaj nij so' cuentá se vaa nuveé sij tucu'yón yanj me roj so', tzaj ne sa' uxrá nari' roj so' a. Che'é dan caráya'anj nij so' a. Ne quene'en nij so' se vaa roj so' me síi cachéé ga Jesucristó a. ¹⁴Ne quene'en nij so' man síi nahuun sa' yo' nicun' ga roj so' a. Gaa ne ne quiri'í' nij so' nana ca'mii nij so' ma'.

¹⁵Gaa ne ca'ne' nij síi uun chij suun rihaan Pedró ga Juan ga síi nahuun sa' yo' se vaa curihanj va'nuij nij so' xe', gaa ne ca'vee nuchruj raa nij tuvi' nij síi uun chij daj qui'yaj nij so' ga síi cu'naj Pedró ga Juan yo', rá nij so' a. ¹⁶Dan me se cataj nij so':

—Daj qui'yaj ní' ga roj síi nihánj ga. 'O se xcaj taran' nij síi ne

chuman' Jerusalén nihánj cuentá se vaa ranga' qui'yaj suun roj so' suun sa' nocoo, ne se ca'vee cataj ní' se vaa ne qui'yaj roj so' danj ma'.¹⁷ Tzaj ne tuchu'vi' ní' man roj so' ne ca'ne' ní' suun rihaan roj so' se vaa se ca'mii roj so' che'é Jesucristó rihaan a 'ó yuvii a. Gaa ne se cha'nuu doj nana nihánj sca'núj nij yuvii a —taj taran' nij so' a.¹⁸ Gaa ne canacúun nij so' catuu uún Pedró ga Juan rej nuu nij so', gaa ne nago' nij so' chrej nucuaj man roj so' se vaa se ca'mii roj so' che'é Jesucristó ne se tucu'yón roj so' se-nana Jesucristó a.

¹⁹Gaa ne canicaj síi cu'naj Pedró ga Juan cataj roj so' rihaan nij so' a: —Nuchruj raa nij soj sese guun rá Diose cunó núj rihaan soj ne tanáj xco núj se-nana Diose ei.²⁰ Se ca'vee ca'ne' rá núj ga suun a'mii che'é rasuun quene'en núj do', che'é nana cuno núj do' a ma' —taj roj so' rihaan nij so' a.

²¹Gaa ne doj a ca'mii yuvaa nij síi uun chij yo' rihaan roj so', tzaj ne ne quirí' nij síi uun chij yo' daj qui'yaj nij so' sayuun man roj so' a ma'. Che'é dan na'née nij so' chrej man roj so' a. 'O se nij yuvii me se cunudanj nij so' cataj se vaa sa' uxrá qui'yaj Diose che'é síi nahuun sa' yo' a.²² Ne síi nahuun sa' qui'yaj suun sa' nocoo yo' me se vaj so' vj chihaa yo' táa doj a.

Nana nihánj taj xna'anj daj ca'mii nij síi noco' man Jesucristó gaa cachíin ni'yaj nij so' rihaan Diose a

²³Dan me se na'née nii man Pedró ga Juan, ne cuchi' roj so' rihaan tinúu roj so', gaa ne nata' roj so'

nu' nana cataj nij xrej ata suun nocoo doj do', nij síi uun chij do', se vaa cataj nij so' rihaan roj so' a.²⁴ Gaa ne dan me se gaa cuno nij so' se-nana roj so', gaa ne nu' guun rá taran' nij so' cachinj ni'yaj nij so' rihaan Diose, ne che'é dan nucuaj ca'mii nij so', cataj nij so' a:

—Ma'an so' me síi qui'yaj nu' rej xtá' nu' chumii nu' na ya'anj nu' rasuun nu' a.²⁵ Ne so' ro', ca'née Nimán so' rihaan xii núj síi cu'naj David síi qui'yaj suun che'é so', ne Nimán so' ro', rqué nana rihaan so' ca'mii so', ne dan me se cataj so': “Me che'é ca'maan ndo'o rá nij síi yanj, ne me che'é guun nij rma'an rá nij yuvii ga.²⁶ Dan me se cavii nij síi nicaj suun rey uun chij rihaan chumii nihánj, gaa ne cunuu chre' nij so', che'é rej qui'yaj nij so' sayuun man síi 'njj ra'a man ní' do', man síi ca'née so' tinanii man yuvii rihaan sayuun do' a”, taj síi cu'naj David yo' gaa naá a.²⁷ Dan me se ya ya cunuu chre' síi cu'naj Herodes do', síi cu'naj Poncio Pilato do', nij síi yanj do', nij yuvii israelitá do', rque chuman' nihánj, che'é rej qui'yaj nij so' sayuun man ta'níi so' síi cu'naj Jesucristó síi cuné' so' man tinanii man núj rihaan sayuun a.²⁸ Tzaj ne qui'yaj nij so' inanj se vaa guun rá ma'an so' asj naá se vaa qui'yaj nij so', ne ma'an so' me síi qui'yaj guun nu' nihánj a.²⁹ Ne nihánj me se xcaj so' sij 'njj ra'a man núj cuentá se vaa ca'mii yuvaa ndo'o nij so' rihaan núj a. Ne racuj so' man núj sij 'yaj suun che'é so' se vaa guun nucuaj núj nata' sca' núj se-nana so' rihaan yuvii a.³⁰ Dan me se racuj so' man

núj qui'yaj núj suun sa' nocoo, ne nahuun sa' yuvii, qui'yáa so', che'é rej xcaj yuvii cuentá se vaa sij nucuaj ndo'o mé so' che'é ta'níi so' Jesucristó síi guεé á —taj taran' nij so', cachíin ni'yaj nij so' rihaan Diose a.

³¹Dan me se quisij cachíin ni'yaj nij so' rihaan Diose, gaa ne quinaan nu' rej man nij so', ne caraa ndo'o Nimán Diose nimán cunudanj nij so', gaa ne sca' ndo'o ca'mii nij so' se-nana Diose a.

**Nana nihánj taj xna'anj che'é
yan yo'o chre' mán nij síi
nocoo' man Jesucristó a**

³²Dan me se yo'o cuyaan vaa rá cunudanj nij síi cuchumán rá ni'yaj man Jesucristó, ne a 'ó nij síi nocoo' man Jesucristó ne taj se vaa se-si'yaj orún' me rasuun ma'. Tananj nu' rasuun man rihaan 'o 'o nij so' ro', me si'yaj taran' nij so', taj nij so', ne 'o chre' mán nij so', ne 'o chre' a'mii nij so', ne orún' rasuun si'yaj cunudanj nij so' a. ³³Ne nij apóstol cune' Jesucristó man nata' se-nana so' rihaan yuvii me se nucuaj ndo'o nata' nij so' se vaa cunuu i'na' uún Jesucristó sij 'nij ra'a man ní' a. Ne qui'yaj ndo'o Diose se luj che'é cunudanj nij so' a.

³⁴Ne taj vaj a 'ó síi achiin rasuun man 'nij sca'núj nij so' ma'. 'O se cunudanj tinúú nij so' síi vaa to'óo do', síi vaa ve' tucua' do', cutu'véj nij so' si'yaj nij so', ne nicaj nij so' sa'anj quirí' nij so', ³⁵ne caxrj'j nij so' sa'anj yo' ston nij apóstol cune' Jesucristó man nata' se-nana so' rihaan yuvii a. Ne sese cachiin rasuun rihaan 'o tinúú nij so', ne nij

apóstol me nij síi rqué nu' se vaa cachiin rihaan so' a.

³⁶Ne yo'o so' ro', me síi cu'naj José, ne tucu'náj nij apóstol Bernabé man so' a. Ne nana Bernabé taj se vaa síi 'yaj nari' nucuaj ní' me so' a. Ne 'o ta'níi ta'nij si'no síi cu'naj Leví síi cane gaa naá me so', ne cavii so' rej cu'naj Chipre a. ³⁷Dan me se vaa 'o to'óo so', ne cutu'véj so' man yo', ne nicaj so' sa'anj quirí' so' che'é yo'óo yo', ne caxrj'j so' ston nij apóstol yo' a.

**Nana nihánj taj xna'anj che'é cacun'
qui'yaj síi cu'naj Ananías do', nica
so' chana' cu'naj Safira do' a**

5 Dan me se vaa yo'o síi cu'naj Ananías, ne vaa nica so' chana' cu'naj Safira, ne cutu'véj roj nica roj so' 'o yo'óo, ²ne quirí' roj so' sa'anj, gaa ne quita'aa síi cu'naj Ananías ta'aj sa'anj yo', ne ca'vej rá nica so' quita'aa so' sa'anj yo' a. Gaa ne daj 'ó ta'aj sa'anj ca'anj nicaj so', caxrj'j so' ston nij apóstol cune' Jesucristó man a. Ne ca'mii ne so' rihaan nij apóstol se vaa nu' sa'anj quirí' so' che'é yo'óo cutu'véj so' me yo', cataj so' a. ³Gaa ne ca'mii Pedró rihaan síi cu'naj Ananías, cataj so', ne:

—Me che'é catúj síi chree nimán so', ne ca'mii ne so' ndaa rihaan Nimán Diose, ne quita'aa so' ta'aj sa'anj quirí' so' gaa cutu'véj so' yo'óo yo' ga. ⁴Dan me se daj guun rá so', ne ca'mii ne so' ga. Nuveé to'oj ma'án so' cutu'véj so' ne gaa cutu'véj so' man yo' ne ne nó xcúun so' qui'yáa so' ndaa vaa me rá ma'án so' qui'yáa so' ga se-sa'anj so' na'. Me che'é cavii

raá so' qui'yáá so' se vaa qui'yáá so' nihánj ga. Nuveé rihaan yuvii uun ca'mii ne so' ma'. Ndaa rihaan ma'an ya Diose ca'mii ne so' nanj adonj —taj Pedró rihaan Ananías yo' a.

⁵Gaa cuno Ananías nana ca'mii Pedró rihaan so', ne naxru' so', ne cavi' so' a. Gaa ne cuchu'vi' ndo'o cunudanj nij síi cuno ndaa vaa quiran' so' a. ⁶Gaa ne canicun' nij síi tachruu, ne caráán nij so' yatzíj xráá síi cavi', gaa ne ca'anj nicaj nij so' man so' xe', gaa ne cachin' nij so' man so' a.

⁷Dan me se cachén va'núj orá ta' asuun, gaa ne catúj nica síi cavi' yo' rá ve', ne ne quene'en no' daj quiran' nica no' ma'. ⁸Gaa ne cataj Pedró rihaan no' a:

—Cataj xna'anj so' rihanj sese nu' sa'anj quita'aa roj soj che'é yo'óo cutu'véj roj soj me nihánj á —taj Pedró rihaan no' a.

—Veé cunudanj ya sa'anj quita'aa rój che'é yo'óo me yo' ei —taj no' a.

⁹Gaa ne cataj Pedró rihaan no' a:

—Me che'é cuyaan guun rá roj soj tihá' yu'unj roj soj man Nimán síi 'nij ra'a man ní' ga. Ní'yaj so' ei. Nij síi cachin' man nica so' ro', nicun' ta'yaa, ne nihánj me se cataj nij so' mán so', ca'anj nicaj nij so' mán so' xe' cuano ei —taj Pedró rihaan no' a.

¹⁰Gaa ne taj ni'yón naxru' no' rihaan yo'óo rej nicun' Pedró, ne nu' cavi' no' a. Gaa ne dan me se catúj uún nij síi tachruu rá ve', ne quene'en nij so' se vaa aj cavi' no', gaa ne ca'anj nicaj nij so' man no' xe', gaa ne cachin' nij so' man no' uún x'núú nica no' a. ¹¹Gaa

ne cuchu'vi' ndo'o cunudanj nij síi cuchumán rá ni'yaj man Jesucristó do', cunudanj nij síi cuno nana daj quiran' roj nica roj so' a.

Nana nihánj taj xna'anj che'é suun sa' nocoo qui'yaj nij apóstol cune' Jesucristó man nata' se-nana so' a

¹²Gaa ne qui'yaj ndo'o nij apóstol cune' Jesucristó man suun sa' nocoo ni'yaj nij yuvii ne chuman' Jerusalén a. Ne yo' o vaa rá nij síi nocoo' man Jesucristó, ne cunuu chre' nij so' rá nuvíi nocoo rá chingá cu'naj Corredor Salomón a. ¹³Tzaj ne yo' o nij yuvii ro', ne quisij rá nij so' cunuu chre' nij so' ga nij síi nocoo' man Jesucristó ma'. Tzaj ne cunudanj nij yuvii cataj se vaa sa' qui'yaj nij síi nocoo' man Jesucristó a. ¹⁴Tzaj ne cuchumán rá que'ee nij snó'o do', nij chana do', ni'yaj nij so' man síi 'nij ra'a man ní', ne che'é dan guun rii doj nij yuvii nocoo' man so' a. ¹⁵Ne dan me se rihaan chruun do', rihaan yuvéé do', táá nij síi ran', rii nij yuvii man nij síi ran' yo' xe' a. Cuchruj nii man nij síi ran' rá callé rej cachén Pedró, che'é se sese se-cachun' Pedró cano xráá nij síi ran' ne nahuun so', rá nij yuvii a. ¹⁶Gaa ne ca'na' ndo'o yuvii cavii nij chuman' naj nichrun' chuman' Jerusalén, ne nuu chre' nij so' a. Dan me se atá nij so' síi ran' do', síi nuu nana chree nimán do', ne nahuun sa' cunudanj nij so' a.

Nana nihánj taj xna'anj che'é sayuun qui'yaj nii man nij apóstol cune' Jesucristó man nata' se-nana so' rihaan yuvii a

¹⁷Dan me se guun xcoj ruvaa rá nij tuvij' xrej atá suun nocoo doj

ni'yaj nij so' man nij apóstol cune' Jesucristó man nata' se-nānā so' rihaan yuvii a. Dan me se nij tuvii' xrej me se síi saduceo me nij so' a. ¹⁸Dan me se ca'néé nij so' tanuu quita'aa man nij apóstol, gaa ne caxrjij nij so' taga' man nij so' a. ¹⁹Tzaj ne rej nii me se ca'na' yo'o se-mozó síi 'nij ra'a man ní', ne ca'núj so' ta'yaa taga' yo', ne ca'anj nicaj so' man nij apóstol xe' a. Gaa ne cataj se-mozó Diose yo' rihaan nij apóstol:

²⁰—Cavii soj, ne ca'anj soj canicun' soj rá nuvií nocoo, ne nata' soj rihaan nij yuvii nu' nana nihánj nana taj xna'anj daj qui'yaj nij yuvii ne ca'vee gaa i'na' nimán nij yuvii rihaan Diose á —taj se-mozó Diose yo' rihaan nij so' a.

²¹Sij cuno nij so' nana vaa danj, gaa ne rej sij güii catúj nij so' rá nuvií nocoo, ne tucu'yón nij so' se-nānā Jesucristó rihaan nij yuvii a. Maan orá dan canacúun nij tuvii' xrej ata suun nocoo doj, ne cunuu chre' cunudanj nij síi uun chij rihaan nij yuvii israelitá, qui'yaj nij so' juntá a. Gaa ne ca'néé nij so' síi ca'anj taga', ne ca'na' nicaj nij so' man nij apóstol rihaan nij so', rá nij so' a. ²²Dan me se cuchi' nij mozó ca'néé nij síi uun chij yo' taga', gaa ne ne nari' mozó man nij apóstol rque taga' a ma'. Che'é dan me canicaj nij mozó yo' rej mán nij síi uun chij yo', ne nata' nij mozó yo' se vaa guun taga' a.

²³Dan me se cataj nij mozó yo' a:

—Dan me se gaa cuchi' núj taga', ne vaa raan taga', ne nicun' nij tanuu rihaan ta'yaa, tumé nij tanuu ta'yaa a. Tzaj ne gaa ca'núj núj

ta'yaa, ne ne nari' núj a 'ó yuvii rá taga' a ma' —taj nij mozó rihaan nij síi uun chij yo' a.

²⁴Dan me se gaa cuno tanuu uun chij rihaan nij tanuu tumé nuvií nocoo doj, gaa cuno nij xrej ata suun nocoo doj, nana vaa danj, gaa ne dan me se cuchi'vi' nij so', ne ne quene'en nij so' daj guun rej rihaan nij so' qui'yaj nij síi nocoo' man Jesucristó a. ²⁵Gaa ne dan me se cuchi' yo'o so' rihaan nij síi uun chij, gaa ne nata' so' rihaan nij so', cataj so':

—Xa' nij síi caxrjij nij soj taga' man, tzaj ne cuano nihánj me se nicun' nij so' rá nuvií nocoo, tucu'yón uxrá nij so' rihaan nij yuvii nanj á —taj síi ca'na' rihaan nij so' a.

²⁶Gaa ne cavii tanuu uun chij rihaan nij tanuu tumé nuvií nocoo cavii nij mozó cavii, ca'anj nij so' nuvií nocoo, ne ca'anj nacaj nij so' man nij apóstol cune' Jesucristó man rihaan nij síi uun chij yo' a. Tzaj ne ne qui'yaj nij so' fuerzá man nij síi cune' Jesucristó man ma'. 'Q se cuchi'vi' tanuu doj, nij mozó doj, ni'yaj nij so' man nij yuvii se vaa go' nij yuvii yahij xráa ma'an nij so' a.

²⁷Dan me se ca'na' nicaj nij so' man nij apóstol rej cunuu chre' cunudanj nij síi uun chij rihaan nij yuvii israelitá a. Gaa ne xna'anj xrej ata suun nocoo doj man nij so', ²⁸cataj so' a:

—Né se aj cataj xna'anj núj rihaan nij soj se vaa ca'ne' rá soj ga suun tucu'yón rihaan nij yuvii che'é síi nata' soj che'é a. Tzaj ne cuano nihánj me se aj cuchi' se-nānā soj rihaan cunudanj nij síi man chuman' Jerusalén nihánj, qui'yaj

soj, ne me rá soj caraa soj cacun' xráá núj se vaa cavi' snó'o noco' soj qui'yaj núj á —taj so' rihaan nij apóstol a.

²⁹Gaa ne cataj Pedró do', yo'ó nij apóstol cune' Jesucristó man do' a: —Tzaj ne 'o se no xcúún ní' cuno ní' asino yaan nana a'mii Diose rihaan nana a'mii yuvií a. ³⁰'O se nij soj me síf toco' man Jesucristó rihaan rcutze, ne cavi' so', qui'yaj soj, ne Diose noco' xii ní' asij naá ro', me síf qui'yaj cunuu i'na' uún so' adonj. ³¹Gaa ne ma'an Diose qui'yaj cavii Jesucristó txá', ne nicun' Jesucristó rej x'nuj Diose rej nuva' Diose, ne guun Jesucristó síf uun chij ndo'o, ne síf tinanii man ní' rihaan sayuun guun so', che'é rej ca'vee canicaj nimán ní' sij israelitá gaa ne quinavij cacun' tumé ní' adonj. ³²Ne núj me síf nata' nana nihánj rihaan yuvií ei. Ne ne'len Nimán Diose uún se vaa ya ya vaa nana nihánj, ne rqué Diose Nimán Diose rihaan núj sij uno rihaan Diose a —taj nij so' rihaan nij síf uun chij rihaan nij yuvií israelitá a.

³³Dan me se gaa cuno nij síf uun chij nana nihánj, gaa ne ca'maan uxrá rá nij so', gaa ne guun rá nij so' ticavi' nij so' man nij apóstol yo' a. ³⁴Tzaj ne canicun' caya yo'o tuvi' nij so' 'o síf fariseo síf cu'naj Gamaliel, ne síf naqui'yaj cuu se-tucuanj Moisés me so', ne caráj cochroj cunudanj nij yuvií ni'yaj nij yuvií man so' a. Gaa ne ca'ne' so' suun se vaa curihanj nij apóstol doj 'o orá nii xe' a. ³⁵Gaa ne cataj Gamaliel rihaan yo'ó nij síf uun chij yo' a:

—Cuno soj sij israelitá nana ca'mij rihaan nij soj cuano á. Dan me se

tadó soj daj qui'yaj soj ga nij snó'o ca'na' rihaan ní' nihánj á. ³⁶'O se asij rque doj me se nachumaan 'o síf cu'naj Teudas, ne so' ro', me síf cataj se vaa sij sa' uxrá me ma'an so', ne canoco' 'o ca'anj cientó yuvií xcó so' ta' asuun a. Gaa ne ticavi' nii man so', ne cha'nuu cunudanj nij síf cuno se-nana so', ne navij nu' se-nana so' nanj adonj. ³⁷Gaa ne dan me se cachén doj, gaa ne cavii yo'ó síf cu'naj Judas síf cavii estadó Galilea, ne nachumaan so' gaa güii cachrón gobiernó se-chuvií cunudanj nij yuvií rihaan yanj a. Gaa ne tiha' yu'unj so' man yuvií, ne canoco' nij yuvií xcó so' a. Gaa ne cavi' so' uún, gaa ne cunudanj nij yuvií cuno se-nana so' cha'nuu uún a.

³⁸”Ne cuano nihánj me se cataj xna'anj 'unj rihaan nij soj se vaa se qui'yaj nij soj a doj sayuun man nij síf ca'na' rihaan ní' cuan' ma'. 'O se sese tucuáan cuchruj yuvií uun me se-tucuanj nij so', ne sese 'yaj nij so' ndaa vaa avii raá ma'an nij so', ne quirí' nu' se vaa 'yaj nij so' nanj adonj. ³⁹Tzaj ne sese Diose me síf rqué se-nana nij so', ne sese 'yaj suun nij so' se-suun Diose, ne daj chihaa míj se ca'anj ni'ya se-nana nij so' qui'yaj soj ma'. Sese danj guun qui'yaj nij soj, ne síf unu' ga ma'an Diose me nij soj adonj —taj síf cu'naj Gamaliel cuno yo'ó nij síf uun chij rihaan nij yuvií israelitá a.

Dan me se cuchumán rá nij so' se-nana síf cu'naj Gamaliel yo', ⁴⁰gaa ne canacúún nij so' man nij apóstol, ne catúj nij so' rej mán nij so', gaa ne go' nii rutzii xráá nij apóstol, qui'yaj nij síf uun chij, ne

ca'ne' nij so' suun rihaan nij apóstol se vaa se ca'mii nij so' a 'ó nana che'é Jesucristó rihaan nij yuvii, gaa ne na'néé nij síi uun chij yo' chrej man nij apóstol a. ⁴¹Dan me se curihañj nij apóstol rej mán nij síi uun chij rihaan nij yuvii israelitá, ne guun niha' rá nij apóstol che'é se sij vaa sa' me nij so' ni'yaj Diose ne che'é dan ca'vee quiran' nij so' sayuun che'é Jesucristó qui'yaj Diose a. ⁴²Ne daj a güii me se cunuu chre' nij apóstol rá nuvíi nocoo do', rá ve' tucua' nij so' do', ne yo'o tucu'yón nij so' man nij yuvii, ne nata' nij so' se-nana Jesucristó nana sa' rihaan nij yuvii a.

Nana nihánj taj xna'anj daj cune' nii man chij síi 'yaj suun che'é nij síi cuchumán rá ni'yaj man Jesucristó a

6 Ne güii dan me se guun rijij doj nij síi tucu'yón se-nana Jesucristó, ne dan me se ta'aj nij so' me síi a'mii xna'ánj griego, ne yo'ó ta'aj nij so' me síi a'mii xna'ánj hebreo a. Ne dan me se nij ca'mii nij síi a'mii xna'ánj griego ni'yaj nij so' man nij síi a'mii xna'ánj hebreo, che'é se chá go' nij síi a'mii xna'ánj hebreo yo' rihaan nij chana nique cavi' nica daj a güii a. Ne rihaan nij chana nique cavi' nica níi a'mii xna'ánj griego me se ne cuyaan go' nij so' se chá cha' nij no' a ma'. Ne che'é dan a'maan rá nij síi a'mii xna'ánj griego a. ²Che'é dan chujij nij apóstol cune' Jesucristó man ro', canacúún nij so' man nij síi tucu'yón se-nana Jesucristó cunuu chre' nij so', ne cataj chujij nij so' a:

—Nij uxrá vaa sese tanáj xcó núj suun nata' se-nana Diose rihaan

yuvii che'é rej qui'yaj chujij núj co'oo rihaan nij chana cavi' nica adonj. ³Che'é dan nariij nij soj chij tinúú ní' síi ve'é a'mii nii ni'yaj nii man, tinuj. Dan me se nano' soj síi nuu ndo'o Nimán Diose nimán, ne síi cuu raá nano' soj, ne cune' ní' man nij so' se vaa qui'yaj suun nij so' suun nihánj á. ⁴Ne xa' núj, tzaj ne inanj suun yo'o cachinj ni'yaj rihaan Diose qui'yaj suun núj, ne nata' núj se-nana Diose nanj á —taj chujij nij apóstol cune' Jesucristó man nata' se-nana so' a.

⁵Dan me se guun niha' rá cunudanj nij yuvii gaa cuno nij yuvii nana yo', ne nariij nij yuvii man chij tinúú nij so', ne yo'o so' me síi cu'naj Esteban, ne so' ro', me síi nucuaj uxrá rá ni'yaj man Diose, ne nuu ndo'o Nimán Diose nimán so' a. Ne nariij uún nij so' man síi cu'naj Felipé do', Prócoro do', Nicanor do', Timón do', Parmenas do', Nicolás do' a. Ne nuveé sij israelitá me Nicolás, maan ne síi guun rá canoco' se-tucuanj nij síi israelitá guun so', ne síi cavii chuman' Antioquía me so' uún a. ⁶Ne dan me se nicaj nij yuvii man chij nij so' ca'anj nij so' rihaan chujij nij apóstol cune' Jesucristó man, ne nij apóstol me se cachíin ni'yaj nij so' rihaan Diose, gaa ne cuta' nij so' ra'a nij so' raá chij nij so' che'é yan go' nij so' se chá rihaan nij chana nique cavi' nica a.

⁷Dan me se cha'nuu uxrá se-nana Diose, ne guun rijij ndo'o doj nij síi tucu'yón se-nana Jesucristó chuman' Jerusalén yo', ne ndaa que'ee uxrá nij xrej israelitá cuchumán rá se-nana Jesucristó ne cuno rihaan Jesucristó a.

**Nana nihánj taj xna'anj daj
qui'yaj nii gaa quita'aa nii
man sí cu'naj Esteban a**

⁸Dan me se sí cu'naj Esteban me se racuíj ndo'o Diose man so', ne guun nucuaj ndo'o so', ne dan me se qui'yaj ndo'o so' suun sa' nocoo ni'yaj nij sí man rej chuman' Jerusalén a. ⁹Tzaj ne canicun' que'ee yuvií, ne ta'aj nij so' me sí 'anj ve' tucuyón rej nuu chre' nij sí qui'yaj canaán curihanj rihaan se-ru'vee nij so', ne yo'ó ta'aj nij so' me sí cavii chuman' Cirene, ne yo'ó ta'aj nij so' me sí cavii chuman' Alejandría, ne yo'ó ta'aj nij so' me sí cavii rej cu'naj Cilicia do', rej cu'naj Asia do' a. Dan me se canó tuvi' taran' nij so' ga sí cu'naj Esteban, ¹⁰tzaj ne ne ca'vee qui'yaj canaán se-nana nij so' rihaan se-nana Esteban a ma'. 'O se racuíj ndo'o Nimán Diose man sí cu'naj Esteban, ne cavii ndo'o nana cuu raá so', qui'yaj Nimán Diose a. ¹¹Gaa ne caxrjij nij so' chrej rque yo'ó ta'aj snó'o uún, ne snó'o yo' cataj:

—Cuno núj se vaa ca'mii sí cu'naj Esteban yo' nana nij che'é sí cu'naj Moisés ga ma'an Diose á —taj nij snó'o yo', ca'mii ne nij so' a.

¹²Gaa ne ca'maan rá nij yuvií do', nij sí uun chij rihaan nij yuvií israelitá do', nij sí naquiyaj cuu se-tucuanj Moisés rihaan yuvií do', gaa cuno nij so' se-nana nij sí ne yo' a. Gaa ne cavii nij so', quita'aa cunudanj nij so' man Esteban, ne ca'anj nicaj nij so' man so' rá ve' nuu chre' nij so', qui'yaj nij so' juntá a. ¹³Gaa ne canicun' doj sí ca'mii ne sí caraa cacun' xráá Esteban, ne cataj nij so' a:

—Sí nihánj ro', ne a'ne' rá so' ga suun a'mii quij che'é rej guce nihánj do', che'é tucuáán noco' ní do', a ma'. ¹⁴'O se cuno núj se vaa cataj so' se vaa Jesucristó sí cavii chuman' Nazaret me sí tirí nu' nuví nocoo nihánj, ne natuna so' tucuáán cuchruj sí cu'naj Moisés che'é ní adonj —taj nij so', ca'mii ne nij so' ni'yaj nij so' man Esteban yo' a.

¹⁵Gaa ne ni'yaj uxrá cunudanj nij sí yanj rá ve' yo' man Esteban yo', ne ase vaa rihaan se-mozó Diose ro', danj vaa rihaan so', ni'yaj nij so' a.

7 Gaa ne xná'anj xrej ata suun nocoo doj man sí cu'naj Esteban, cataj xrej:

—Ya uxrá danj ca'mii so' dan tu'va nij so' danj che'é so' na' —taj so', xná'anj so' man Esteban a.

**Nana nihánj taj xna'anj daj ca'mii
natáj sí cu'naj Esteban rihaan nij sí
uun chij rihaan nij yuvií israelitá a**

²Gaa ne cataj sí cu'naj Esteban yo':

—Cuno soj ca'mij rihaan soj, tinuj, ta'nuj. Dan me se gaa ataa cayáán xij ní sí cu'naj Abraham chuman' Harán, ne ni'ndaj ya ve'é vaa Diose curuvi' rihaan so' rej vaj so' rej cu'naj Mesopotamia, ³ne cataj Diose rihaan so': “Curihanj so' chiháán so' rej ne nij tuví so', ne cavii so' ca'anj so' 'o rej tijaán 'unj mán so' á”, taj Diose rihaan Abraham a. ⁴Gaa ne dan me se curihanj so' rej ne nij sí caldeo, ne ca'anj so' cayáán so' chuman' Harán a. Gaa ne quisj cavi' rej so', ne cavii uún so', ca'anj so' cayáán so' yo'ó nihánj rej ne ma'an nij

soj cuano a. ⁵Tzaj ne a doj yo'óo ne rque Diose rihaan sí cu'naj Abraham ma'. Ne a 'ó ta'níi Abraham ne ca'ngaa gaa cata' tu'va Diose rihaan so' se vaa guun si'yaj nij ta'níi ta'nij si'no Abraham man yo'óo nihánj nanj á.

⁶Gaa ne cataj uún Diose rihaan so' se vaa ca'anj cayáan nij ta'níi ta'nij si'no so' to'óo yo'ó yuvi, ne guun nij so' mozó cunuú rihaan yo'ó nij yuvi yo', ne tucuxru' yo'ó nij yuvi man nij so' cunu' ca'anj cientó yo' a. ⁷Ne xa' nij yuvi guun nij so' mozó rihaan, tzaj ne ma'an Diose qui'yaj sayuun man nij yuvi yo', gaa ne curihanj nij ta'níi ta'nij si'no Abraham rej yo', ne naman nij so' cayáan nij so' rej nihánj, ne canoco' nij so' man Diose, ne qui'yaj suun nij so' che'é Diose, taj Diose rihaan Abraham gaa naá a.

⁸Dan me se cata' tu'va Diose se vaa qui'yaj Diose danj che'é nij tuvi' Abraham, gaa ne ca'ne' Diose suun se vaa cuta' taran' nij tuvi' Abraham ta'nga' man nij so', che'é se yuvi 'nij ra'a Diose man me nij so' a. Ne dan me se ca'ngaa ta'níi Abraham sí cu'naj Isaac, ne cuta' Abraham ta'nga' man so' gaa vaj so' tunj güii a. Ne danj qui'yaj Isaac uún che'é ta'níi so' sí cu'naj Jacob, ne danj qui'yaj uún Jacob che'é nij ta'níi so' chujij nij xi ní' nij sí cayáan gaa naá a.

⁹Gaa ne dan me se guun xcoj ruvaa rá nij xi ní' ni'yaj nij so' man tinúu nij so' José, gaa ne cutu'vej nij so' man so' rihaan sí ca'anj nicaj man so' ndaa rej yo'óo cu'naj Egiptó a. Ne Diose vaj ga so', ¹⁰ne tinanii Diose man so' rihaan nu'

sayuun quiran' so' a. Gaa ne guun rá sí nicaj suun rey sí cu'naj Faraón ni'yaj so' man José, ne sí sa' ndo'o avii raa guun José rihaan Faraón, qui'yaj Diose a. Gaa ne cune' Faraón man José se vaa guun chij José rihaan rej Egiptó, ne ndaa rihaan nu' ve' tucua' Faraón guun chij José a.

¹¹Gaa ne cachén ndo'o x'naa nu' rej Egiptó do', rej yo'óo cu'naj Canaán do', ne quiran' ndo'o nij yuvi sayuun, ne xii ní' ro', ne guun nucuj nij so' quirí' nij so' se cha nij so' ma'. ¹²Gaa ne cuno Jacob nana se vaa vaa 'núu trigó ane' rej Egiptó, ne che'é dan tihaj yuun ca'néé so' man nij ta'níi so' ca'anj nij so' nano' nij so' 'núu trigó a. ¹³Dan me se quisíj vij ca'anj nij so' rej Egiptó, gaa ne cataj xna'anj José rihaan nij so' se vaa tinúu nij so' me so', gaa ne dan me se xcaj Faraón cuentá me rej cavii José a.

¹⁴Gaa ne ca'néé José nana rihaan rej so' Jacob se vaa ca'anj nij tuvi' Jacob cayáan nij so' rej Egiptó, ne dan me se va'nuj chihaa xnu' yuvi me nij tuvi' Jacob yo' a. ¹⁵Gaa ne dan me se ca'anj Jacob rej Egiptó a. Cachén doj, gaa ne cavi' so', ne cavi' nij ta'níi so' xi ní', ¹⁶gaa ne ca'anj nicaj nii man cúu man nij so' ndaa chuman' cu'naj Siquem, ne dan me se cachin' nii man cúu man nij so' rque yu'uj yuvej aj quiránj Abraham rihaan nij ta'níi sí cu'naj Hamor rej chuman' Siquem yo' a.

¹⁷Dan me se gaa quinichrun' güii quisij ya nu' nana aj cata' tu'va Diose rihaan Abraham gaa naá, ne dan me se xna'anj nij yuvi israelitá yo' rej Egiptó, ne guun ri ndo'o

doj nij so' a. ¹⁸Danj qui'yaj nij so' ndaa se catúj yo'ó sí nicaj suun rey yo'óo Egiptó, ne ne ne'len so' a doj che'é sí cu'naj José a ma'. ¹⁹Ne so' me sí tiha' yu'unj man tuvi' ní' nij yuvií israelitá, ne tucuxru' so' man xii ní' nij yuvií israelitá yo' a. Dan me se ca'ne' so' suun se vaa quiril'ij nii man ta'níi nij yuvií israelitá ne'ej leé no xe', che'é rej caví' ta'níi nij so' a. ²⁰Ne maan tió dan me se ca'ngaa sí cu'naj Moisés, ne caran' rá Diose ni'yaj so' man Moisés, ne rque va'nuj yavii tucuachij rej so' ga nii so' man so' tucua' rej so' a. ²¹Gaa ne caxríj yuve roj so' man ne'ej cu'naj Moisés xe' yo'ó rej yaníj, gaa ne dan me se nacaj ma'an ta'nij chana Faraón man ne'ej cu'naj Moisés yo', ne tucuachij no' man so' ase 'yá' ga ta'níi ma'án' qui'yaj no' a. ²²Gaa ne tucu'yón nii nu' se-nana nij sí man Egiptó nana cuu man sí cu'naj Moisés, ne sca' a'mii so' ne sca' 'yaj suun so' a.

²³”Dan me se quisíj sí cu'naj Moisés vij chihaa yo', gaa ne guun rá so' ca'anj ni'yaj so' daj ran' nij tuvi' so' nij yuvií israelitá a. ²⁴Ne dan me se quene'en so' se vaa tucuxru' yo'o sí man yo'óo Egiptó man 'o sí israelitá a. Che'é dan guun rá sí cu'naj Moisés yo' nayon cuentá che'é tuvi' so' sí israelitá, ne che'é dan go' so' man sí man yo'óo Egiptó yo' a. ²⁵Gaa ne guun rá sí cu'naj Moisés se vaa xcaj nij tuvi' so' sí israelitá cuentá se vaa Diose racuíj man so' tīnanii so' man nij so' rihaan nij sí man Egiptó, tzaj ne ne xcaj nij so' cuentá ma'.

²⁶”Dan me se yo'ó güii me se cuchi' so' rej man nij yuvií israelitá,

ne dan me se vij tuvi' nij so' cunu', ne guun rá so' na'mii sa' uún roj so', ne che'é dan cataj so': “Tinuuj. Me che'é unu' roj tinuj roj soj ga”, taj so' rihaan roj so' a. ²⁷Ne sí tucuxru' man tuvi' ro', tiguíj ra'a so' man Moisés, ne cataj so': “Taj vaj sí cune' mán so' guun chij so' rihaan núj ne ca'ne' so' cacun' che'é núj ma'. ²⁸Ne nihánj me se guun rá so' ticaví' so' manj, ndaa vaa ticaví' so' man sí man yo'óo Egiptó quii na'”, taj sí tucuxru' man tuvi' rihaan sí cu'naj Moisés yo' a. ²⁹Gaa ne che'é se xcaj sí cu'naj Moisés cuentá se vaa cha'nuu ndo'o nana se vaa ticavi' so' man 'o sí man yo'óo Egiptó, gaa ne che'é dan cunánj so', ne ca'anj so' cayáan so' rej cu'naj Madián a. Ne xcaj so' chana, ne ca'ngaa vij ta'níi so' snó'o cunii a.

³⁰”Dan me se cachén vij chihaa yo', gaa ne rej tacaan nichrun' quij cu'naj Sinaí me se quene'en so' 'o coj aco' ya'an raa, ne curuvi' yo'o se-mozó Diose rque ya'an yo' quene'en so' a. ³¹Ne ca'anj rá Moisés gaa quene'en so' rasuun ya'anj yo', ne guun rá so' quinichrun' so' rihaan coj yo' ni'yaj so' man yo', tzaj ne cuno so' ca'mii sí 'nij ra'a man ní', ³²ne dan me se cataj sí 'nij ra'a man ní': “Unj ro', me Diose noco' nij xií so' gaa naá a. Dan me se Diose noco' sí cu'naj Abraham do', sí cu'naj Isaac do', sí cu'naj Jacob do', mé 'unj á”, taj Diose sí 'nij ra'a man ní' cuno Moisés a. Gaa ne cuchu'vi' Moisés ne quiril'ij man so', ne ne quisij rá so' ni'yaj so' coj aco' ya'an raa yo' a. ³³Gaa ne cataj sí 'nij ra'a

man ní' rihaan so' a: “Quiríi so' canj 'nij tacóo so' á. 'O se yo'óó nicun' so' cuano ro', me yo'óó guēē ndo'o adonj. ³⁴Dan me se ni'yaj 'unj, ne quene'én 'unj sayuun ran' nij yuvií noco' manj rej Egiptó, ne cunoj daj rnúj nij so' che'é sayuun ran' nij so', ne nihánj me se nanij 'unj che'é se me raj tinanii 'unj man nij so' rihaan sayuun ran' nij so' a. Che'é dan cuvā' so', ne ca'nej 'unj mán so' rej Egiptó á”, taj síi 'nij ra'a man ní' rihaan Moisés a.

³⁵”Dan me se xa' Moisés, tzaj ne so' me síi quirí'íj yaníj nij yuvií israelitá man gaa cataj nij so' se vaa taj vaj síi cune' man so' guun chij so' rihaan nij so' ne ca'ne' so' cacun' che'é nij so' ma'. Tzaj ne so' me síi ca'née ma'an Diose se vaa guun chij so' rihaan nij yuvií israelitá ne quiríi so' man nij yuvií israelitá rej guun nij so' mozó rihaan yo'ó yuvií a. Danj qui'yaj Diose ga Moisés gaa quene'en Moisés se-mozó Diose yo' rque coj aco' ya'an raa yo' a. ³⁶Dan me se curihanj nij yuvií israelitá rej cu'naj Egiptó, qui'yaj Moisés, ne qui'yaj ndo'o so' suun sa' noco Egiptó do', rej naj na ya'anj cu'naj Na Ya'anj Maree do', rej tacaan vaj nij so' víj chihāa yo' do' a.

³⁷Ne ma'an Moisés yo' me síi cataj rihaan nij síi israelitá: “Vaa güii, ne yo'o tuvi' soj ro', guun síi nata' se-nānā Diose, qui'yaj Diose, ne ase vaa 'yáá 'unj ro', danj qui'yaj so' uún a”, taj Moisés rihaan nij yuvií israelitá a.

³⁸”Ne Moisés me síi vaj ga cunudanj nij yuvií israelitá rej tacaan, ne cachée so' ga se-mozó Diose síi ca'mii rihaan so' rej

tacaan nichrun' quij cu'naj Sinaí, ne cachée so' ga nij xii ní' uún, ne so' me síi nata' Diose se-nānā Diose nānā nucuaj rihaan, che'é rej tacuachén so' nānā yo' ndāa rihaan ní' a. ³⁹Tzaj ne ne ca'vej rá nij xii ní' cunō nij so' rihaan Moisés ma'. 'O se tanáj xco nij so' se-nānā so', ne guun inanj rá nij so' qui'yaj nij so' ndāa vaa 'yaj nij so' rej Egiptó a. ⁴⁰Dan me se cataj nij xii ní' rihaan síi cu'naj Aarón, ne: “Qui'yáá so' ya'anj canoco' ní', gaa ne quitaj yaan ya'anj yo' rihaan ní' cachee ní' á. 'O se xa' Moisés síi qui'yaj curihanj ní' rej cu'naj Egiptó, tzaj ne ne ne'en uxrá núj daj quiran' so' a ma'”, taj nij yuvií rihaan Aarón a. ⁴¹Ne güii dan me se qui'yaj nij yuvií israelitá 'o scúj le'ej, ne guun yo' ya'anj noco' nij so', ne rque ndo'o nij so' rasuun rihaan ya'anj yo', gaa ne guun nihā' rá nij so' ni'yaj nij so' ya'anj qui'yaj ma'an nij so' a.

⁴²”Che'é dan guun yaníj Diose rihaan nij yuvií israelitá, ne ca'née ra'a Diose man nij so' na'vij nij so' rihaan nij rasuun vaa rej xtā', ne dan me se na'víj nij so' rihaan güii do', rihaan yavii do', rihaan nij yati' do' a. Dan me se danj inanj taj nānā nō rihaan yanj qui'yaj nij síi nata' se-nānā Diose gaa naá, ne nānā yo' taj: “Taj vaj rasuun rque nij soj sij israelitá rihanj gaa vaj soj rej tacaan víj chihāa yo' ma'. Taj vaj xcuu cacaa rihanj, qui'yaj soj ma'. ⁴³Tananj catā soj ve' mantā nuu ya'anj cu'naj Moloc, ne catā soj yati' chraan, ne guun yo' ya'anj cu'naj Renfán rihaan soj nanj adonj. Dan me se ya'anj qui'yaj ma'an soj na'vij soj rihaan me roj ya'anj yo', ne

che'é dan nonaj rej cane soj, ne rej xco chuman' Babilonia cayáan soj, qui'yáj adonj", taj Diose rihaan nij xii ní' a.

⁴⁴"Dan me se nicaj xii ní' nuvií mantá, ne ve' nata' ma'an Diose nana rihaan nij xii ní' gaa vaj nij so' rej tacaan me ve' yo' a. Ne nuvií mantá yo' ro', qui'yaj Moisés man yo' ndaa vaa cataj xna'anj Diose rihaan so' a. Dan me se ase vaa nuvií mantá tihaan Diose rihaan Moisés, danj vaa qui'yaj so' a. ⁴⁵Ne ca'anj nicaj nij xii ní' ga síí cu'naj Josué man nuvií mantá yo' ndaa to'óo yuvií yaníj, ne dan me se quirii yaníj Diose man nij yuvií yaníj rihaan to'óo nij so', ne catúj nij xii ní', qui'yaj Diose a. Ne nuvií mantá yo' me rej quina'víj nij xii ní' rihaan Diose ndaa se cayáan síí cu'naj David síí nicaj suun rey a.

⁴⁶"Ne David ro', guun niha' rá Diose ni'yaj Diose man so', ne cachíín ni'yaj so' rihaan Diose se vaa ca'vej rá Diose cuné' so' nuvií nocoo rej na'víj nii rihaan ta'anj síí cu'naj Jacob a. ⁴⁷Ne síí cu'naj Salomón me síí cuné' nuvií yo' a. ⁴⁸Tzaj ne nuveé sij ne rá ve' une' yuvií me Diose síí 'nij ra'a nu' chumií ma'. 'O se cataj xna'anj síí nata' se-nana Diose se vaa ma'an Diose cataj: ⁴⁹"Rej xta' ro', me chruun xlá sa' táa 'unj, ne yo'óo ro', me rej taj tacój adonj. Che'é dan taj che'é cuné' nij soj ve' cané 'unj ma', taj síí 'nij ra'a man ní', ne taj uún so': Taj rej qui'yaj soj naraan rá 'unj ma'. ⁵⁰'O se ma'anj ra'aj qui'yáj nu' nij rasuun nihánj adonj", taj ma'an Diose a.

⁵¹"Dan me se nichraj ndo'o rá soj, ne nuveé sij niha' rá xcaj

cuentá che'é tucuaán sa' me soj ma'. Tananj niganj anó tuvi' soj ga Nimán Diose adonj. Ase vaa qui'yaj xii soj ro', danj 'yaj guee ma'an soj uún nanj á. ⁵²Dan me se canoco' xii soj man cunudanj nij síí nata' se-nana Diose, ne guun rá nij so' qui'yaj nij so' sayuun man nij so', ne ndaa ticavi' nij so' man nij síí nata' che'é síí sa' ca'nej Diose rihaan chumií nihánj tinanii man yuvií rihaan sayuun ei. Ne síí sa' yo' me se guun nij soj síí tacuachén man so' rihaan nij síí taj ri'yunj man ní', ne ndaa ticavi' nij soj man so' vaa ei. ⁵³Dan me se soj me síí guun rá se vaa se-tucuanj Diose ro', me nana cataj xna'anj nij se-mozó Diose rihaan soj, tzaj ne ne uno soj nana yo' ma' —taj síí cu'naj Esteban rihaan nij síí uun chij rihaan nij yuvií israelitá a.

**Nana nihánj taj xna'anj daj
qui'yaj nii gaa ticavi' nii
man síí cu'naj Esteban a**

⁵⁴Dan me se gaa cuno nij síí uun chij rihaan nij yuvií israelitá nana vaa danj, gaa ne cuyanj rá nij so', ne ndaa chá ruj ma'an nij so' tu'va nij so' ni'yaj nij so' man Esteban a. ⁵⁵Tzaj ne Esteban ro', caraa ndo'o Nimán Diose nimán so', ne dan me se ni'yaj so' rej xta', ne quene'en so' rej ve'é ndo'o vaa rej nicun' Diose, ne quene'en so' se vaa nicun' Jesucristó rej x'núú Diose rej nuva' Diose a. ⁵⁶Gaa ne cataj síí cu'naj Esteban a:

—Nihánj me se nax'núj rej xta' ni'yaj 'unj, ne ne'én 'unj man síí ca'néé Diose nicaj yu'unj man yuvií se vaa nicun' so' rej x'núú Diose rej

nuva! Diose á —taj so' no nij síi uun chij a.

⁵⁷Gaa ne nucuaj ndo'o caguáj nij so', ne caráán ra'a nij so' xrée nij so', che'é rej ne ca'vej daj chihaa mǐj rá nij so' cunǝ nij so' a doj se-nana Esteban a ma'. Gaa ne cunánj cunudanǝ nij so' ndaa rej nicun' Esteban, ne quita'aa cunudanǝ nij so' man so', ⁵⁸ne quirii nij so' man Esteban rque chuman' Jerusalén yo', ne guun che'e nij so' go' nij so' yahij man Esteban a. Dan me se nij síi caraa cacun' xráá Esteban me se cuchruj nij so' sagan' nij so' rihaan yo'óó rej nicun' 'o síi tachruu cu'naj Saulo a. ⁵⁹Gaa ne go' ndo'o nij so' yahij man Esteban, ne cachíin ni'yaj so' rihaan Jesucristó, ne cataj so':

—Nihánj me se nacaj so' nimanj, Jesucristó Síi Chij —taj so', cachíin ni'yaj so' rihaan Jesucristó a.

⁶⁰Gaa ne canicun' ruj so', ne nucuaj ndo'o caguáj so', cataj so':

—Se caraá so' cacun' nihánj xráá nij so', man Síi Chij —taj so', gaa ne cavi' so' a.

8 Ne síi cu'naj Saulo yo' ro', cunaj quiran' Esteban rá so' a.

Nana nihánj taj xna'anǝ che'é sayuun qui'yaj síi cu'naj Saulo man nij yuviǝ cuchumán rá ni'yaj man Jesucristó a

Ne güii dan me se guun che'e nii qui'yaj ndo'o nii sayuun man nij síi cuchumán rá ni'yaj man Jesucristó síi ne chuman' Jerusalén a. Dan me se cunánj nij so' chuman' Jerusalén, ne ca'anǝ nij so' ndaa nu' estadó Judea do', estadó cu'naj Samaria do' a. Tzaj ne orún' ma'an nij apóstol cune' Jesucristó man nata' se-nana so' ro', me nij síi yo'o

quináj chuman' Jerusalén a. ²Ne dan me se ta'aj nij síi sa' nimán cacin' man Esteban, ne ta'vee uxrá nij so' che'é se vaa cavi' so' a. ³Tzaj ne síi cu'naj Saulo me se síi taj ri'yunj man nij síi cuchumán rá ni'yaj man Jesucristó me so', ne ticavi' so' man nij síi noco' man Jesucristó a. Dan me se cuchíi so' ve' ne 'o 'o nij síi noco' man Jesucristó, ne quita'aa so' man nij so', ne dan me se nu' snó'o nu' chana nu' quita'aa so', ne caxrǝj so' taga' man nij so' a.

Nana nihánj taj xna'anǝ se vaa cuchíi se-nana Diose chuman' cu'naj Samaria a

⁴Dan me se nij síi cunánj me se chée ndo'o nij so' nata' nij so' se-nana Diose nana sa' rihaan yuviǝ a. ⁵Ne síi cu'naj Felipé ca'anǝ chuman' Samaria, ne ca'mii natáj so' se-nana Jesucristó rihaan nij yuviǝ man chuman' yo' a. ⁶Gaa ne cuno nij síi man chuman' Samaria se-nana Felipé, ne quene'en nij so' nij suun sa' nocoó qui'yaj so', ne che'é dan guun niha' ndo'o rá cunudanǝ nij so' cunǝ nij so' se-nana Felipé a. ⁷Dan me se que'ee nij nana chree curihanǝ nimán yuviǝ, qui'yaj so', ne nucuaj caguáj nij nana chree yo' gaa curihanǝ nij yo' a. Ne quihuun que'ee nij síi ran' do', que'ee nij síi rengo do', ⁸ne che'é dan guun niha' uxrá rá nij síi ne chuman' Samaria yo' a.

⁹Ne dan me se gaa ataa cuchíi Felipé chuman' Samaria, ne vaa 'o snó'o cu'naj Simón chuman' yo', ne Simón me se qui'yaj chruun ndo'o so', ne ca'anǝ rá nij síi ne Samaria,

qui'yaj so' a. Ne cataj so' rihaan nij yuvii se vaa síi sa' uxrá me ma'an so', ¹⁰ne cunudañj nij yuvii caráya'anj uxrá se vaa qui'yaj so', ne dan me se nu' nij síi noco' do', nu' nij síi uun chij do', cataj se vaa me so' síi ata' ndo'o rej nucuañj, qui'yaj ma'an Diose, taj nij so', ni'yaj nij so' man Simón a. ¹¹Dan me se sa' ndo'o nanó xrej nij yuvii daj taj so', che'é se sa' ndo'o qui'yaj chruun so', ne ca'anj rá nij so', qui'yaj Simón a. ¹²Dan me se gaa nata' Felipé se-nana Diose nana sa' che'é suun uun chij Diose rihaan chumii nihánj do', nana che'é Jesucristó do', ne cuchumán rá nij yuvii nana yo', ne cata' ne snó'o do', chana do', che'é Jesucristó a. ¹³Ne ndaa ma'an Simón cuchumán rá nana yo', ne cata' ne so', ne canoco' so' xcó Felipé, ne ca'anj rá ma'an so' uún gaa quene'en so' nij suun sa' nocoo qui'yaj suun Felipé a.

¹⁴Dan me se cuchi' nana rihaan nij apóstol síi cune! Jesucristó man nata' se-nana so' síi ne chuman' Jerusalén se vaa cuchumán rá nij síi man chuman' Samaria se-nana Diose, ne che'é dan ca'néé nij so' man Pedró do', man Juan do', se vaa cuchi' roj so' rihaan nij síi ne chuman' Samaria, ¹⁵ne dan me se cuchi' roj so', gaa ne cachíin ni'yaj roj so' rihaan Diose che'é nij síi cuchumán rá ni'yaj man Jesucristó yanj chuman' Samaria se vaa catuu Nimán Diose nimán nij so' qui'yaj Diose a. ¹⁶O se ataa catuu Nimán Diose nimán nij so' a. Maan se tihaj cata' ne uun nij so' che'é Jesucristó sij 'nij ra'a man ní' a. ¹⁷Dan me se cuta' ra'a Pedró

ga Juan raá nij síi cuchumán rá ni'yaj man Jesucristó yanj chuman' Samaria, gaa ne catúñ Nimán Diose nimán nij so' a.

¹⁸Dan me se quene'en síi chruun cu'naj Simón se vaa gaa cuta' ra'a Pedró ga Juan raá yuvii, ne catúñ Nimán Diose nimán nij yuvii yo', ne che'é dan rquee so' sa'anj rihaan roj so', ¹⁹ne cataj so':

—Rque 'unñ sa'anj man roj soj, ne rque roj soj rej nucuañ nicaj roj soj mán 'unñ, ne me ma'an 'o síi cuta' 'unñ ra'aj raá, ne ca'vee catuu Nimán Diose nimán nij so', qui'yaj roj soj á —taj so' rihaan roj so' a.

²⁰Gaa ne cataj Pedró rihaan so' a: —Tadó so' se cacaa so' rihaan ya'an ga se-sa'anj so' á. Me che'é guun rá so' se vaa ane' se rqué uun Diose ga. ²¹Daj chihaa mój se ca'vee qui'yáá so' danj ma'. Ne vaa nice a doj nimán so' rihaan Diose a man adonj. ²²Vaa che'é canicaj nimán so' tanáj so' tucuaán chi'ii noco' so' nihánj, gaa ne cachinñ ni'yáá so' rihaan Diose síi 'nij ra'a man ní' sese ca'vee caraá x'naa so' ndaa vaa guun rá so' á. ²³O se cuano nihánj me se xcañ 'unñ cuentá se vaa vaa chi'ii nu' nimán so' ei —taj Pedró rihaan Simón yo' a.

²⁴Gaa ne cataj Simón: —Cachinñ ni'yaj roj soj rihaan Diose síi 'nij ra'a man ní' che'é 'unñ se gaa nanñ quirán' 'unñ a doj se vaa cataj roj soj ruguanñ —taj so' rihaan roj so' a.

²⁵Dan me se nata' ndo'o roj so' se-nana Diose síi 'nij ra'a man ní', gaa ne quinan' roj so' chuman' Jerusalén, ne nata' roj so' se-nana Diose nana sa' rque que'ee chuman' naj estadó cu'naj Samaria a.

Nana nihánj taj xna'anj se vaa
 cuchumán rá 'o síí eunuco
 cavii rej cu'naj Etiopía ni'yaj
 so' man Jesucristó a

²⁶Gaa ne ca'mii yo'q se-mozó
 Diose rihaan síí cu'naj Felipé, cataj
 so':

—Cavii so', ca'anj so' rej sur ndaa
 chrej avii chuman' Jerusalén 'anj
 ndaa chuman' Gaza á —taj se-mozó
 Diose rihaan Felipé a.

Dan me se chrej vaj rej tacaan
 inanaj me chrej yo' a.

²⁷Dan me se cavii Felipé, ca'anj so',
 ne gaa vaj so' chrej yo', ne quene'en
 so' 'o síí eunuco cavii yo'óo cu'naj
 Etiopía, ne síí nuu rihaan chana
 reiná cu'naj Candace uun chij rihaan
 nu' yo'óo Etiopía me síí eunuco yo' a.
 Ne síí tumé nu' se-sa'anj chana reiná
 yo' me so' a. Dan me se aj ca'anj so'
 chuman' Jerusalén na'vij so' rihaan
 Diose, ²⁸ne nihánj me se nan' so'
 chiháán so', ne táá so' cuchri' nucuaj
 cuayó, ne nayaa so' nana cachrón síí
 cu'naj Isaías síí nata' se-nana Diose
 gaa naá rihaan yanj a. ²⁹Gaa ne dan
 me se cataj Nimán Diose rihaan
 Felipé a:

—Cuchi' so' rihaan cuchri' nucuaj
 cuayó 'na' nihánj, ne cachee so' rej
 x'núú cuchri' yo' á —taj Nimán
 Diose rihaan Felipé a.

³⁰Dan me se cunanj Felipé rej
 x'núú cuchri', gaa ne cuno so' se
 vaa nayaa síí taj cuchri' se-nana síí
 cu'naj Isaías síí nata' se-nana Diose
 gaa naá a. Ne xná'anj Felipé man
 so', cataj Felipé:

—Ne ya uxrá unó so' nana nayaa
 so' na' —taj Felipé, xná'anj so' man
 síí eunuco yo' a.

³¹—'O se asa' ca'vee cunoj nana
 nihánj rá so', ne nuvi' síí tucuyón
 nana nihánj manj ga —taj síí
 eunuco yo' rihaan Felipé, gaa ne
 canacúún síí eunuco man Felipé se
 vaa cavii Felipé cuchri' ne quitaj so'
 rej x'núú síí eunuco yo' a.

³²Dan me se nana nayaa síí
 eunuco yo' ro', me nana nihánj
 a: “Ase vaa dínj tu'va matzinj gaa
 uchi' xo' rihaan síí ticavi' man xo'
 do', ase vaa dínj tu'va matzinj le'ej
 gaa uchi' xo' rihaan síí caca cachij
 xráá xo' do', danj qui'yaj so', ne a
 doj nana ne ca'mii so' ma'. ³³Dan
 me se caxrij na'aj ndo'o nii man so',
 ne maan che'é se naqui'yaj nica' so'
 nimán so', ne taj ca'ne' sa' cacun'
 che'é so' ma'. Tzaj ne a doj yuvii
 se guun nucuaj cataj xna'anj che'é
 cunudanj nij síí noco' xna'anj tuv'
 ga so', che'é se ne xna'anj so' a ma'.
 'O se ne vaj so' rihaan chumii nihánj
 cuano ma'”, taj se-nana síí cu'naj
 Isaías nana nayaa síí eunuco yo' a.

³⁴Dan me se xná'anj síí eunuco yo'
 man Felipé, cataj so':

—Me síí me síí quiran' nu' ndaa
 vaa taj xna'anj síí nata' se-nana
 Diose nihánj ga. Ma'an síí nata'
 se-nana Diose quiran' danj na'.
 Yo'ó so' xa' —taj síí eunuco, xná'anj
 so' man Felipé a.

³⁵Gaa ne guun che'e Felipé cataj
 xna'anj so' daj taj ma'an nana yo' nana
 nayaa síí eunuco yo', gaa ne nata' so'
 nu' se-nana Jesucristó nana sa' rihaan
 síí eunuco yo' a. ³⁶Dan me se gaa vaj
 roj so' chrej, ne cuchi' roj so' rej nuu
 doj na, gaa ne cataj síí eunuco:

—Ni'yaj so' ei. Nihánj me nuu
 na á. Ne ca'vee cata' ne 'unj na' —
 taj so', xná'anj so' man Felipé a.

³⁷Gaa ne cataj Felipé rihaan so' a:
—Sese ya ya amán rá so' ni'yaj so'
man Jesucristó, ne ca'vee a —taj
Felipé rihaan so' a.

Gaa ne cataj síi eunuco rihaan
Felipé a:

—Amán rá 'unj se vaa ta'níi Diose
me Jesucristó ei —taj so' rihaan
Felipé a.

³⁸Gaa ne ca'ne' síi eunuco suun se
vaa canicun' cuchri', gaa ne nanij
roj so' rihaan yo'óó, gaa ne ca'anj
roj so' rej nuu na, gaa ne cuta' ne
Felipé man síi eunuco yo' a. ³⁹Dan
me se gaa curihanj roj so' rá na,
gaa ne naxcaj Nimán Diose man
Felipé, ne ne quene'en uún síi
eunuco yo' man Felipé a ma'. 'O se
cavii síi eunuco yo', quinan' so', ne
guun niha' rá so' a. ⁴⁰Ne Felipé me
se aj nuú so' chuman' Azoto a. Gaa
ne nu' nij chuman' naj rej vaj so'
ro', nata' so' se-nana Diose nana sa'
rihaan nij síi ne nu' nij chuman' yo',
ne danj qui'yaj so' ndaa se cuchí' so'
chuman' Cesarea a.

**Nana nihánj taj xna'anj daj
quiran' síi cu'naj Saulo gaa canicaj
nimán so' qui'yaj Jesucristó a**

9 Dan me se síi cu'naj Saulo
me se 'o guun rá so' qui'yaj
so' sayuun man nij síi noco' se-nana
Diose sij 'nij ra'a man ní' ne ndaa
guun rá so' cavi' nij so', ne che'é
dan canoco' uxrá so' man nij síi
noco' man Jesucristó a. Ne ca'anj
so' rej ne xrej ata suun nocoo doj,
²ne naxcaj so' yanj actá rihaan
xrej, ne yanj actá yo' ro', ca'anj
chuman' Damasco rihaan nij síi 'nij
ra'a ve' tucu'yón nij yuvií israelitá
se-tucuñj Moisés a. Ne taj xna'anj

yanj yo' rihaan nij so' se vaa sese
nari' Saulo man nij síi noco' man
Jesucristó, ne se snó'o se chana se
no xcúun so' numíj so' man nij
so' ne ca'anj nicaj so' man nij so'
ndaa chuman' Jerusalén caxrii so'
man nij so' taga' a. ³Dan me se
nicaj Saulo yanj, ne vaj so' chrej, ne
quinichrun' so' chuman' Damasco
yo', ne taj ni'yón cuchuguun nu' xta'
nu' anicaj rej nicun' so' a. ⁴Gaa ne
quinij so' rihaan yo'óó, ne dan me
se cuno Saulo se vaa cataj yo'o so'
rihaan so':

—Cunó so' ca'mij, Saulo. Me che'é
'yáá so' sayuun manj ga —taj nana
cuno Saulo a.

⁵Gaa ne xná'anj Saulo man síi
ca'mii rihaan so', cataj so':

—Síi Chij, me síi mé so' ga —taj
so', xná'anj so' a.

Gaa ne síi ca'mii rihaan so' cataj:
—'Unj ro', me Jesús, ne 'yaj ndo'o
so' sayuun manj adonj. ⁶Tzaj ne
naxagaa so' ca'anj so' ndaa chuman'
Damasco, gaa ne cataj nii rihaan
so' daj qui'yáá so' a —taj Jesucristó
rihaan Saulo a.

⁷Ne nij snó'o vaj chrej ga Saulo
me se canicun' nij so', ne a doj nana
ne ca'mii nij so' a ma'. Ne cuno
nij so' nana yo', tzaj ne taj a 'ó
rasuun ne quene'en nij so' a ma'.

⁸Ne Saulo me se naxumaan so', ne
nuxra' so' rihaan so', tzaj ne taj
se qui'yá' quene'en so' ma'. Yuun
che'e caráán rihaan so' nanj adonj.
Gaa ne quita'aa yo'óó nij so' ra'a so',
ne racuíj nij so' man Saulo chéé
Saulo, ne ca'anj nij so' chuman'
Damasco a. ⁹Ne quisíj va'núj güii
ne ca'vee quene'en so' ma'. Ne ne
cha so' ne ne co'o so' na a ma'.

¹⁰Dan me se chuman' Damasco ro', yáán 'o sí tucu'yón se-nānā Jesucristó, ne Ananías cu'naj so' a. Ne naqui'yaa Diose sij 'nij ra'a man ní' rihaan so', ne cataj so' a:

—Cunó so' ca'mij, Ananías —taj Diose sij 'nij ra'a man ní' no so' a.

—Nihánj né 'unj unó 'unj a'mii so' á —taj Ananías rihaan Diose sij 'nij ra'a man ní' a.

¹¹Gaa ne cataj Diose sij 'nij ra'a man ní' rihaan Ananías a:

—Canicun' cayá so' ca'anj so' callé cu'naj Callé Nica, ne cuchi' so' ve' tucua' sí cu'naj Judas, ne nano' so' 'o sí cu'naj Saulo sí cavii chuman' Tarso á. 'O se cuano nihánj me se achíin ni'yaj so' rihanj, ¹²ne dan me se gaa cachíin ni'yaj so' ne naqui'yaa 'o sí cu'naj Ananías rihaan so', qui'yáj adonj. Ne catúj Ananías yo' rihaan so', ne cuta' ra'a so' raā Saulo, che'é rej ca'vee curuvi' uún rihaan so' qui'yáj a —taj Diose sij 'nij ra'a man ní' rihaan Ananías a.

¹³Gaa ne cataj Ananías rihaan Diose sij 'nij ra'a man ní' a:

—Tzaj ne aj cataj xna'anj ndo'o nii rihanj che'é sí nihánj, Sí Chij. 'O se aj qui'yaj chi'ii ndo'o so' man nij sí sa' noco' mán so' nij sí yanj chuman' Jerusalén, ¹⁴ne nihánj me se veé danj nicaj so' yanj actá che'é rej nūmíj so' man cunudanj núj sij achíin ni'yaj rihaan so', qui'yaj nij xrej atā suun nocoj doj adonj —taj Ananías a.

¹⁵Gaa ne cataj Diose sij 'nij ra'a man ní' rihaan so' a:

—Ca'anj so' cuaj ei. 'O se aj narii 'unj man so' qui'yaj suun so' rihanj, ne xcaj nij sí yaníj do', nij sí nicaj

suun rey do', ma'an nij sí israelitá do', cuentá che'é 'unj, qui'yaj so' adonj. ¹⁶'O se 'unj me sí cataj xna'anj rihaan so' che'é nu' sayuun no xcúun so' quiran' so', che'é yan nata' so' rihaan yuvií che'ej adonj —taj Diose sij 'nij ra'a man ní' rihaan Ananías a.

¹⁷Dan me se ca'anj Ananías, ne catúj so' rá ve' yo', ne cuta' ra'a so' raā Saulo, ne cataj so':

—Diose sij 'nij ra'a man ní' ca'née manj ca'naj rihaan so' nihánj, tinuj. Ne so' ro', me Jesucristó sí quene'én so' gaa vaj so' chrej gaa ca'ná' so' nihánj ei. Ne me rá so' curuvi' uún rihaan so' ne catuu ndo'o Nimán Diose nimán so' ei —taj Ananías rihaan so' a.

¹⁸Nu' ca'mii so' danj, ne nu' cayuu 'o rasuun rihaan Saulo, ne ase vaa 'o nuj catun' ro', danj vaa se cayuu rihaan so', ne curuvi' rihaan Saulo, ne canicun' caya so', ne cata' ne so' a. ¹⁹Ne chá so' chraa, ne nari' nucuaj rá so' a.

Nanā nihánj taj xna'anj se vaa ca'mii natáj Saulo se-nānā Jesucristó chuman' Damasco a

Dan me se cayáan Saulo doj güii ga nij sí tucu'yón se-nānā Jesucristó yanj chuman' Damasco, ²⁰ne nu' ca'anj so' nij ve' tucu'yón nij yuvií israelitá se-tucuanj Moisés, ne ca'mii natáj so' rihaan nij so' se vaa Jesucristó ro', ta'níi ya Diose me so' a.

²¹Ne cunudanj nij sí cuno se-nānā Saulo ro', caráya'anj ndo'o nij so' se-nānā so', ne cataj nij so':

—Tzaj ne nuveé sij nihánj me sí taj ri'yunj man nij sí yanj chuman'

Jerusalén achíin ni'yaj rihaan Jesucristó, ne ca'na' so' ndaa nihánj che'é rej me rá so' numíj so' man nij so' ne ca'anj nicaj so' man nij so' rihaan nij xrej ata suun nocoo doj, rá so' na' —taj nij síi cuno se-nana Saulo rihaan tuvi' nij so' a.

²²Tzaj ne doj a nucuaj nata' so' se-nana Jesucristó rihaan nij yuvii israelitá yanj chuman' Damasco, ne ve'é tihaan so' rihaan nij so' se vaa Jesucristó me síi ca'née Diose tinanii man yuvii rihaan sayuun, ne ndaa cunuu dínj tu'va nij so', qui'yaj so' a.

Nana nihánj taj xna'anj se vaa quinanii Saulo rihaan nij yuvii israelitá guun rá ticavi' man so' a

²³Dan me se cachén que'ee güiii, gaa ne cavii raa nij yuvii israelitá daj qui'yaj nij so' ne ca'vee ticavi' nij so' man Saulo a. ²⁴Tzaj ne xcaj Saulo cuentá daj guun rá nij so' qui'yaj nij so' man so', ne dan me se nuvii nigan' tumé ndo'o nij yuvii israelitá ta'yaa chingá yahij taj rej atúj yuvii chuman' yo', che'é rej me rá nij so' nari' nij so' man Saulo ne ticavi' nij so' man Saulo, rá nij so' a. ²⁵Che'é dan nij síi tucu'yón se-nana Saulo ro', ca'née nij so' man Saulo rá 'o scaa xij, ne rej nii tacuachén nij so' man Saulo rque ta'yaa le'ej taj chingá yahij aráan tu'va chuman', ne tananij nij so' man Saulo rihaan yo'óo xe', ne dan me se quinanii so' a.

Nana nihánj taj xna'anj se vaa ve'é ca'mii nij síi tucu'yón se-nana Jesucristó yanj chuman' Jerusalén ga Saulo a

²⁶Dan me se cuchi' Saulo chuman' Jerusalén, ne guun rá so'

cunuu chre' so' ga nij síi tucu'yón se-nana Jesucristó, tzaj ne cuchu'vi' cunudanj nij so' ni'yaj nij so' man Saulo a. 'O se ne cuchuman rá nij so' ni'yaj nij so' se-nana Saulo se vaa sij tucu'yón se-nana Jesucristó me so' a. ²⁷Che'é dan nicaj síi cu'naj Bernabé man so', ca'anj so' rihaan ma'an nij apóstol cune' Jesucristó man nata' se-nana so', ne nata' Bernabé rihaan nij so' daj guun gaa quene'en Saulo man Jesucristó sij 'nij ra'a man ní' gaa vaj so' chrej ne ca'mii so' ga Jesucristó sij 'nij ra'a man ní', ne nata' uún Bernabé daj qui'yaj Saulo chuman' Damasco gaa ca'mii natáj so', ne ne cuchu'vi' so' a doj ca'mii natáj so' rihaan nij yuvii che'é Jesucristó, taj Bernabé a.

²⁸Dan me se guun che'e nij so' ve'é ca'mii nij so' ga Saulo, ne 'o vaj so' ga nij so' a. Ne ca'mii natáj so' se-nana Jesucristó síi 'nij ra'a man ní' rihaan nij síi man chuman' Jerusalén, ne a doj ne cuchu'vi' so', ne nucuaj ca'mii natáj so' rihaan nij yuvii a. ²⁹Dan me se ca'mii so' ga nij síi israelitá a'mii xna'ánj griego, ne canó tuvi' nij so' ga so' a. Tzaj ne nij so' ro', guun rá ticavi' man so' a. ³⁰Dan me se xcaj nij tinuj nij síi nocoo man Jesucristó cuentá se vaa guun rá yo'óo nij síi israelitá ticavi' nij so' man Saulo, ne che'é dan ca'anj nicaj nij so' man Saulo ndaa chuman' Cesarea, gaa ne ca'née nij so' man so' ndaa chuman' Tarso a.

³¹Veé dan me se dínj yaán cunudanj nij síi cuchuman rá ni'yaj man Jesucristó yanj nu' estadó Judea do', Galilea do', Samaria do' a. Dan me se caráj cochroj ndo'o nij so' rihaan Diose sij 'nij

ra'la man ní', ne che'é dan ve'é
doj nari' nij so' canoco' nij so'
se-tucuanj so' a. Ne Nimán Diose
tucu'yón man nij so' daj qui'yaj nij
so', ne che'é dan guun rij ndo'o nij
so' doj a.

**Nana nihánj taj xna'anj se
vaa quinahuun sa' sí cu'naj
Eneas, qui'yaj Jesucristó, gaa
ca'mii Pedró ga so' a**

³²Dan me se chéé sí cu'naj Pedró
nu' rej ne nij sí sa' noco' man Diose,
ne dan me se cuchí' so' ndaa rihaan
tinúú nij so' ne chuman' Lida, ³³ne
chuman' Lida ro', nari' so' 'o sí
cu'naj Eneas, ne so' me se aj quisíj
tunj ya yo' yo'oj naj so' rihaan
yuvée, ne 'o sí taj se 'yá' cachee
me so', ³⁴ne dan me se cataj Pedró
rihaan so':

—Cuanō nihánj me se nahuun sa'
so', 'yaj Jesucristó, Eneas. Naxagaa
so' cuaj, ne nacue so' tuvée so' cuaj
ei —taj Pedró rihaan so', ne nu'
ca'mii Pedró danj, ne nu' naxumaan
caya so' canicun' so' a.

³⁵Gaa ne quene'en cunudanj nij
sí yanj chuman' Lida do', nij sí
yanj taa cu'naj Sarón do', ndaa vaa
nahuun sa' sí cu'naj Eneas yo', gaa
ne che'é dan canicaj nimán nij so'
canoco' nij so' man Diose sij 'nij
ra'la man ní' a.

**Nana nihánj taj xna'anj se vaa
cunuu i'na' uún chana cu'naj
Dorcas, qui'yaj Pedró a**

³⁶Dan me se chuman' Jope yáán 'o
chana tucu'yón se-nana Jesucristó,
ne Tabita cu'naj no' xna'ánj hebreo,
ne Dorcas me se-chuvii no' xna'ánj
griego a. Ne chana qui'yaj inanj

se sa' me no', ne rque ndo'o no'
rasuun man nij sí nique, ³⁷ne güii
dan me se canó chí'ii man no', ne
quiran' ndo'o no', ne cavi' no' a. Ne
tucuaane nii man no', ne cuchruj nii
man no' rque ve' nata', ³⁸ne dan
me se nichrun' naj chuman' Lida
ga chuman' Jope, ne cuchí' nana
rihaan nij sí tucu'yón se-nana
Jesucristó yanj chuman' Jope se
vaa vaj Pedró chuman' Lida yo',
ne che'é dan ca'née nij so' man vij
snó'o cuchí' roj so' rihaan Pedró a.
Dan me se cuchí' roj so' rihaan
Pedró, ne cataj roj so':

—Se guun raan so' cuchí' so'
rihaan núj sij yanj chuman' Jope
ma' —taj roj so' rihaan Pedró a.

³⁹Gaa ne naxumaan Pedró, ne
ca'anj so' cuaj ga roj so' a. Ne gaa
cuchí' nij so' chuman' Jope, ne
ca'anj nicaj nij so' man Pedró rá
ve' nata' naj chana cavi' cu'naj
Dorcas, ne ca'na' cunudanj nij chana
cavi' nica rihaan Pedró, ne ta'vee
nij no', ne tihaan nij chana rihaan
Pedró cunudanj nij yatzíj qui'yaj
Dorcas gaa vaa i'na' no' a. ⁴⁰Dan
me se quirii Pedró man cunudanj
nij no' xe', gaa ne canicun' ruj so',
ne cachíín ni'yaj ndo'o so' rihaan
Diose a. Gaa ne canicaj so', cataj so'
rihaan cúú man chana a:

—Naxagaa so', Tabita —taj so'
rihaan no' a.

Gaa ne naxra' rihaan no', ne gaa
quene'en no' man Pedró, ne ca'anj
cane caya no', ⁴¹ne quita'aa Pedró
ra'la no', ne naxumaan no', qui'yaj
so' a. Gaa ne canacúún so' ca'na'
nij chana cavi' nica do', yo'oj nij sí
sa' noco' man Diose do', ne tihaan
so' man ní' cu'naj Dorcas rihaan

nij so' se vaa cunuu i'na' uún no' a.

⁴²Dan me se cuchí' nana che'é Dorcas rihaan cunudanj nij síí ne chuman' Jope, ne che'é dan que'ee nij síí man Jope cuchumán rá ni'yaj man Diose sij 'nij ra'a man ní' a.

⁴³Dan me se guun raan Pedró que'ee güii chuman' Jope, ne dan me se tucua' 'o síí cu'naj Simón caran' so' que'ee güii, ne síí naqui'yaj laruu nuj xcuu me Simón yo' a.

**Nana nihánj taj xna'anj se vaa
cuchi' se-nana Jesucristó rihaan
nij tuví' síí yaníj cu'naj Cornelio a**

10 Dan me se yáan 'o síí cu'naj Cornelio chuman' Cesarea, ne síí 'nij ra'a 'o ta'aj x'ne' tanuu cu'naj italiano me so' a. Dan me se nuveé sij israelitá me so', maan se sij yaníj me so', ²ne sij ve'é ndo'o nocó' man Diose me so', ne aráj cochroj ndo'o so' rihaan Diose, ne ase vaa 'yaj so' ro', danj 'yaj nij tucua' so' uún a. Ne rqué ndo'o so' caridad rihaan nij yuvií, ne niganj cachíín ni'yaj so' rihaan Diose a. ³Dan me se aga' va'núj rej ca'anj güii ta' asuun me se naqui'yaa ranga' yo'o se-mozó Diose rihaan so', ne catúj se-mozó Diose yo' rej nicun' so', ne cataj se-mozó Diose: —Cornelio —taj se-mozó Diose no so' a.

⁴Gaa ne ni'yaj uxrá Cornelio man se-mozó Diose yo', ne kuchu'vi' ndo'o so', ne cataj so':

—Me che'é nacúún so' manj, ga —taj so', xna'anj so' man se-mozó Diose yo' a.

Gaa ne cataj se-mozó Diose rihaan so' a:

—Aj xcaj Diose cuentá che'é nana achíín ni'yáá so' rihaan Diose, ne

aj xcaj Diose cuentá che'é caridad 'yáá so' a. Che'é dan nuu rá Diose mán so' a. ⁵Ne nihánj me se ca'ne'j so' snó'o ca'anj chuman' Jope, ne nacunj nij so' ca'na' 'o síí cu'naj Simón Pedró nihánj á. ⁶Ne so' me se aran' so' ve' tucua' yo'ó síí cu'naj Simón síí naqui'yaj laruu nuj xcuu síí ne tu'va na ya'anj a —taj se-mozó Diose rihaan Cornelio a.

⁷Dan me se ca'anj uún se-mozó Diose yo', gaa ne canacúún Cornelio ca'na' víj se-mozó ma'an so' do', yo'o tanuu nocó' man Diose ga so' do', ⁸ne ca'na' va'núj nij so', ne cataj xna'anj so' rihaan nij so' se vaa cataj se-mozó Diose rihaan so', gaa ne ca'née so' man nij so' ca'anj nij so' chuman' Jope nano' nij so' man síí cu'naj Simón Pedró a.

⁹Ne yo'ó güii me se vaj va'núj nij so' chrej, ne maan orá quinichrun' nij so' chuman' Jope me se cavii Pedró xráá ve' caran' so', cachinj ni'yaj so' rihaan Diose, ne caxuj me yo', ¹⁰ne dan me se quina'aaan rque so', ne guun rá so' chá so' chraa a. Ne tihaj 'yaj chuvii nij síí man rá ve' chá so', ne maan orá dan naqui'yaa 'o rasuun rihaan Pedró a. ¹¹Dan me se quene'en so' se vaa naxra' rej xtá', ne nanij yo'o rasuun rihaan yo'óó, ne ase vaa 'o yatzíj mantá caxra' ndo'o vaa yo', ne vaa ca'anj scúj yatzíj mantá yo' a. ¹²Ne nuu cunudanj nij xcuu vaa ca'anj tacóó do', nij xcuu nucuaj rií man do', nij xtáj do', yo'ó nij xcuu vaa tachrií xráá do', nuu rque yatzíj mantá yo' a. ¹³Gaa ne cuno Pedró nana ca'mii yo'o so' rihaan so' a:

—Naxumaan so', Pedró. Ticaví' so' man nij xcuu yo', ne chá so' nee á —taj nana yo' cuno Pedró a.

¹⁴Gaa ne cataj Pedró:

—Se guun ma'. Daj chihaa mǐj se guun quǐ'yáj danj, man Sǐ́ Chij. 'O se nuveé xcuu chá me yo' rihaan núj sij israelitá ma'. Maan se xcuu vaa chi'ii me nij xo' rihaan núj nanj á. 'O se nu' ca'na' a doj ne cha 'unj nee xcuu vaa danj a ma' —taj Pedró a.

¹⁵Gaa ne ca'mii uún sǐ́ ca'mii rihaan Pedró, cataj so':

—Ne sese Diose me sǐ́ cataj se vaa cunuu sa' 'o rasuun, ne se guun cataj so' se vaa chi'ii vaa rasuun yo' rihaan so' ma' —taj uún so' rihaan Pedró a.

¹⁶Gaa ne dan me se quisǐj va'núj cuno Pedró nana vaa danj nana ca'mii Diose rihaan so', gaa ne nu' cavii uún nu' yatzǐj mantá man xcuu yo' rej xta' a.

¹⁷Dan me se quinanó ndo'o rá Pedró che'é rasuun naquiyaa rihaan so', ne maan orá dan nari' nij snó'o ca'née sǐ́ cu'naj Cornelió ve' tucua Simón, ne dan me se canicun' nij so' ta'yaa rihaan ve' yo', ¹⁸ne canacúun nij so', xná'anj nij so' sese aran' 'o sǐ́ cu'naj Simón Pedró ve' yo' a. ¹⁹Dan me se Pedró ro', nuchruj raá che'é nij rasuun naquiyaa rihaan so', ne dan me se cataj Nimán Diose rihaan so':

—Nihánj me se ca'na' va'núj snó'o nano' mán so', ²⁰ne cuaj naxumaan so', nanij so', ne ca'anj so' ga nij so' á. Ne se guun vij rá so', ne se cataj so' se vaa ne nó xcúun so' ca'anj so' ga nij so' ma'. 'O se 'unj nihánj me sǐ́ ca'née man nij so' ca'na' nij so' adonj —taj Nimán Diose rihaan Pedró a.

²¹Gaa ne nanij Pedró ndaa rej nicun' va'núj nij snó'o, ne cataj so' rihaan nij so':

—'Unj nihánj me sǐ́ nano' nij soj ei. Ne me che'é ca'na' soj nihánj ga —taj Pedró, xná'anj so' man nij so' a.

²²Gaa ne cataj nij so':

—Ca'mii 'o se-mozó Diose mozó guee rihaan 'o sǐ́ cu'naj Cornelió, ne so' ro', me sǐ́ 'nij ra'a 'o ta'aj x'ne' tanuu, ne cunudanj nij yuvij israelitá taj se vaa sǐ́ vaa nica nimán me so' ne sǐ́ aráj cochroj ndo'o rihaan Diose me uún so', ne dan me se cataj xna'anj se-mozó Diose rihaan so' se vaa nacunj so' mán so' cuchǐ' so' ve' tucua so' ne cuno so' nana nata' so' rihaan so' a —taj nij so' rihaan Pedró a.

²³Che'é dan cataj Pedró se vaa catuu nij so' rá ve', ne ve'é ca'mii so' ga nij so' a. Ne ranga' yo'ó güii me se naxagaa nij so', ne ca'anj Pedró ga ya'núj nij so', ne ca'anj doj nij tinuj nij sǐ́ cuchumán rá ni'yaj man Jesucristó yanj chuman' Jope do', ga Pedró a. ²⁴Ne yo'ó güii uún me se catúj nij so' chuman' Cesarea, ne sǐ́ cu'naj Cornelió me se na'vij ndo'o so' ca'na' nij so', ne aj canacúun so' man nij tuvi' so' do', man nij sǐ́ ca'mii sa' ga so' do', se vaa cunu chre' nij so' rá ve' tucua so' a.

²⁵Dan me se gaa guun rá Pedró catuu Pedró rá ve', ne nari' tuvi' Cornelió ga so', ne canicun' ruj Cornelió rihaan Pedró, ne caráj guee Cornelió rihaan so' a. ²⁶Tzaj ne cataj Pedró rihaan Cornelió:

—Naxumaan so' ei. Taj che'é caraa guee so' rihanj ma'. 'O cuyaan

yuvij uun me ní nanj á —taj Pedró rihaan Cornelió a.

²⁷Dan me se nanó Pedró cuentó ga Cornelió, ne catúj Pedró rá ve', gaa ne quene'en so' se vaa aj nuu chre' que'ee yuvij rá ve' yo' a. ²⁸Gaa ne cataj Pedró rihaan nij yuvij:

—Aj ne'en nij soj se-tucuanj núj sij israelitá se vaa ne nó xcúún núj catuu núj rej man soj sij yanj, ne ne nó xcúún núj cunuu chre' núj ga soj ma'. Tzaj ne Diose tihaan rihaan ma'anj se vaa se ca'vee cataj 'unj se vaa nij vaa ta'aj yuvij rihaan so' ma'. ²⁹Che'é dan gaa canacúún Cornelió nihánj manj, ne ne cataj 'unj se vaa se ca'anj 'unj ma'. Tananj ca'ná' 'unj cuaj nanj ei. Ne nihánj me se cataj xna'anj nij soj rihanj daj me che'é canacúún nij soj manj ca'naj ei —taj Pedró rihaan nij tuví' Cornelió a.

³⁰Gaa ne cataj Cornelió rihaan so':

—Cachén ca'anj güii ne maan orá nihánj me ta' asuun, ne aga' va'núj me yo', ne cachíin nī'yáá 'unj rihaan Diose rá ve' tucuj, ne taj ni'yón naqui'yaa 'o snó'o nicun' rihanj, ne yatzíj catzii chuguun ma'an nuú so', ³¹ne cataj so' rihanj a: “Cunó so' ca'mij, Cornelio. Aj cuno Diose nana achíin nī'yáá so' rihaan so', ne Diose me síí nuu rá se vaa rqué ndo'o so' caridad rihaan nij síí nique, ³²ne dan me se ca'nej so' nana ndaa chuman' Jope, ne canacunj so' ca'na' 'o síí cu'naj Simón Pedró nihánj á. Ne so' ro', aran' ve' tucua' 'o síí cu'naj Simón síí naqui'yaj laruu nuj xcuu síí ne tu'va na ya'anj a”, taj snó'o yo' rihanj adonj. ³³Che'é dan me

ra'yanj ca'née 'unj nana rihaan so', ne so' ro', qui'yaj ndo'o se luj che'é núj se vaa ca'ná' so' rihaan núj nihánj ne che'é dan me mán taran' núj rihaan Diose nihánj cuano, che'é rej me rá núj cuno núj nu' nana cataj xna'anj Diose síí 'nij ra'a man ní' rihaan so' ei —taj Cornelió rihaan Pedró a.

³⁴Gaa ne guun che'e Pedró ca'mii so' rihaan nij so' a:

—Ndaa yaj me se xcaj 'unj cuentá se vaa ya 'o cuyaan vaa cunudanj yuvij rihaan Diose á. ³⁵Ne síí yanj me ma'an chuman' síí aráj cochroj rihaan Diose ne noco' tucuaán sa' ro', ca'vee nacaj Diose man so' adonj. ³⁶Aj ne'en nij soj nana sa' ca'née Diose rihaan núj sij israelitá se vaa ve'é nacaj Diose man núj che'é se vaa qui'yaj Jesucristó che'é núj, ne Jesucristó ro', me síí 'nij ra'a man cunudanj yuvij adonj.

³⁷Dan me se nana yo' ro', me nana cuchi' nu' chuman' chiháan núj sij israelitá, ne dan me se gaa quisíj ca'mii natáj síí cu'naj Juan se vaa no xcúún yuvij cata' ne yuvij, ne guun che'e Jesucristó nata' so' se-nana so' rihaan núj sij man estadó Galilea, ³⁸ne nana yo' ro', me se-nana Jesucristó síí cavii chuman' Nazaret ei. Ne nana yo' taj se vaa cune' Diose man so' qui'yaj suun so' rihaan Diose, ne rqué ndo'o Diose Nimán Diose man so', ne rqué ndo'o Diose rej nucaj man so', ne dan me se cachée Jesucristó, ne qui'yaj suun ndo'o so' suun sa', ne cunudanj nij síí ran' sayuun 'yaj síí chree che'é se quirii ta'nga' síí chree rihaan nij so' ro', quinahuun sa' nij so', qui'yaj Jesucristó a. 'O

se Dioso ro', racuŷj ndo'o man Jesucristó 'yaj so' danj adonj.

³⁹”Ne ma'an núj me síf quene'en nu' se vaa qui'yaj so' gaa vaj so' nu' rej ne núj sij israelitá do', ndaa ma'an chuman' Jerusalén do' ei. Ne dan me se cachrón nii man so' rihaan rcutze, ne cavi' so', qui'yaj nii ei. ⁴⁰Gaa ne quisij va'núj güii cavi' so', gaa ne cunuu i'na' uún so', qui'yaj Dioso, ne curuvi' so' rihaan núj, qui'yaj uún Dioso adonj. ⁴¹Dan me se ne curuvi' so' rihaan cunudanj nij yuvií ma'. Tananj curuvi' so' rihaan núj sij aj narii Dioso nata' rihaan yuvií daj vaa so', ne núj me síf chá chraa ne co'lo na ga so' gaa cunuu i'na' uún so' gaa cavi' so' adonj. ⁴²Gaa ne ca'ne' so' suun rihaan núj ca'mii natáj núj rihaan nij yuvií ne nata' núj nana se vaa ma'an so' me síf cune' Dioso ca'ne' cacun' che'é nij yuvií vaa i'na' do', che'é nij yuvií cavi' do' adonj. ⁴³Ne cunudanj nij síf nata' se-nana Dioso gaa naá ro', cataj xna'anj nij so' che'é so', ne cataj nij so' se vaa caraa x'naa Dioso ni'yaj Dioso cunudanj nij síf amán rá ni'yaj man Jesucristó a —taj Pedró rihaan nij tuvi' Cornelió a.

⁴⁴Dan me se ataa a doj quisij ca'mii Pedró nu' se-nana so', gaa ne catúj ndo'o Nimán Dioso nimán cunudanj nij síf cuno nana yo' a. ⁴⁵Gaa ne nij síf israelitá cuchumán rá ni'yaj man Jesucristó ca'na' ga Pedró ro', caráya'anj nij so' se vaa qui'yaj Dioso se luj che'é nij yuvií yaníj ne ndaa nimán nij yuvií yaníj catúj Nimán Dioso, qui'yaj Dioso a. ⁴⁶Q se cuno nij so' se vaa ca'mii nij tuvi' Cornelió xna'ánj naca, cataj

nij so' se vaa sa' uxrá vaa Dioso á. Gaa ne cataj Pedró rihaan tuvi' ma'an so':

⁴⁷—Nihánj me se ve'é nacaj Nimán Dioso man síf nihánj ndaa vaa nacaj so' man ma'an ní' adonj. Se ca'vee caráan ní' chrej rihaan nij so' cata' ne nij so' ma' —taj Pedró rihaan nij tuvi' so' a.

⁴⁸Gaa ne ca'ne' Pedró suun rihaan nij so' se vaa cata' ne nij so', che'é se sij nocó' man Jesucristó me nij so' a. Danj qui'yaj nij so', gaa ne cachíin ni'yaj nij so' rihaan Pedró se vaa guun raan so' que'ee doj güii ga nij so' a.

Nana nihánj taj xna'anj daj guun rá nij síf israelitá cuchumán rá ni'yaj man Jesucristó ga cuno nij so' nana se vaa cuchumán rá nij síf yaníj ni'yaj nij so' man Jesucristó a

11 Dan me se cuno nij síf cune' Jesucristó man nata' se-nana so' cuno yo'ó nij tinuj nij síf cuchumán rá ni'yaj man Jesucristó yanj estadó Judea cuno nana se vaa ndaa nij síf yaníj canoco' se-nana Dioso a. ²Ne gaa cavii Pedró ca'anj so' chuman' Jerusalén, ne nij síf israelitá cuchumán rá ni'yaj man Jesucristó ro', cuta' cacun' xraá so', ³cataj nij so':

—Me che'é catúj so' rá ve' tucua síf yaníj ga. Me che'é chá so' chraa ga nij so' ga —taj nij so' rihaan Pedró a.

⁴Gaa ne guun che'e Pedró cataj xna'anj nica so' rihaan nij so' daj me che'é qui'yaj so' danj a. Dan me se cataj so':

⁵—Chuman' Jope vaj 'unj, ne cachíin ni'yáá 'unj rihaan Dioso,

ne dan me se naquiyaa 'o rasuun rihanj, qui'yaj Diose a. Ne dan me se nanij 'o rasuun, ne ase vaa 'o yatzij mantá caxra' vaa rasuun yo', ne vaa ca'anj scúj yatzij yo' a. Ne cavii yatzij yo' rej xta', ne quinaniy yo' rej nicun' 'unj a. ⁶Dan me se ni'yaj uxraj yatzij yo', ne quene'enj se vaa man cunudanj nij xcuu vaa ca'anj tacóo do', ndaa xcuu quij do', xcuu nucuaj rij man do', xtâj do', nu' xcuu vaa tachrij xrâá do', man rque yatzij yo' a. ⁷Gaa ne cunó 'unj se vaa ca'mii yo'o so' rihanj, cataj so': "Naxumaan so', Pedró. Ticaví' so' man nij xcuu yo', cha so' á", taj so' cunoj a. ⁸Gaa ne cataj 'unj: "Daj chihaa mij se guun qui'yaj danj, man Síf Chij. 'O se nuveé xcuu chá me nij xo' rihaan núj sij israelitá ma'. Maan xcuu vaa chi'ii me nij xo' rihaan núj nanj á. Nu' ca'na' me se ne catuu nee xcuu vaa danj tu'vaj ma'", cataj 'unj rihaan síí ca'mii rihanj a. ⁹Gaa ne ca'mii uún so' rihanj, cataj so': "Ne sese Diose me síí cataj se vaa cunuu sa' 'o rasuun, ne se guun cataj so' se vaa chi'ii vaa rasuun yo' rihaan so' ma'", cataj so' rihanj a. ¹⁰Dan me se quisij va'núj ca'mii so' nana vaa danj rihanj, gaa ne cavii uún nu' rasuun yo' rej xta', ca'anj yo' a.

¹¹"Ne nu' cavii rasuun yo' rej xta', ne nu' cuchi' va'núj snó'o rihaan ve' carán' 'unj, ne nij síí ca'née 'o síí ne chuman' Cesarea me va'núj nij so', nano' nij so' manj a. ¹²Gaa ne cataj xna'anj Nimán Diose rihanj se vaa ca'anj 'unj ga nij so', ne se guun rá 'unj se vaa yuviij nij doj rihaan ní' sij israelitá me nij so', taj Nimán Diose rihanj a. Che'é

dan ca'anj 'unj ga va'núj nij so', ne vatan' tinúú ní' síí nihánj ro', me síí ca'anj ga 'unj a. Gaa ne catúj núj rá ve' tucúa síí canacúún manj, ¹³gaa ne nata' síí ne ve' yo' rihaan 'unj se vaa aj quene'en so' 'o se-mozó Diose rá ve' tucúa so', ne dan me se curuvi' se-mozó Diose yo' rihaan so', ne cataj se-mozó Diose yo' rihaan so': "Ca'nej so' nana chuman' Jope rihaan 'o síí cu'naj Simón Pedró, ne nacunj so' man so' ca'na' so' nihánj rihaan so' á. ¹⁴Ne so' me síí nata' nana rihaan so', ne sese cunó nu' nij tucua soj nana yo', ne ca'vee quinanii taran' soj rihaan sayuun adonj", taj se-mozó Diose rihaan síí ne ve' yo', taj so' rihanj nanj á.

¹⁵"Dan me se guun che'ej nataj se-nana Jesucristó rihaan nij so', gaa ne catúj Nimán Diose nimán nij so' ndaa vaa catúj Nimán Diose nimán ma'an ní' gaa asino yaan nanj ei. ¹⁶Gaa ne ninuj rá 'unj se-nana Diose sij 'nij ra'a man ní' gaa cataj so': "Juan ro', na uun cata' ne so' man yuviij, tzaj ne xa' soj, tzaj ne Diose cuta' ne nimán soj ga ma'an Nimán Diose nanj adonj", taj síí 'nij ra'a man ní' a. ¹⁷Dan me se cuyaan vaa se luj qui'yaj Diose che'é ma'an ní' sij amán rá ni'yaj man Jesucristó sij 'nij ra'a man ní' nanj adonj. Ne sese Diose me síí guun rá qui'yaj danj, ne asa' ca'vee caráán 'unj chrej rihaan Diose se vaa se qui'yaj so' se vaa me rá so' qui'yaj so', rá soj ga —taj Pedró rihaan nij síí israelitá cuchumán rá ni'yaj man Jesucristó a.

¹⁸Dan me se qui'yaj canaan se-nana Pedró rihaan se-nana yo'ó nij so', gaa ne cataj nij so' se vaa sa'

uxrá qui'yaj Diose a. Ne cataj uún nij so':

—Che'é dan me ndaa nij síf yaníj canicaj nimán canoco' chrej sa', qui'yaj Diose, ne che'é dan cayáán nij síf yaníj rihaan Diose nu' cavii nu' ca'anj adonj —taj cunudanj nij síf israelitá a.

Nana nihánj taj xna'anj che'é nij síf cuchumán rá ni'yaj man Jesucristó yanj chuman' Antioquía a

¹⁹Dan me se che'é se-nana síf cu'naj Esteban me se qui'yaj ndo'o nii sayuun man nij síf israelitá cuchumán rá ni'yaj man Jesucristó a. Che'é dan tanáj nij so' ca'anj nij so' ndaa estadó cu'naj Fenicia do', ndaa yo'óo taj rihaan na ya'anj cu'naj Chipre do', ndaa chuman' Antioquía do' a. Tzaj ne inanj rihaan nij yuvií israelitá nata' nij so' se-nana Jesucristó, ne ne ca'mii nij so' ga nij síf yaníj ma'. ²⁰Tzaj ne doj tuvi' nij so' me síf cavii Chipre do', estadó Cirene do', ne nij so' ro', ca'anj chuman' Antioquía, ne ndaa rihaan nij síf yaníj síf a'mii xna'ánj griego nata' nij so' nana sa' se-nana Jesucristó sij 'nij ra'a man ní' a. ²¹Ne racuíj ndo'o Diose sij 'nij ra'a man ní' man nij síf nata' se-nana so', ne que'ee nij síf yaníj yo' cuchumán rá cuno nana sa' yo', ne canoco' nij so' man Jesucristó sij 'nij ra'a man ní' a.

²²Dan me se cuchi' nana rihaan nij síf cuchumán rá ni'yaj man Jesucristó yanj chuman' Jerusalén se vaa cuchumán rá nij síf yaníj yanj chuman' Antioquía ni'yaj nij so' man Jesucristó a. Che'é

dan ca'née nij so' man síf cu'naj Bernabé cuchi' so' chuman' Antioquía a. ²³Dan me se cuchi' so', gaa ne quene'en so' se vaa qui'yaj ndo'o Diose se luj ga nij síf yaníj yo', ne guun niha' uxrá rá so', ne narqué so' chrej sa' rihaan nij síf yaníj yo' se vaa ca'nej nimán nij so' yo'o canoco' raan nij so' man Diose sij 'nij ra'a man ní' a. ²⁴Q se síf vaa sa' nimán me síf cu'naj Bernabé yo', ne nuu ndo'o Nimán Diose nimán so', ne síf nucuaj ndo'o rá man Diose me uún so' a. Gaa ne dan me se guun rii doj yuvií canoco' man síf 'nij ra'a man ní', ²⁵ne ca'anj Bernabé chuman' Tarso, nano' so' man síf cu'naj Saulo, ²⁶ne nari' Bernabé man Saulo, gaa ne nicaj Bernabé man Saulo ca'na' so' chuman' Antioquía a. Ne dan me se 'o yo' ro', yáán roj so' ga nij síf cuchumán rá ni'yaj man Jesucristó yanj chuman' Antioquía, ne tucu'yón roj so' se-nana Diose man que'ee ndo'o nij yuvií man yo' a. Ne nij síf man chuman' Antioquía me nij síf guun che'e tucu'náj "cristiano" man nij síf tucu'yón se-nana Jesucristó a. 'Q se nana "cristiano" me rá cataj nij síf chée stucuajj Cristo a.

²⁷Ne güii yo' me se cavii doj síf nata' se-nana Diose chuman' Jerusalén, ne ca'anj nij so' chuman' Antioquía a. ²⁸Ne canicun' yo'o tuvi' nij síf nata' se-nana Diose yo', ne síf cu'naj Agabo me so' a. Ne nata' so' nana rqué Nimán Diose rihaan so' se vaa vaa güii, ne cachén x'naa nu' chuman' naj rihaan chumií a. Ne gaa cayáán síf cu'naj Claudio síf nicaj suun emperador, ne cachén ya x'naa ndaa vaa cataj

síí cu'naj Agabo a. ²⁹Dan me se nij síí tucu'yón se-nānā Jesucristó ro', gaa cuno nij so' se-nānā síí cu'naj Agabo, ne nuchruj raa 'o 'o nij so' se vaa me daj sa'anj rque so' man tinúú nij so' síí yanj estadó Judea ne raçuíj man nij so' a. Ne síí ru'vee doj rqué nocoo doj sa'anj, ne síí nique doj ro', rqué doj sa'anj a. ³⁰Gaa ne go' nij so' sa'anj yo' man Bernabé gā Saulo, caxrii roj so' ston nij síí uun chij rihaan nij síí cuchumán rá ni'yaj man Jesucristó yanj chuman' Jerusalén a.

Nanā nihánj taj xna'anj daj guun
gaa tinanii Diose man Pedró
rihaan síí cu'naj Herodes a

12 Dan me se güii dan me se guun rá síí nicaj suun rey cu'naj Herodes qui'yaj chi'ii so' man nij síí cuchumán rá ni'yaj man Jesucristó a. Che'é dan ca'ne' so' suun rihaan tanuu quita'aa nij tanuu man ta'aj nij so' a. ²Ne raa neé espadá ticavi' tanuu man síí cu'naj Jacobo tinúú síí cu'naj Juan, qui'yaj Herodes a. ³Dan me se xcaj Herodes cuentá se vaa guun niha' rá nij yuvií israelitá se vaa cavi' Jacobo, ne che'é dan quita'aa nij tanuu man Pedró, qui'yaj uún so' a. Gaa canuú cha'anj nanuj rá nij síí israelitá güii nu' curihañj xií nij so' yo'óó Egipto gaa naá me qui'yaj Herodes danj a. ⁴Dan me se caxrij nij tanuu taga' man Pedró, ne ca'ne' Herodes suun rihaan xnu' yaan tanuu se vaa cutumé nij tanuu man Pedró, ne ca'anj ya x'ne' me nij tanuu yo' a. 'O se guun rá Herodes se vaa ndaa cachén cha'anj pascuá, gaa ne quirii so' man Pedró

ne tijaan so' man Pedró rihaan nij yuvií israelitá, rá so' a. ⁵Dan me se Pedró ro', 'nij so' taga' rej cutumé nij tanuu man so', tzaj ne nucuaj ndo'o cachíín ni'yaj nij síí cuchumán rá ni'yaj man Jesucristó rihaan Diose che'é so' a.

⁶Dan me se rej nii me yo', ne a'yuj me güii quirii Herodes man Pedró taga' rihaan nij yuvií a. Dan me se otoj Pedró naj so' rá taga', ne naj so' sca'núj vij tanuu, ne vij aga' ne' numii so' naj so' a. Ne nicun' yavij tanuu tumé ta'yaa taga' a. ⁷Ne dan me se curuvi' yo'o se-mozó Diose rá ve' naj Pedró, ne chuguun ndo'o rá ve' yo' a. Gaa ne go' se-mozó Diose x'núú Pedró, ne cataj so':

—'O naxagaa so' cuaj, Pedró —taj so' rihaan Pedró a.

Dan me se naxagaa Pedró, ne aga' ne' numii ra'a so' ro', naxra' yo', ne quinij yo' rihaan yo'óó a. ⁸Gaa ne cataj se-mozó Diose rihaan Pedró a:

—Naqui'yaj raan so' catuún so', ne caxrii so' canj tacóó so' á —taj se-mozó Diose rihaan so', ne qui'yaj Pedró ndaa vaa cataj se-mozó Diose rihaan so' a.

Gaa ne cataj uún se-mozó Diose a: —Niquee so' rotó so', ne canocó so' manj á —taj uún se-mozó Diose rihaan so' a.

⁹Dan me se canoco' Pedró man se-mozó Diose, ne curihañj so' taga', tzaj ne ne quene'en so' sese ya curihañj so' taga' qui'yaj se-mozó Diose yo' ma'. 'O se maan se qui'yaj ma'an rihaan so' qui'yaj Diose nu' se vaa qui'yaj se-mozó Diose yo', rá so' a. ¹⁰Dan me se cachén roj so' vij rej nicun' tanuu tumé ta'yaa, gaa ne cuchi' roj so' ta'yaa aga' taga'

yo', ne rej xco ta'yaa yo' ro', naj ma'an chuman' a. Gaa ne quix'núj ma'an ta'yaa yo', ne curihanj roj so', ne cachén roj so' 'o scúj callé, gaa ne ca'anj ni'ya se-mozó Diose yo' rihaan Pedró a. ¹¹Dan me se caxrúj rá Pedró se vaa ya curihanj so' taga', gaa ne cataj so':

—Ndaa yaj guun ya ya raj se vaa Diose sij 'nij ra'a mán 'unj ro', ya ca'née so' man se-mozó so', ne tinanii so' mán 'unj rihaan sí cu'naj Herodes, ne nihánj me se se quirán' 'unj ndaa vaa me rá nij yuvií israelitá quirán' 'unj yaj a ma' —taj Pedró a.

¹²Dan me se quisíj guun ya ya rá so', gaa ne ca'anj so' ve' tucúa chana cu'naj Mariá nii sí cu'naj Juan Marcos a. Ne ve' yo' me rej aj nuu chre' que'ee nij sí cuchumán rá ni'yaj man Jesucristó, ne achíín ni'yaj nij so' rihaan Diose a. ¹³Dan me se cuchi' Pedró tica'mii so' ta'yaa chingá nuu rihaan ve', gaa ne ca'na' 'o mozó chana cu'naj Rode ta'yaa xcaj no' cuentá me sí ca'na' a. ¹⁴Gaa ne cunuú yaan Rode se-nana Pedró a. Tzaj ne che'é se guun niha' ndo'o rá no', gaa ne che'é dan ne ca'nuu no' ta'yaa ma'. Maan se cunánj no' catúj no' rá ve', ne nata' no' rihaan yo'ó nij yuvií se vaa nicun' Pedró ta'yaa a. ¹⁵Tzaj ne nij sí man rá ve' taj rihaan no':

—Snúú so' á —taj ta'aj nij so' rihaan no' a.

Tzaj ne taj se qui'yá' ca'ne' rá no' a. 'Q se yo'ó cataj no' se vaa ya nicun' Pedró ta'yaa a. Gaa ne cataj yo'ó nij so' rihaan no':

—Nanj se-mozó Diose tumé man Pedró me sí nicun' rihaan ta'yaa nanj á —taj yo'ó nij so' rihaan no' a.

¹⁶Ne Pedró ro', yo'ó nicun' so' xe' tica'mii so' ta'yaa a. Gaa ne ca'na' nij so', ne ca'núj nij so', ne quene'en nij so' man Pedró, gaa ne ca'anj ndo'o rá nij so' ni'yaj nij so' man Pedró a. ¹⁷Gaa ne naxcaj Pedró ra'a Pedró, che'é se guun rá so' gaa dínj tu'va nij so' a. Gaa ne cataj xna'anj so' rihaan nij so' nu' se vaa qui'yaj Diose sij 'nij ra'a man ní' gaa tinanii so' man Pedro taga' a. Gaa ne cataj so':

—Cataj xna'anj nij soj rihaan tinú' Jacobo ga yo'ó nij tinúú ní' daj quiranj á —taj so' a.

Gaa ne cavii so' ca'anj so' yo'ó rej yaníj a.

¹⁸Dan me se gaa quisíj güii, ne quinanó ndo'o rá nij tanuu nicun' taga', che'é se ne quene'en uxrá nij so' me rej vaj Pedró a ma'. ¹⁹Gaa ne ca'ne' Herodes suun rihaan tanuu ca'na' Pedró rihaan so' qui'yaj tanuu, tzaj ne ne ca'vee nari' nij tanuu man Pedró ma'. Che'é dan xná'anj Herodes man nij tanuu tumé man Pedró me rej ca'anj Pedró, tzaj ne ne quene'en nij so' a ma'. Che'é dan ca'ne' Herodes suun se vaa ticavi' nii man nij tanuu tumé man Pedró, gaa ne curihanj Herodes estadó Judea, ca'anj so' chuman' Cesarea, cayáán so' a.

Nana nihánj taj xna'anj se vaa cavi' Herodes, qui'yaj xlúú chá nee man so' a

²⁰Dan me se ca'maan rá sí cu'naj Herodes ni'yaj so' man nij sí man chuman' Tiro do', chuman' Sidón do', ne che'é dan ca'na' cunudanj nij so' rej ne Herodes, ne ca'mii nij so' ga sí cu'naj Blasto sí tumé nu' ve'

tucúá Herodes, ne dan me se ca'vej rá síí cu'naj Blasto raçuíj so' man nij so' cunuú rcua'aan nij so' ga Herodes, che'é se caxrj yuve nij so' doj sa'anj ston Blasto a. 'O se nucuaj rá nij so' man Herodes se vaa cuchí' se chá avii rej uun chij so' ndaa chiháán nij so' chá nij so' a. ²¹Ne güiii cachrón Blasto ca'mii nij so' ga Herodes me se nanuú Herodes yatzij nuu síí nicaj suun rey, ne táá so' chruun xlá sa', ne ca'mii natáj ndo'o so' rihaan nij síí man Tiro do', man Sidón do' a. ²²Gaa ne caguáj cunudanij nij so', cataj nij so':

—Nuveé se-nana yuvii me nana avii raá síí nihánj a ma'. 'O se se-nana ya'anj avii tu'va so' nanj á —taj nij yuvii, ni'yaj nij yuvii man Herodes a.

²³Gaa ne cuaj caxrj 'o se-mozó Diose chí'ij man Herodes, che'é se ne cataj so' se vaa grún' Diose me síí 'yaj avii raá so' a. Maan se ca'vej rá so' cataj nij yuvii se vaa ya'anj me ma'an so' a. Gaa ne dan me se cunu' nee man so' chá xluú, ne cavi' so', qui'yaj xluú a.

²⁴Tzaj ne se-nana Diose me se ra'yanj achij yo' ne naxna'anj yo' cuaj cuaj a. Ne uun rií ndo'o doj nij yuvii canoco' nana yo' a. ²⁵Ne Bernabé ga Saulo me se quisj roj so', ne caxrj roj so' sa'anj ston nij síí uun chij rihaan nij síí cuchumán rá ni'yaj man Jesucristó yanj chuman' Jerusalén, ne canicaj roj so', ca'anj roj so' chuman' Antioquía, ne ca'anj síí cu'naj Juan Marcos ga roj so', qui'yaj roj so' a.

Nana nihánj taj xna'anj se vaa cune' nii man síí cu'naj Bernabé do', man síí cu'naj Saulo do', ca'anj nata' roj so' se-nana Diose rihaan yuvii a

13

Dan me se chuman' Antioquía ro', ta'aj nij síí

cuchumán rá ni'yaj man Jesucristó me síí nata' se-nana Diose, ne yo'ó ta'aj nij so' me síí tucu'yón se-nana Diose rihaan yuvii a. Ne síí cu'naj Bernabé do', síí cu'naj Simón Negro do', síí cu'naj Lucio síí cavii estadó Cirene do', síí cu'naj Manaén síí cachij tucúá síí cu'naj Herodes do', síí cu'naj Saulo do', me nij síí cataj roj suun sa' yo' a. ²Dan me se na'víj nij so' rihaan Diose sij 'nij ra'a man ní, ne toco' nij so' x'naa man ma'an nij so' che'é se aráj guee nij so' rihaan Diose, ne dan me se cataj Nimán Diose rihaan nij so' a:

—Cune' nij soj man síí cu'naj Bernabé ga síí cu'naj Saulo se vaa qui'yaj suun roj so' rihanj ndaa vaa cataj xna'anj 'unj rihaan roj so' á —taj Nimán Diose rihaan nij so' a.

³Gaa ne toco' nij so' x'naa man ma'an nij so', ne cachíín ni'yaj ndo'o nij so' rihaan Diose, gaa ne cuta' nij so' ra'a nij so' raá roj so', gaa ne dan me se ca'née nij so' man roj so' ca'anj nata' roj so' se-nana Jesucristó rihaan yuvii a.

Nana nihánj taj xna'anj daj quiran' 'o síí guun rá caráán chrej rihaan se-nana Diose estadó Chipre a

⁴Dan me se gaa ca'née Nimán Diose man roj so' ca'anj roj so', ne ca'anj roj so' chuman' Seleucia, gaa ne cavii roj so' rihoo chéé rihaan na ca'anj roj so' ndaa estadó cu'naj Chipre a. ⁵Gaa ne gaa cuchí' roj so' chuman' Salamina, ne nata' roj so' se-nana Diose rá nij ve' nuu chre' nij yuvii israelitá tucu'yón nij so' se-tucuanj Moisés, ne síí cu'naj Juan Marcos me síí vaj raçuíj man roj so' a. ⁶Dan me se yo'óo taj rihaan

na ya'anj me estadó Chipre yo', ne va'nuj nij so' chéé nu' yo'óo yo' ndaa se cuchí' nij so' chuman' Pafos a. Ne chuman' Pafos nari' nij so' man 'o síi chruun síi tu'va rma'an se vaa sij nata' se-nana Diose me so', ne síi israelitá me so', ne Barjesús cu'naj so' a. ⁷Ne so' me síi u'yón inanj chéé ga síi nicaj suun gobernador cu'naj Sergio Paulo, ne síi cavii ndo'o raá me síi cu'naj Sergio Paulo yo' a. Ne síi cu'naj Sergio Paulo canacúun man roj síi cu'naj Bernabé ga Saulo se vaa ca'na' roj so' rihaan so', ne guun ndo'o rá so' cunó so' se-nana Diose, ne danj qui'yaj roj so' a. ⁸Dan me se síi chruun cu'naj Barjesús, tzaj ne yo'ó se-chuvii so' me Elimas, ne nana “Elimas” taj se vaa síi chruun me so' a. Dan me se caráán Elimas chrej rihaan se-nana Bernabé ga Saulo a. 'O se guun rá so' ca'anj yanij síi cu'naj Sergio Paulo ne se cuchumán rá so' nana ya yo' a.

⁹Ne xa' síi cu'naj Saulo, tzaj ne yo'ó se-chuvii so' me Pabló, ne dan me se caraa ndo'o Nimán Diose nimán so', ne ni'yaj uxrá so' man síi cu'naj Elimas yo', ¹⁰ne cataj so':

—So' ro', me síi nuu nana tihá' yu'unj nimán, ne sij snúú rma'an mé so' nanj ei. Ta'níi ya síi chree mé so' á. Sij nachri' ni'yaj cunudanj se sa' mé so' a. Vaa güii tanáj ti'ín so' suun tanachej nana ya a'mii Diose sij 'nij ra'a man ní' na'. ¹¹Ne nihánj me se qui'yaj síi 'nij ra'a man ní' sayuun mán so', ne caráán rihaan so' doj güii, qui'yaj so', ne ndaa naán güii se curuvi' rihaan so' ma' —taj Pabló rihaan Elimas yo' a.

Ne taj ni'yón caráán rihaan Elimas, ne adi' se ran' síi chéé rque

ngaa rej rmi' ro', danj quiran' so', chéé so', vaj so', nano' so' man síi coro' ra'a so' racuíj man so' cachee so' a.

¹²Ne gaa quene'en síi nicaj suun gobernador yo' daj quiran' síi chruun cu'naj Elimas yo', gaa ne caráya'anj ndo'o so' se-tucuanj síi 'nij ra'a man ní', ne cuchumán rá so' ni'yaj so' man Jesucristó a.

Nana nihánj taj xa'anj se vaa cuchumán rá que'ee ndo'o yuvii yanij yanj chuman' Antioquia naj estadó Pisidia cuno nij so' nana ca'mii natáj Pabló rihaan nij so' a

¹³Dan me se cavii nij tuví' Pabló chuman' Pafos, ne cavii nij so' rque rihoo chéé rihaan na, ne ca'anj nij so' ndaa chuman' Perge chuman' naj estadó Panfilia a. Tzaj ne síi cu'naj Juan Marcos me se tanáj so' man yavij roj so', ne canicaj so' nan' so' chuman' Jerusalén a. ¹⁴Gaa ne yavij roj so' me se curihanj roj so' chuman' Perge, ne ca'anj roj so' chuman' Antioquia naj estadó Pisidia a. Ne güii naránj rá nij yuvii israelitá me güii yo', ne catúj roj so' rá ve' tucu'yón nij yuvii israelitá se-tucuanj Moisés, ne ca'anj cayáán roj so', ¹⁵ne quisij nayaa nii se-tucuanj Moisés do', se-nana nij síi nata' se-nana Diose gaa naá do', ne ca'née nij síi 'nij ra'a ve' yo' nana rihaan roj so', ne nana ca'née nij so' me nana nihánj a: “Sese vaa chrej nucaj me rá roj soj nago' roj soj rihaan nij yuvii nuu chre' nihánj, ne ca'mii roj soj, tinuj”, taj síi 'nij ra'a ve' yo' rihaan síi cu'naj Pabló ga síi cu'naj Bernabé a. ¹⁶Gaa ne canicun' caya Pabló, ne naxcaj so' ra'a so', ne cataj so' a:

—Cuno soj sij israelitá do', soj sij aráj cochroj rihaan Diose do', ca'mij rihaan soj á. ¹⁷Dan me se Diose síf noco' ní' sij israelitá ro', me síf narii man xii ní', ne tinaxcaj Diose man nij xii ní' gaa cayáán nij so' rej cu'naj Egiptó, ne Diose me síf guun nucuaj quirii uún man nij so' rej Egiptó a. ¹⁸Gaa ne nda' se tucuáá ndo'o nij so' rihaan Diose, tzaj ne yo'o racuáj Diose man nij so' gaa vaj nij so' rej tacaan nacoó vij chihaa ya yo' a. ¹⁹Gaa ne tinavij Diose man chij x'ne' yuvii yanj rej cu'naj Canaán, gaa ne cuxra' ta'aj Diose nu' rej yo' guun yo' to'óo nij xii ní', qui'yaj Diose a. ²⁰Ne rej yo' guun to'óo nij so' 'o ca'anj cientó táá vij chihaa chi' yo' a. Ne gaa quisíj catúj nij so' rej cu'naj Canaán, gaa ne cune' Diose man nij síf raa rii ta'nga' rihaan nij so', ne danj inanj cayáán nij so' ndaa se cayáán síf cu'naj Samuel síf nata' se-nana Diose rihaan yuvii a.

²¹Ne güii cayáán Samuel me se guun che'e nij xii ní' cachíin nij so' 'o síf nicaj suun rey guun chij rihaan nij so', gaa ne cune' Diose man síf cu'naj Saúl ta'níí síf cu'naj Cis se vaa guun chij so' rihaan nij so' ndaa vaa guun rá ma'an nij so' a. So' ro', me ta'níí ta'nij si'no síf cu'naj Benjamín, ne vij chihaa ya yo' cayáán so' síf nicaj suun rey a. ²²Gaa ne quirii yaníj Diose man Saúl, gaa ne cune' Diose man síf cu'naj David se vaa guun David síf nicaj suun rey uun chij rihaan nij yuvii israelitá a. Ne ca'mii Diose che'é so', cataj Diose: “Nihánj me se narí' 'unj man David ta'níí Isai, ne so' me síf qui'yaj nu' ndaa vaa

me raj qui'yaj so' nanj á”, taj Diose ni'yaj Diose man David a.

²³Ne sca'núj nij ta'níí ta'nij si'no David ro', rqué Diose 'o síf tinanii man ní' sij israelitá rihaan sayuun, ndaa vaa cata' tu'va Diose asij naá, ne Jesucristó me so' a. ²⁴Dan me se asino ca'mii natáj síf cu'naj Juan rihaan cunudanj nij yuvii israelitá se vaa canicaj nimán nij so' canoco' nij so' tucuáán sa', ne cata' ne nij so', gaa ne ca'na' Jesucristó a. ²⁵Dan me se gaa ataa doj tzín' quisij ca'mii natáj Juan nu' se vaa guun rá Diose cataj so', gaa ne cataj so': “Me síf mé 'unj, rá nij soj ga. 'O se nuveé sij nano' soj man mej ma'. Tzaj ne vaa síf noco' xcó 'unj, ne sij sa' uxrá doj me so' rihanj, ne ne nó xcúnj nachej canj 'nij tacóo so' ma'”, taj síf cu'naj Juan rihaan nij yuvii ni'yaj so' man Jesucristó a.

²⁶Cuno soj ta'nij ta'nij si'no Abraham do', soj sij aráj cochroj rihaan Diose do', ca'mij rihaan soj cuano, tinuj. Aj ca'na' nana nihánj rihaan ní', qui'yaj Diose, ne nana nihánj taj xna'anj daj qui'yaj ní' gaa ne ca'vee quinanii ní' rihaan sayuun ei. ²⁷'O se tuvi' ní' síf yanj chuman' Jerusalén do', nij síf uun chij rihaan nij so' do', ne xcaj nij so' cuentá che'é Jesucristó ma'. Ne cuta' nij so' cacun' xráá Jesucristó se vaa no xcúún so' ticavi' nii man so', ne dan me se quisíj ya nu' se-nana nij síf nata' se-nana Diose gaa naá nana nayaa ní' daj a güii naránj rá ní', qui'yaj nij so' nanj á. ²⁸Dan me se taj vaj a doj cacun' tumé so', tzaj ne rquee nij so' rihaan Pilato se vaa cavi' so' qui'yaj Pilato a. ²⁹Dan me se gaa

quisíj qui'yaj nij so' nu' ndaa vaa nó rihaan danj Dioso che'é Jesucristó, gaa ne tananij nii man so' rihaan rcutze, ne cachin' nii man so' rque yu'uj yujej a. ³⁰Tzaj ne Dioso me síi qui'yaj cunuu i'na' uún so' adonj. ³¹Gaa ne que'ee güii curuvi' so' rihaan nij síi cavii ga so' estadó Galilea ca'anj chuman' Jerusalén ga so' a. Ne yaj me se guun ma'an nij so' síi nata' che'é so' rihaan nij yuvij adonj.

³²Ne nihánj me se nata' núj nana sa' rihaan nij soj se vaa aj qui'yaj Dioso nu' ndaa vaa cata' tu'va so' rihaan xii ní' gaa naá a. ³³Dan me se cunuu i'na' uún Jesucristó, qui'yaj Dioso che'é ní', ne dan me se quisíj ya nu' nana cata' tu'va so' gaa naá, ne cavii sa' ní' ta'nij nij síi cane gaa naá, qui'yaj so' adonj. Ne ase vaa nana nihánj nana natá' 'unj rihaan nij soj ro', danj vaa nana no rihaan chra' Salmo número vij, ne taj yo': "Ta'nij mé so' á. Cuano nihánj me se quene'en yuvij se vaa ta'nij mé so', qui'yaj nanj á", taj se-nana Dioso no rihaan chra' Salmo yo' a. ³⁴Dan me se naxagaa so' ne cunuu i'na' uún so', ne se ri'yuj nee man so' daj chihaa mój ma'. Ne dan me se ma'an Dioso ca'mii nana nihánj adonj: "Ase vaa rque 'unj nu' se luj rihaan David, ta'nga' danj gaa rque 'unj nu' se luj rihaan so', ne daj chihaa mój se navij se luj yo' rihaan so' ma'", taj uún Dioso rihaan Jesucristó a. ³⁵Che'é se qui'yaj Dioso danj che'é Jesucristó rá David ro', che'é dan cachrón David rihaan yo'ó salmo nana nihánj a: "Daj chihaa mój se ri'yuj nee man síi vaa sa' rihaan

so', qui'yáa so' ma'", taj David rihaan Dioso ni'yaj David man Jesucristó a. ³⁶Dan me se xa' ma'an David, tzaj ne gaa quisíj qui'yaj so' nu' ndaa vaa guun rá Dioso qui'yaj so' che'é nij tuvi' so', gaa ne cavi' so', gaa ne cachin' nii man so' rej naj nij xii so', gaa ne ri'yuj nee man so' a. ³⁷Ne xa' Jesucristó síi cunuu i'na' uún qui'yaj Dioso, tzaj ne ne ri'yuj nee man so' ma'.

³⁸Xcaj nij soj cuentá se vaa cuano nihánj me se nata' núj nana rihaan soj se vaa che'é se vaa qui'yaj Jesucristó ro', che'é dan ca'vee caraa x'naa Dioso ni'yaj Dioso cacun' tumé ní', tinuj. Dan me se daj chihaa mój se navij nu' cacun' tumé soj, qui'yaj se-tucuanj Moisés ma'. ³⁹Tzaj ne cunudanj nij soj sij amán rá ni'yaj man Jesucristó me se x'néj uun cacun' yo' xráa soj, ne nuu sa' soj rihaan Dioso adonj. ⁴⁰Che'é dan tadó nij soj se quiran' soj ndaa vaa taj se-nana Dioso nana no rihaan danj nij síi nata' se-nana Dioso nana nihánj á: ⁴¹"Ne soj sij a'nga' nacoo ni'yaj manj, tzaj ne ni'yaj soj ei. Ca'anj rá soj, ne quirí' nu' soj nanj ei. 'O se gaa vaa i'na' soj nihánj, ne qui'yaj suun nocoó, ne ca'vee se cataj xna'anj yo'o so' rihaan soj che'é se vaa qui'yáj, tzaj ne se ca'vee cuchuman rá soj se-nana so' asuun ma'", taj Dioso rihaan soj a —taj Pabló rihaan nij yuvij cunuu chre' rá ve' yo' a.

⁴²Dan me se gaa me rá roj so' ca'anj roj so', ne cachín ni'yaj nij yuvij rihaan roj so' se vaa cachén yo'o tunj güii, ne ca'na' uún roj so' ne ca'mii uún roj so' nana vaa danj rihaan nij so' a. ⁴³Gaa ne gaa quisíj

tucu'yón nij so' ne curihanj nij yuvii xe', ne que'ee nij sí israelitá do', nij sí yanj noco' xraan se-tucuanj nij sí israelitá do', canoco' man roj sí cu'naj Pabló ga Bernabé a. Gaa ne ca'mii ndo'o roj so' ga nij so', gaa ne guun ya rá nij so' se vaa yo'o nicaj nij so' tucuaán sa' ga se luj 'yaj Diose che'é nij so' a.

⁴⁴Dan me se cachén tunj güii ne nasíj yo'ó güii naránj rá nij yuvii israelitá, gaa ne cunuu chre' cunudanj nij yuvii yanj chuman' ta' asuun, che'é rej cunō nij so' se-nana Diose sij 'nij ra'a man ní' a. ⁴⁵Tzaj ne quene'en nij yuvii israelitá se vaa cuchi' ndo'o yuvii rihaan Pabló, gaa ne che'é dan guun xcoj ruvaa rá nij yuvii israelitá, ne nij ca'mii nij so' che'é Pabló, cataj nij so' se vaa inanj nana ne ca'mii Pabló a. ⁴⁶Tzaj ne ne cuchu'vi' ya roj sí cu'naj Pabló ga Bernabé ni'yaj roj so' man nij yuvii israelitá a ma'. Ne cataj roj so':

—No xcúun núj nata' núj se-nana Diose rihaan nij soj sij israelitá asino yaan adonj. Tzaj ne che'é se quiri'fj yanj soj nana yo', ne che'é se nuveé sij no xcúun cayáan ga Diose nu' cavii nu' ca'anj me soj rá soj, ne che'é dan nihánj me se canicaj núj, ne nata' núj nana yo' rihaan nij sí yanj ei. ⁴⁷O se Diose sij 'nij ra'a man ní' me sí ca'ne' suun rihaan núj qui'yaj núj danj adonj. Dan me se cataj sí 'nij ra'a man ní': “Aj cuné' 'unj mán so' se vaa guún so' ya'an chuguun rihaan nij sí yanj ne ca'vee xcaj nij so' cuentá, qui'yáa so', gaa ne quinani yuvii yanj chuman' naj nu' rihaan chumii rihaan sayuun,

qui'yáa so' á”. Nihánj me se-nana Diose nana cataj Diose rihaan núj nanj á —taj roj so' rihaan nij yuvii israelitá yo' a.

⁴⁸Dan me se gaa cuno nij sí yanj se-nana Pabló, ne guun niha' uxrá rá nij so', ne ve'é ca'mii nij so' che'é se-nana Diose sij 'nij ra'a man ní' a. Ne cunudanj nij sí cuné' Diose cayáan rihaan Diose nu' cavii nu' ca'anj ro', cuchumán rá nij so' cuno nij so' nana yo' a. ⁴⁹Gaa ne cuchi' se-nana Diose sij 'nij ra'a man ní' daj a nij chuman' naj rihaan yo'óó rej yo' a. ⁵⁰Tzaj ne caxríj nij sí israelitá chrej rque nij chana yanj noco' xraan man Diose chana xna'anj do', rque nij sí nicaj suun uun chij rihaan chuman' yo' do', ne táa ri'yunj nij so' man Pabló ga Bernabé a. Gaa ne tucunánj nij so' man roj so' rej yo' a. ⁵¹Gaa ne nacunan' roj so' tacóó roj so' tucuyuu roj so' yo'óó tachruu cavii chuman' yo' rihaan yo'óó, che'é rej xcaj nij sí man chuman' yo' cuentá se vaa ma'an nij so' tumé cacun' se vaa ne cunō nij so' se-nana Diose a. Gaa ne ca'anj roj so' chuman' Iconio a. ⁵²Ne nij sí cuchumán rá ni'yaj man Jesucristó yanj chuman' Antioquía yo' me se 'o guun niha' uxrá rá nij so', ne 'o cunuu Nimán Diose nimán nij so' a.

Nana nihánj taj xna'anj daj guun rá nij sí man chuman' Iconio gaa cuchi' se-nana Diose chiháan nij so' a

14 Dan me se gaa cuchi' sí cu'naj Pabló ga sí cu'naj Bernabé chuman' Iconio, ne catúj roj so' rá ve' tucu'yón nij yuvii israelitá se-tucuanj Moisés, ne che'é

se ve'é ndo'o nata' roj so' se-nana Diose, che'é dan cuchumán rá que'ee ndo'o yuvii israelitá do', yuvii yanj a'mii xna'anj griego do', ni'yaj nij so' man Jesucristó a. ²Tzaj ne nij yuvii israelitá na'vej rá cuno se-nana Jesucristó me se caxrj nij so' chrej rque nij yuvii yanj yanj chuman' yo' che'é rej nachri' nij so' ni'yaj nij so' man nij tinuj nij sí cuchumán rá ni'yaj man Jesucristó, ne danj guun a. ³Dan me se que'ee güii sca' nanj ca'mii natáj roj sí cu'naj Pabló ga Bernabé se-nana Diose sij 'nij ra'a man ní', ne sí 'nij ra'a man ní' ro', racuj man roj so' se vaa guun nucuaj roj so' qui'yaj suun roj so' suun sa' nocoo ni'yaj nij yuvii, che'é rej cuchumán rá nij yuvii se vaa ya ya vaa se-nana roj so' nana che'é se luj qui'yaj sí 'nij ra'a man ní' che'é ní' a.

⁴Gaa ne xra' ta'aj nij yuvii man chuman' yo', ne ta'aj nij so' ro', canoco' se-nana nij sí israelitá sí na'vej rá cuno se-nana Diose, ne yo'ó ta'aj nij so' ro', canoco' se-nana roj sí cune' Jesucristó man nata' se-nana so' a. ⁵Gaa ne guun rá nij yuvii yanj do', nij yuvii israelitá do', nij sí uun chij rihaan nij so' do', qui'yaj chi'ii nij so' man roj sí cu'naj Pabló ga Bernabé ne ndaa guun rá nij so' go' nij so' yahij man roj so' ndaa se cavi' roj so' a. ⁶Tzaj ne xcaj roj so' cuentá, gaa ne che'é dan cunánj roj so', ca'anj roj so' chuman' Litra chuman' naj estadó Licaonia do', chuman' Derbe yo'ó chuman' naj estadó Licaonia do', yo'ó nij chuman' ra'a naj nichrun' ga roj chuman' yo' do', ⁷ne vaj roj so' nata' roj so' se-nana Diose

nana sa' rihaan nij yuvii yanj nij chuman' yo' a.

Nana nihánj taj xna'anj se vaa guun rá nij sí ne chuman' Litra se vaa ya'anj me sí cu'naj Pabló do', sí cu'naj Bernabé do' a

⁸Dan me se chuman' Litra ro', ne 'o sí rengo ne sí rengo me so' asij ca'ngaa so', ne veé 'o danj vaa so', ne daj chihaa mjí taj se qui'yá' cachee so' ma'. ⁹Ne yaán so' cuno so' se-nana Pabló a. Dan me se ni'yaj uxrá Pabló man so', ne xcaj Pabló cuentá se vaa sí rengo yo' nucuaj ndo'o rá se vaa ca'vee nahuun sa' so', qui'yaj Diose a. ¹⁰Che'é dan nucuaj ca'mii Pabló, cataj Pabló rihaan so' a:

—Naxumaan so', canicun' cayá so' ei. —taj Pabló rihaan so' a.

Gaa ne güej sí rengo yo', ne cachée so' a. ¹¹Dan me se quene'en nij yuvii se vaa qui'yaj Pabló, ne che'é dan caguáj nij yuvii se-xna'anj ma'an nij so', cataj nij so':

—Nahuun nij ya'anj yuvii, ne naniij nij so' rihaan yo'óo chuguanj —taj nij yuvii ni'yaj nij yuvii man Pabló ga Bernabé a.

¹²Gaa ne cataj nij yuvii se vaa ya'anj cu'naj Júpiter me Bernabé, ne Pabló me se ya'anj cu'naj Mercurio me so', che'é se so' me sí ca'mii doj a. ¹³Ne dan me se rihaan tu'va chuman' yo' ne 'o nuvíj rej na'vúj nij yuvii rihaan ya'anj Júpiter, ne xrej ne nuvíj yo' ro', ca'ne' suun se vaa ca'na' scúj toró ca'na' cachriin yáj ca'na' ta'yaa rej atúj yuvii chuman' yo', ne guun rá so' ga nij yuvii ticavi' nij so' scúj yo' rihaan Pabló ga Bernabé che'é se ya'anj me roj so' rá nij yuvii a.

¹⁴Dan me se xcaj Bernabé ga Pabló cuentá daj guun rá nij yuvii, ne che'é dan cutzin' roj so' sagan' roj so', che'é se chilii ndo'o qui'yaj nij yuvii rá roj so' a. Gaa ne cunánj roj so' sca'núj nij yuvii, ne caguáj roj so', ¹⁵cataj roj so':

—Se guun qui'yaj nij soj danj ma'.

'O se cyaan yuvii me ní', ne nihánj me se xa' núj, tzaj ne 'na' núj nata' núj se-nana Diosé nana sa' rihaan nij soj, che'é rej tanáj soj tucuáan ni'yon rma'an noco' soj cuano nihánj ne canicaj soj canoco' soj Diosé síí vaa i'na' ya ei. Ne so' ro', me síí qui'yaj nu' rej xta' do', nu' rihaan yo'óo do', nu' na ya'anj do', ne nu' rasuun qui'yaj so' adonj.

¹⁶Ne asij rque me se ca'neé ra'a Diosé canoco' cunudanj nij x'ne' yuvii tucuáan cuchruj xii nij so' a.

¹⁷Tzaj ne se guun cataj soj se vaa a doj ne ca'vee xcaj soj cuentá che'é Diosé ma'. 'O se ve'é ndo'o qui'yaj Diosé che'é soj adonj. Dan me se aman' maan avii rej xta', qui'yaj Diosé che'é soj, ne síj dió avii naa, qui'yaj uún Diosé, ne dan me se araa rque soj, ne uun niha' rá soj, qui'yaj Diosé adonj —taj roj so' rihaan nij yuvii yo' a.

¹⁸Dan me se daj doj se ticavi' nij yuvii scúj rihaan roj so', tzaj ne ca'ne' rá nij yuvii ga suun yo', qui'yaj se-nana roj so' a.

Nana nihánj taj xna'anj che'é sayuun qui'yaj nij síí israelitá cavii chuman'

Antioquía do', chuman' Iconio do', man síí cu'naj Pabló ga Bernabé a

¹⁹Tzaj ne cavii síí israelitá chuman' Antioquía do', chuman' Iconio do', ca'na' nij so' chuman'

Listra, ne caxrífj nij so' chrej rque nij yuvii man chuman' Listra, ne che'é dan go' ndo'o nij yuvii yahij man Pabló, ne cuxuun nij yuvii man so' ndaa tu'va chuman', ne ril'fj nij yuvii man so' a. Ne guun rá nij yuvii se vaa cavi' so' a. ²⁰Tzaj ne cunu chre' nij síí cuchumán rá se-nana Jesucristó ne chuman' yo', ne tucuachriin nij so' nu' anicaj rej naj Pabló rihaan yo'óo, ne naxagaa so', ne catúj uún so' chuman' ga nij so' a. Gaa ne yo'óo güii me se curihanj roj so' ga Bernabé ca'anj roj so' chuman' Derbe a.

Nana nihánj taj xna'anj se vaa canicaj síí cu'naj Pabló ga Bernabé chuman' Antioquía naj estadó Siria a

²¹Dan me se nata' ndo'o síí cu'naj Pabló ga Bernabé se-nana Diosé nana sa' rihaan nij yuvii man chuman' Derbe yo', ne cavii ndo'o síí tucu'yón se-nana Jesucristó chuman' Derbe yo', qui'yaj roj so' a. Gaa ne canicaj roj so', ca'anj roj so' chuman' Listra do', chuman' Iconio do', chuman' Antioquía naj estadó Pisidia do' a.

²²Ne nari' nucuaj nimán cunudanj nij síí tucu'yón se-nana Jesucristó, qui'yaj roj so' a. Ne narqué roj so' chrej man nij síí tucu'yón se-nana Jesucristó se vaa daj chihaa míj se ca'ne' rá nij so' ga suun noco' se-tucuaj Jesucristó a. Ne cataj roj so' se vaa asino quiran' ndo'o ní' sayuun, gaa ne ca'vee cayáan ní' ga Diosé asa' guun chij Diosé rihaan chumii nihánj, taj roj so' a. ²³Ne cune' roj so' man síí guun chij rihaan nij síí cuchumán rá ni'yaj man Jesucristó 'o 'o nij chuman' a. Gaa ne toco' roj so' x'naa man

ma'an roj so', ne cachín ni'yaj roj so' rihaan Diose sij 'nij ra'a man ní che'é nij sí cuchumán rá ni'yaj man so' se vaa raçuíj so' man nij so' a.

²⁴Dan me se cachén roj so' nu' estadó Pisidia, gaa ne cuchi' roj so' estadó Panfilia a. ²⁵Gaa ne ca'mii natáj roj so' se-nana Diose rihaan nij sí man chuman' Perge, gaa ne ca'anj roj so' chuman' Atalia a. ²⁶Gaa ne chuman' Atalia ro', cavii roj so' rihoo chéé rihaan na, quinan' roj so' ndaa chuman' Antioquía naj estadó Siria a. Ne chuman' Antioquía ro', me rej cavii roj so' asino yaan gaa cachín ni'yaj nij sí cuchumán rá ni'yaj man Jesucristó rihaan Diose se vaa raçuíj Diose man roj so' qui'yaj suun roj so' ca'mii natáj roj so' se-nana Diose rihaan yuvií a. Ne nihánj me se quisíj suun yo', qui'yaj roj so' nanj adonj. ²⁷Dan me se gaa nucui' roj so', ne canacúun roj so' man nij sí cuchumán rá ni'yaj man Jesucristó se vaa cunu chre' nij so', gaa ne cataj xna'anj roj so' nu' se vaa qui'yaj Diose ga roj so', ne cataj roj so' se vaa ya x'núj rihaan nij yuvií yaníj cuchuman rá nij so' ni'yaj nij so' man Jesucristó, qui'yaj Diose, ne ca'vee cavii sa' nij yuvií yaníj yo' a. ²⁸Gaa ne guun raan ndo'o roj so' ga nij sí tucu'yón se-nana Jesucristó yanj chuman' Antioquía yo' a.

Nana nihánj taj xna'anj che'é
juntá qui'yaj nij sí cuchumán
rá ni'yaj man Jesucristó man
chuman' Jerusalén gaa ca'mii nij
so' che'é se-tucuanj Moisés a

15 Dan me se ta'aj nij sí
cuchumán rá ni'yaj man

Jesucristó cavii chuman' Jerusalén, ne ca'anj nij so' tucu'yón nij so' rihaan yo'ó tinúú nij so' se vaa sese se cata' ta'nga' man yo'o so' ndaa vaa taj se-tucuanj Moisés, ne daj chihaa míj se ca'vee nanií so' rihaan sayuun qui'yaj Diose ma'.

²Gaa ne ca'mii canó tuvi' ndo'o sí cu'naj Pabló do', sí cu'naj Bernabé do', ga nij sí tucu'yón nana yo', gaa ne che'é dan cune' nij sí cuchumán rá ni'yaj man Jesucristó yanj chuman' Antioquía man roj so' ga yo'ó doj tinúú nij so' se vaa ca'anj nij so' chuman' Jerusalén nano nij so' cuentó ga nij apóstol cune' Jesucristó man nata' se-nana so' do', ga yo'ó nij sí uun chij rihaan nij so' do', che'é nana a'mii nij yuvií yo' a.

³Dan me se cavii nij so', ca'anj nij so', ne cachén nij so' estadó Fenicia do', estadó Samaria do', ne cataj xna'anj nij so' rihaan nij tinúú nij so' che'é nij yuvií yaníj se vaa cuchumán rá ta'aj nij so' ni'yaj nij so' man Jesucristó, gaa ne guun niha' uxrá rá cunudanj nij sí cuno nana yo' a. ⁴Dan me se cuchi' nij so' chuman' Jerusalén, gaa ne ve'é ca'mii nij sí cuchumán rá ni'yaj man Jesucristó do', nij apóstol cune' Jesucristó man nata' se-nana so' do', yo'ó nij sí uun chij do', ga nij so' a. Gaa ne cataj xna'anj nij so' rihaan nij sí yanj chuman' Jerusalén yo' che'é nu' se vaa qui'yaj Diose ga nij tinuj nij so' a.

⁵Tzaj ne canicun' doj sí fariseo sí cuchumán rá ni'yaj man Jesucristó, ne cataj nij so' se vaa no xcuún nij tuvi' Pabló cuta' nij so' ta'nga' man nij sí yaníj yo', ne cataj xna'anj nij so' rihaan nij sí yaníj yo' se vaa

no xcuún nij so' qui'yaj nij so' nu' se-tucuañj Moisés a.

⁶Dan me se cunuu chre' nij apóstol cune' Jesucristó man nata' se-nana so' rihaan yuvii ga yo'ó nij sí uun chij rihaan nij yuvii cuchumán rá ni'yaj man Jesucristó, qui'yaj nij so' juntá, ca'mii nij so' che'é se-nana nij sí fariseo yo' a.

⁷Dan me se ca'mii ca'mii nij so', gaa ne canicun' sí cu'naj Pedró, ne cataj so':

—Cuno soj ca'mij, tinuj. Aj ne'en soj se vaa asij naá ndo'o guun rá Diose cuno nij sí yanij se-nana Diose nana sa', ne cuchuman rá nij sí yanij ni'yaj nij so' man nana sa' yo' a. Gaa ne narii Diose man yo'ó tuvi' ní', ne 'unj me sí narii Diose nata' se-nana Diose rihaan nij yuvii yanij yo' chuguanj. ⁸Ne Diose ro', me sí ne'en daj vaa nimán yuvii, ne Diose me sí rqué Nimán Diose man nij sí yanij yo' ndaa vaa qui'yaj so' che'é ma'an ní', che'é rej ca'vee guun ya rá ní' se vaa ya tinúú ní' me nij sí yanij nanj adonj. ⁹Dan me se cunuu sa' nimán nij sí yanij rihaan Diose che'é se cuchumán rá nij so' ni'yaj nij so' man Jesucristó, ne cuano nihánj me se 'o cuyaan vaa nij so' ga ní' rihaan Diose nanj adonj.

¹⁰Ne tadó soj sese guun rá soj quene'en soj sese ca'vee ca'maan rá Diose qui'yaj soj ne qui'yaj Diose sayuun man soj á. 'O se xa' se-tucuañj Moisés, tzaj ne ase vaa icón 'ee taj raa yuntá scúj ro', danj vaa se-tucuañj Moisés rihaan xii ní' do', rihaan ma'an ní' do', ne ne ca'vee qui'yaj ní' nu' tucuaán yo' ma'. Ne nihánj me se me rá soj

cuchruj soj tucuaán yo' rihaan yo'ó nij tinúú ní' sí tucuyón se-nana Jesucristó, ¹¹tzaj ne amán rá ní' se vaa che'é inanj se luj qui'yaj Jesucristó sij 'nij ra'a man ní' ro', che'é dan nanii ní' rihaan sayuun ei. Nuveé se-tucuañj Moisés me se vaa qui'yaj nanii ní' rihaan sayuun ma'. Ne ase vaa ní' ro', danj vaa nij tinúú ní' sí yanij uún adonj —taj Pedró rihaan cunudanj nij so' a.

¹²Dan me se ca'ne' rá nij so', ne a doj ne ca'mii nij so' a ma'. Maan se sa' uxrá nanó xrej nij so' gaa cataj xna'anj Bernabé ga Pabló che'é nij suun sa' nocoo guun nucuaj roj so' qui'yaj roj so' sca'núj nij sí yanij qui'yaj Diose a. ¹³Dan me se gaa quisij ca'mii roj so', gaa ne ca'mii sí cu'naj Santiagó, cataj so':

—Cuno nij soj ca'mij, tinuj. ¹⁴Nihánj me se cataj xna'anj tinú' Simón rihaan ní' se vaa asino yaan narii Diose man ta'aj nij yuvii yanij guun nij so' 'o se-chuman' Diose a. ¹⁵Ne 'o cuyaan vaa se-nana nij sí nata' se-nana Diose gaa naá ga se-nana tinú' Simón nihánj a. Dan me se vaa nana no rihaan danj Diose taj: ¹⁶“Asa' quisij, gaa ne canicaj 'unj, ne naquiyaj sa' 'unj rej ne sí cu'naj David a. Dan me se canee nu' ve' ne so', ne quiri' ndo'o ve', tzaj ne nacune' caya uún 'unj man nu' ve' yo', gaa ne cunuu sa' cunudanj yo' a. ¹⁷Danj qui'yaj che'é rej ca'vee nano' yo'ó nij yuvii yanij mán 'unj sij 'nij ra'a man nij so' a. Danj qui'yaj cunudanj nij yuvii yanij noco' manj, taj 'unj sij 'nij ra'a man soj, ¹⁸ne asij naá cataj 'unj se vaa qui'yaj danj adonj”, taj se-nana Diose nana cachrón sí nata' se-nana Diose gaa naá rihaan yanj a.

19”Che'é dan 'un̄j me síi guun rá se vaa sē qui'yaj ní' sayuun man nij síi yan̄j canicaj̄ nimán canoco' man Dios̄e ma'. Sē cataj ní' se vaa canoco' nij so' nu' se-tucuan̄j Moisés ma'. 20Maan se qui'yaj ní' yan̄j ca'nej ní' rihaan nij so', nē cataj xna'an̄j ní' rihaan nij so' se vaa sē guun chā nij so' rasuun̄ rqué yuvīi rihaan ya'an̄j cacój yuvīi ma'. Nē snó'o do', chanā do', sē cotoj nij so' gā yo'ó yuvīi sese ne nicā nij so' me yo' ma'. Nē sē chá nij so' nee xcuu tuguáj̄ nii gaán̄ chihá ma'. Nē sē chá nij so' ton ma'. 21'Q sē daj̄ ā güiī cuetan̄' narán̄j rá ní' me se man̄ ndo'o tuvi' ní' sij̄ israelitá̄ nayaa se-nanā Moisés, nē a'mii natáj̄ nii che'é se-tucuan̄j so' rá ve' tucuyón̄ ní' tucuaán̄ yo' daj̄ ā chuman' a. Nē dan̄j 'yaj̄ in̄anj ní' sij̄ israelitá̄ asij̄ naá̄ ndo'o a —taj̄ síi cu'naj̄ Santiagó̄ rihaan yo'ó nij so' a.

Nanā nihán̄j taj̄ xna'an̄j che'é yan̄j cartá̄ qui'yaj̄ nij síi man̄ Jerusalén̄ ca'néé̄ nij so' rihaan̄ nij yuvīi yan̄j cuchumán̄ rá ni'yaj̄ man̄ Jesucristó̄ a

22Gaā nē guun rá̄ nij apóstol̄ cune' Jesucristó̄ man nata' se-nanā so' do', yo'ó̄ nij síi uun̄ chij̄ do', cunudan̄j nij yuvīi cuchumán̄ rá ni'yaj̄ man̄ Jesucristó̄ yan̄j chuman' Jerusalén̄ do', narīi nij so' doj̄ tuvi' ma'an̄ nij so' ca'an̄j nij so' ndaā chuman' Antioquíā gā roj̄ síi cu'naj̄ Pabló̄ do', Bernabé̄ do' a. Gaā nē narīi nij so' man síi cu'naj̄ Judas Barsabás̄ do', man síi cu'naj̄ Silas̄ do', se vaa ca'an̄j roj̄ so' a. 'Q sē síi sa' me roj̄ so', rá̄ nij tinúú̄ roj̄ so' a. 23Gaā nē qui'yaj̄ cunudan̄j nij so' yan̄j cartá̄ ca'an̄j n̄icaj̄ nij síi ca'an̄j

chuman' Antioquíā, nē nihán̄j me se vaa taj̄ yan̄j cartá̄ yo' a: “Nihán̄j me yan̄j cartá̄ 'yaj̄ núj sij̄ apóstol̄ cune' Jesucristó̄ man nata' se-nanā so' do', sij̄ uun̄ chij̄ rihaan̄ nij síi amán̄ rá ni'yaj̄ man̄ Jesucristó̄ do' a. Tinúú̄ soj me núj, nē ca'nej̄ núj yan̄j nihán̄j rihaan̄ nij soj sij̄ yan̄j amán̄ rá ni'yaj̄ man̄ Jesucristó̄ yan̄j chuman' Antioquíā do', estadó̄ Siria do', estadó̄ Cilicia do' a. 24Dan me se ca'na' nanā rihaan̄ núj se vaa doj̄ tuvi' núj me síi ca'mii nanā qui'yaj̄ sayuun̄ rihaan̄ soj, nē quiri' rá soj, qui'yaj̄ nij síi ca'mii nanā yo' rihaan̄ nij soj a. Tzaj̄ nē nuveé̄ núj ca'néé̄ man̄ nij so' ma'. 25Tzaj̄ nē che'é se qui'yaj̄ nij so' dan̄j ro', che'é dan̄ cuyaan̄ guun rá̄ núj narīi núj doj̄ tinúú̄ núj cuch̄i' rihaan̄ soj gā roj̄ tinúú̄ ní' síi 'eē ndo'o rá̄ núj síi cu'naj̄ Bernabé̄ gā Pabló̄ adon̄j. 26Nē xa' roj̄ so', tzaj̄ nē sij̄ ca'néé̄ nimán̄ cunuú̄ rihaan̄ Jesucristó̄ sij̄ 'nij̄ ra'a man̄ ní' me roj̄ so', nē ndaā ne chu'vi' roj̄ so' cavi' roj̄ so' ma'. 27Dan me se ca'néé̄ núj man síi cu'naj̄ Judas do', man síi cu'naj̄ Silas do', se vaa ca'an̄j roj̄ so' gā síi cu'naj̄ Bernabé̄ gā Pabló̄, nē ma'an̄ roj̄ so' nata' rihaan̄ soj ndaā vaa taj̄ nanā nō rihaan̄ yan̄j nihán̄j ei. 28”Dan me se nē guun rá̄ Nimán̄ Dios̄e do', ma'an̄ núj do', cuchruj̄ ndo'o núj tucuaán̄ canoco' soj ma'. Tzaj̄ nē vaa che'é̄ cunó̄ soj ca'an̄j gueē nanā nihán̄j, rá̄ núj nan̄j adon̄j. 29Dan me se sē guun chā soj rasuun̄ rqué yuvīi rihaan̄ ya'an̄j cacój yuvīi ma'. Sē guun chā soj ton ma'. Sē guun chā soj neē xcuu tuguáj̄ nii gaán̄ chihá ma'. Nē snó'o do', chanā do', sē cotoj soj gā yo'ó̄ yuvīi sese ne nicā soj me yo' ma'. Nē sese

qui'yaj soj nu' ndaa vaa taj nana nihánj, ne ve'é 'yaj soj, rá núj nanj adonj. Ne me rá núj se vaa ve'é cayáán soj adonj", taj yanj cartá qui'yaj nij síi man chuman' Jerusalén yo' a.

³⁰Dan me se ca'née nij so' man ca'anj nij síi ca'anj chuman' Antioquía, gaa ne gaa cuchí' nij so', ne canacúun nij so' cunu chre' cunudanj nij síi cuchumán rá ni'yaj man Jesucristó, gaa ne caxrij nij so' yanj cartá yo' ston nij síi yanj chuman' Antioquía a. ³¹Gaa ne nayaa nij síi man Antioquía yanj cartá, gaa ne guun niha' uxrá rá nij so' che'é nana sa' cataj xna'anj nij síi man Jerusalén rihaan nij so' a. ³²Ne síi cu'naj Judas do', síi cu'naj Silas do', síi nata' se-nana Diose me roj so', ne a'mii a'mii roj so' nago' roj so' chrej man nij síi man Antioquía yo', ne nari' nucuj nimán nij so', qui'yaj roj so' a. ³³Dan me se quisij caran' roj so' chuman' Antioquía, gaa ne ve'é cataj nij tinuj nij síi man Antioquía rihaan roj so' se vaa dínj gaa nimán roj so' ca'anj roj so' a. Gaa ne dan me se quinan' roj so' rihaan nij síi ca'née man roj so' ca'na' roj so' a. ³⁴Tzaj ne guun rá síi cu'naj Silas quinaj so' chuman' Antioquía a. ³⁵Ne guun raan síi cu'naj Pabló do', síi cu'naj Bernabé do', chuman' Antioquía, ne tucu'yón roj so' se-nana Diose sij 'nij ra'a man ní' nana sa' rihaan yuvij a. Ne que'ee ndo'o yo'ó nij yuvij nata' nana sa' yo' ga roj so' a.

Nana nihánj taj xna'anj se vaa ca'anj uún Pabló tucu'yón so' se-nana Diose rihaan yuvij, ne ca'anj Bernabé yo'ó rej yanij a

³⁶Dan me se cachén doj güii, gaa ne cataj Pabló rihaan Bernabé a:

—Canicaj ní' ca'anj uún ní' cunudanj nij chuman' yanj nij tinúu ní' nij síi nata' ní' se-nana Diose nana sa' rihaan, gaa ne quene'en ní' daj vaa mán nij so' ei —taj Pabló rihaan Bernabé a.

³⁷Tzaj ne Bernabé ro', guun rá so' se vaa ca'anj uún síi cu'naj Juan Marcos ga roj so' a. ³⁸Tzaj ne ne ca'vej rá Pabló ca'anj uún Juan Marcos ga roj so', che'é se gaa rque me se tanáj Juan Marcos man roj so' estadó Panfilia, ne ne ca'anj so' qui'yaj suun nij so' che'é Diose ma'. ³⁹Che'é dan guun vij nana ca'mii roj so' che'é Juan Marcos, ne che'é dan ca'anj yanij roj so', ne Bernabé ro', nicaj síi cu'naj Marcos, ne cavii roj so' rihoo chée rihaan na, ne ca'anj roj so' estadó Chipre a. ⁴⁰Ne Pabló ro', narii so' man síi cu'naj Silas se vaa ca'anj so' ga Pabló a. Ne cachín ni'yaj nij tinúu roj so' nij síi man chuman' Antioquía rihaan Diose se vaa qui'yaj Diose se luj ne raçuíj so' man roj so' chrej ca'anj roj so', ne dan me se ca'anj roj so' a. ⁴¹Gaa ne cachén roj so' nu' estadó Siria do', nu' estadó Cilicia do', ne nari' nucuj nimán nij x'ne' nij síi cuchumán rá ni'yaj man Jesucristó man cunudanj nij chuman' naj roj estadó yo', qui'yaj roj so' a.

Nana nihánj taj xna'anj se vaa cachée síi cu'naj Timoteo ga síi cu'naj Pabló ga Silas a

16 Dan me se cuchí' síi cu'naj Pabló ga Silas chuman' Derbe do', chuman' Listra do' a. Ne chuman' Listra ro', yáán 'o síi tucu'yón se-nana Jesucristó, ne Timoteo cu'naj so' a. Ne nii

Timoteo me chana israelitá cuchumán rá ni'yaj man Jesucristó, ne rej Timoteo me sí yanj a'mii xna'ánj griego a. ²Ne sí sa' me Timoteo, taj nij tinúú so' sí ne chuman' Litra do', chuman' Iconio do' a. ³Dan me se guun rá Pabló se vaa ca'anj Timoteo ga so' a. Ne cuta' Pabló ta'nga' man so', che'é se ne'en cunudanj nij sí israelitá yanj rej yo' se vaa sij yanj me rej so' ne che'é dan nuvi' ta'nga' cata' man so' ma'. ⁴Dan me se gaa cachén nij so' nu' nij chuman', ne cataj xna'anj nij so' rihaan nij yuvií cuchumán rá ni'yaj man Jesucristó se vaa cunō nij yuvií se-nana nij apóstol cune' Jesucristó man do', yo'ó nij sí uun chij yanj chuman' Jerusalén do', nana naqui'yaj cuu nij so' che'é nij sí yanj a. ⁵Ne xa' nij x'ne' nij sí cuchumán rá ni'yaj man Jesucristó, tzaj ne doj a canoco' nij so' se-tucuanj Jesucristó, ne doj a cunuu rij nij x'ne' daj a güii a.

Nana nihánj taj xna'anj se vaa naqui'yaa 'o sí ne estadó Macedonia rihaan Pabló, qui'yaj Diose a

⁶Dan me se caráan Nimán Diose chrej rihaan nij so' nata' nij so' se-nana Diose estadó cu'naj Asia, ne che'é dan cachén nij so' rej cu'naj Frigia do', rej cu'naj Galacia do' a. ⁷Gaa ne vaj nij so' chrej ndaa rej cu'naj Misia, gaa ne guun rá nij so' ca'anj nij so' estadó cu'naj Bitinia a. Tzaj ne ne ca'vee qui'yaj nij so' danj, qui'yaj Nimán Diose ma'. ⁸Che'é dan cachén nij so' rej cu'naj Misia, ne nanij nij so' ndaa chuman' Troas a. ⁹Ne dan me se rej nij naqui'yaa 'o rasuun rihaan

Pabló, qui'yaj Diose a. Ne dan me se nicun' 'o sí ne estadó Macedonia ni'yaj Pabló, ne canacúun snó'o yo' man Pabló, cataj so':

—Ca'na' so' ndaa estadó Macedonia nihánj, ne racuíj so' man núj á —taj so' rquee so' man Pabló a.

¹⁰Gaa ne nu' nanó rá ca'anj ran' núj daj gaa qui'yaj núj ne ca'vee ca'anj núj ndaa estadó Macedonia a. 'O se cachrij rá ya núj se vaa Diose me sí ca'ne' suun rihaan núj nata' núj se-nana Diose nana sa' rihaan nij sí ne estadó Macedonia yo' a.

Nana nihánj taj xna'anj che'é chana cu'naj Lidia chana cuchumán rá ni'yaj man Jesucristó a

¹¹Dan me se chuman' Troas ro', cavii núj rihoo chéé rihaan na, ne 'o chrej ca'anj núj cuchí' núj ndaa rej cu'naj Samotracia a. Ne yo'ó güii ca'anj núj rque rihoo ndaa chuman' cu'naj Neápolis a. ¹²Gaa ne cavii núj chuman' yo', ca'anj núj chuman' cu'naj Filipos a. Ne chuman' Filipos ro', me chuman' nocōo naj estadó Macedonia, ne chuman' cuchruj nij sí cavii Romá me yo' a. Dan me se guun raan núj doj güii chuman' Filipos yo', ¹³ne güii naránj rá nij yuvií israelitá curihanj núj ta'yaa xij rej atúj yuvií chuman' yo', ne ca'anj núj tu'va 'o chráa a. 'O se guun rá núj se vaa rej yo' me rej cunuu chre' nij yuvií israelitá cachinj ni'yaj nij so' rihaan Diose a. Dan me se cayáan núj rihaan yo'óó, ne ca'mii núj ga nij chana cunuu chre' rej yo', ¹⁴ne yáan 'o chana cu'naj Lidia, ne no' ro', me chana ránj natu'vej yatzij mantá tintá

sa' inanj, ne chana cavii chuman' Tiatira me no', ne chana yanij araj guee rihaan Diose me no' a. Dan me se cuno no' se-nana Pabló, ne racuj ndo'o Diose sij 'nij ra'a man ní' man no' se vaa ca'vee cuchumán rá no' se-nana Pabló yo' a. ¹⁵Gaa ne cata' ne nij tucua no' a. Gaa ne canacúun no' man núj, cataj no':

—Sese 'unj me chana amán ya rá ni'yaj man Diose sij 'nij ra'a man ní', rá nij soj, ne caran' soj ve' tucuj doj güii á —taj chana cu'naj Lidia rihaan núj a.

Ne rquee ndo'o no' man núj, ne caran' núj ve' tucua no' a.

Nana nihánj taj xna'anj se vaa catúj roj sí cu'naj Pabló ga Silas taga' che'é se quirii roj so' nana chree nimán 'o chana yaan rii suerté, tzaj ne racuj Diose man roj so' a

¹⁶Dan me se yo'ó güii ca'anj uún núj rej cachinj ni'yaj núj rihaan Diose, ne nari' tuvi' 'o chana yaan ga núj, ne nuu 'o nana chree nimán no', ne qui'yaj canaán ndo'o nij sí uun chij rihaan no' sa'anj, qui'yaj no' gaa quirii no' suerté che'é yuvii a. ¹⁷Dan me se canoco' ndo'o no' man núj ga Pabló, ne caguáj no', cataj no':

—Nij sí nihánj ro', me sí nuu rihaan Diose sí nicun' xtá', ne nata' nij so' rihaan soj me tucuaán canoco' soj ne ca'vee nanii soj rihaan sayuun ei —taj no', ni'yaj no' man núj a.

¹⁸Dan me se guun que'ee güii qui'yaj no' danj, gaa ne guun rmii Pabló, qui'yaj no', ne che'é dan canicaj so' ca'mii so' rihaan nana chree nuu nimán no', cataj so':

—Nihánj me se che'é suun nucuaj rqué Jesucristó manj a'ne' 'unj suun rihaan so' se vaa curihanj so' nimán chana nihánj á —taj Pabló rihaan nana chree yo' a.

Gaa ne nu' curihanj nana chree nimán no' a.

¹⁹Dan me se nij sí uun chij rihaan chana yaan yo' me se xcaj nij so' cuentá se vaa che'é se curihanj nana chree nimán chana yo' ro', che'é dan se ca'vee qui'yaj canaán nij so' doj sa'anj qui'yaj chana yaan yo', rá nij so' a. Che'é dan quita'aa nij so' man Pabló ga Silas, ne nucuaj rii nii man roj so' ca'anj nij so' yu'vee ndaa rihaan nij sí nicaj suun uun chij rihaan chuman' yo' a. ²⁰Gaa ne ca'anj nicaj nij so' man roj sí cu'naj Pabló ga Silas rihaan roj cuese uun chij rihaan chuman' yo', gaa ne cataj nij so' a:

—Roj sí nihánj me se nanj yuvii israelitá me roj so', ne uun rmii rá nu' nij sí man chiháán ní' 'yaj roj so' nanj á. ²¹'O se nata' roj so' tucuaán naca rihaan núj, ne nuveé tucuanj no' xcuún ní' nicaj ní' me tucuaán yo' che'é se sí noco' gobiernó ne Romá me ní' á —taj nij so' rihaan roj cuese uun chij rihaan chuman' yo' a.

²²Gaa ne 'o cunihaan guun rá nij yuvii man chuman' yo', ne caxrj yuva ndo'o nij so' man Pabló ga Silas a. Gaa ne nucuaj cuxuun roj cuese sagan' Pabló ga Silas ndaa se quitzin' yatzéj, ne ca'ne' roj cuese suun rihaan nij tanuu se vaa go' ndo'o nij tanuu rutzií xráá roj so' a. ²³Ne gaa quisj cayuun roj so', ne tagüéj nij tanuu man roj so' rá taga', ne ca'ne' roj cuese yo' suun

rihaan síi tumé taga' se vaa cūtumé uxrá so' man roj so' a. ²⁴Dan me se gaa cuno síi tumé taga' nana yo', ne canu' so' man roj so' rá 'o ve' rej rque taga' yo', ne caxríj so' tacóo roj so' rque yu'uj taj rque caj a.

²⁵Dan me se rej nij yan' achíin ni'yaj ndo'o roj síi cu'naj Pabló ga Silas ne achráá roj so' chra' rihaan Diose, ne uno nij síi man taga' se vaa 'yaj roj so', ²⁶ne dan me se cachén ndo'o yuún, ne ndaa nasqui' ndo'o tacóo ve' taga' yo', ne x'núj nu' nij ta'yaa taj rihaan taga' yo', ne nache nu' aga' ne' nuu chihá ra'a cunudanj nij síi 'nij taga' yo' a. ²⁷Ne nanuú rá síi tumé taga', ne quene'en so' se vaa táa ya'núj uun nij ta'yaa, gaa ne guun rá so' se vaa aj cunánj nij síi man taga', ne che'é dan quirii so' taneê so' neê espadá, ne daj doj se ticavi' so' man ma'an so' a. ²⁸Tzaj ne nucuj ndo'o caguáj síi cu'naj Pabló rihaan so', cataj Pabló:

—Se guun qui'yaj chi'ii so' man ma'an so' ma'. 'O se man chre' cunudanj núj nihánj nanj ei —taj Pabló, caguáj so' a.

²⁹Gaa ne canacúun síi tumé taga' se vaa ca'na' nijaj nii ya'an chuguun rihaan so', ne yoo ndo'o catúj so' rá taga', ne ri'ij ndo'o man so' che'é se chu'vi' so', ne cayáan ruj so' ndaa canó tu'va so' rihaan yo'óo rihaan roj síi cu'naj Pabló ga Silas a. ³⁰Dan me se ca'anj nicaj so' man roj so' xe', ne xná'anj so' man roj so', cataj so':

—Daj qui'yáj, gaa ne ca'vee naniij 'unj rihaan sayuun quirán' 'unj nihánj ga —taj so', xná'anj so' man roj so' a.

³¹Gaa ne cataj roj so':

—Cuchuman rá so' ni'yaj so' man Jesucristó sij 'nij ra'a man ní', gaa ne naniij so' rihaan sayuun nihánj do', rihaan chrej chi'ii uun chij nimán so' do' a. Ne danj inanj qui'yaj nij tuví' soj, gaa ne cavii sa' cunudanj soj rihaan Diose á —taj roj so' rihaan síi tumé taga' yo' a.

³²Gaa ne nata' roj so' se-nana Diose sij 'nij ra'a man ní' rihaan nu' nij tucua so' a. ³³Dan me se rej nij me yo', ne maan orá dan nicaj síi tumé taga' yo' man roj so', ne na'nu' so' xráá roj so' rej canó rutzii, ne nu' qui'yaj so' danj, ne nu' cata' ne nu' nij tucua so' a. ³⁴Gaa ne ca'anj nicaj so' man roj so' rej xraj rej ne ma'an so', ne go' so' se chá cha roj so' a. Gaa ne dan me se guun niha' uxrá rá nij tucua so', che'é se cuchumán rá nij so' ni'yaj nij so' man Diose a.

³⁵Gaa ne rej ranga' me se ca'née roj cuese man misión taga', ne cataj nij misión rihaan síi tumé taga' a: —Na'nej so' man roj snó'o yo' á —taj nij so' a.

³⁶Gaa ne cuchi' síi tumé taga' yo' rihaan Pabló, ne nata' so' se-nana nij misión rihaan Pabló, cataj so': —Ca'née roj cuese nana se vaa na'nej 'unj man roj soj nanj á. Che'é dan cuano nihánj me se ca'vee ca'anj roj soj, ne gaa xej nimán roj soj á —taj so' rihaan Pabló a.

³⁷Gaa ne cataj Pabló rihaan nij misión a:

—Dan me se roj cuese yo' ro', nda' se sij romanó me rój, tzaj ne ne naqui'yaj cuu roj so' che'é rój, ne maan se go' rma'an nii rutzii xráá

rój, qui'yaj roj so', ne quene'en cunudanj nij yuvii man rój se vaa cayuun rój, gaa ne caxrj roj so' taga' man rój a. Ne nihánj me se uun rá roj so' quirii yuve roj so' man rój xe', tzaj ne se guun danj ma'. Tananj ca'na' ma'an roj so' nihánj, gaa ne ve'é quitaj yaan roj so' rihaan rój curihanj rój taga' nihánj á —taj Pabló rihaan nij misión ca'na' taga' a.

³⁸Dan me se nata' nij misión se-nana Pabló rihaan roj cuese yo', gaa ne cuchu'vi' ndo'o roj so' gaa cuno roj so' nana se vaa sij romanó me Pabló ga Silas a. ³⁹Gaa ne cuchu' roj cuese taga', gaa ne ca'mii sa' roj so' ga roj sí cu'naj Pabló ga Silas a. Gaa ne quitáa yaan roj cuese rihaan roj so' curihanj roj so' taga', ne ve'é cachín ni'yaj roj cuese rihaan Pabló ga Silas se vaa qui'yaj roj so' se ndo'o, curihanj roj so' chuman' yo' a. ⁴⁰Dan me se gaa quisj curihanj roj so' taga', gaa ne ca'anj roj so' tucua' chana cu'naj Lidia a. Gaa ne gaa quene'en roj so' man nij tinúu nij so' sí noco' man Jesucristó, ne ca'mii roj so' ga nij so', ne cunuu xej nimán nij so' qui'yaj se-nana roj so', gaa ne curihanj roj so' chuman' yo', ne ca'anj roj so' a.

Nana nihánj taj xna'anj se vaa ca'maan rá nij sí man chuman' Tesalónica ni'yaj nij so' man Pabló ga Silas a

17 Dan me se cachén roj so' chuman' Anfípolis do', chuman' Apolonia do', gaa ne catúj roj so' chuman' Tesalónica a. Ne chuman' Tesalónica ro', ne

'o ve' tucu'yón nij yuvii israelitá se-tucuanj Moisés a. ²Dan me se catúj Pabló rá ve' yo' rej nuu chre' nij yuvii israelitá yo', ndaa vaa u'yón inanj so' qui'yaj so' a. Ne va'núj ya güii cuetan' naránj rá nij so' nanó Pabló cuentó ga nij so' che'é nana no rihaan danj Diose a. ³Dan me se cataj xna'anj Pabló rihaan nij so' se vaa sí ca'née Diose tinanii man yuvii rihaan sayuun me se no xcúún so' quiran' so' sayuun ne cavi' so' ne cunuu i'na' uún so', ne cataj Pabló se vaa ma'an Jesucristó sí nata' Pabló che'e rihaan nij so' ro', ma'an ya so' me sí ca'née Diose tinanii man yuvii rihaan sayuun a. ⁴Gaa ne ta'aj nij sí israelitá cuno se-nana Pabló ro', cuchumán rá nij so' ni'yaj nij so' man Jesucristó, ne guun tuvi' nij so' ga Pabló ne ga Silas a. Ne cuchumán rá que'ee ndo'o nij sí yanj a'mii xna'ánj griego aráj guee inanj rihaan Diose do', que'ee nij chana raa doj ne chuman' yo' do', cuchumán rá a.

⁵Tzaj ne guun xcoj ruvaa rá yo'ó nij yuvii israelitá ni'yaj nij so' man roj sí cu'naj Pabló ga Silas, ne che'é dan nano' nij so' doj sí chi'ii man yu'vee, ne cunuu chre' ndo'o yuvii, qui'yaj nij sí chi'ii yo', gaa ne naxumaan ndo'o sayuun chuman' yo', qui'yaj nij so' a. Gaa ne cuchu' nij yuvii yo' rihaan ve' tucua' sí cu'naj Jasón ve' caran' sí cu'naj Pabló ga Silas, ne guun rá nij yuvii quirii nij so' man roj so' ndaa rihaan yuvii cunuu chre' a. ⁶Dan me se nuvi' roj so' ne rá ve' yo' gaa cuchu' nij yuvii nano' man roj so' ma'. Che'é dan quirii nij yuvii

man ma'an sís cu'naj Jasón do', man yo'ó nij tinúú ní' sís noco' man Jesucristó do', ne nucuaj rií nij yuvií man nij so' ndaa rihaan nij sís uun chij rihaan chuman' yo' a. Gaa ne caguáj nij yuvií, cataj nij yuvií:

—Nij sís nihánj 'yaj natuná tucuáán naj rihaan yuvií man nu' caxra' rihaan chumii, tzaj ne nihánj me se ndaa chiháán ní' 'na' nij so' tirí' nij so' yaj nanj chuguanj. ⁷Ne sís cu'naj Jasón nihánj me se taj ya'anj so' man roj so' adonj. Ne cunudanj nij so' ro', inanj se vaa na'vej rá sís cu'naj César qui'yaj yuvií 'yaj nij so' nanj á. 'O se tucu'yón nij so' rihaan yuvií se vaa Jesucristó me yo'ó sís nicaj suun rey uun chij rihaan ní' nanj ei —taj nij yuvií israelitá, caguáj nij so', cuno nij sís uun chij rihaan chuman' Tesalónica yo' a.

⁸Dan me se cuyanj ndo'o rá nij sís uun chij do', yo'ó nij yuvií ne chuman' yo' do', gaa cuno nij so' nana yo', ⁹gaa ne cata' tu'va nij tuví' sís cu'naj Jasón se vaa se guun qui'yaj nij so' doj sayuun, ne ndaa cuchruj nij so' sa'anj, ne na'néé nij sís uun chij yo' chrej man nij so' a.

Nana nihánj taj xna'anj se vaa ca'mii natáj sís cu'naj Pabló ga Silas se-nana Diose rihaan nij sís man chuman' Berea a

¹⁰Dan me se maan orá rej nij güii yo' ca'néé nij tinúú ní' sís man chuman' Tesalónica man sís cu'naj Pabló ga Silas ca'anj roj so' ndaa chuman' Berea a. Gaa ne cuchi' roj so', ne catúj roj so' rá ve' tucu'yón nij yuvií israelitá se-tucuanj Moisés a. ¹¹Ne nij sís israelitá

yaj chuman' Berea me se sa' doj vaa nimán nij so' rihaan nij sís israelitá yaj chuman' Tesalónica yo' a. 'O se aran' rá nij so' cuno nij so' se-nana Diose, ne daj a nij güii yaj ndo'o nayaa nij so' danj Diose, che'é se guun rá nij so' xcaj nij so' cuentá sese ya ya cuyaan vaa se-nana Pabló ga nana no rihaan danj Diose a. ¹²Che'é dan que'ee ndo'o nij so' cuchumán rá ni'yaj man Jesucristó a. Ne nij sís yaníj a'mii xna'ánj griego me se que'ee tuvi' nij so' chana ni'yanj nimán do', sn'ó do', cuchumán rá ni'yaj man Jesucristó a.

¹³Dan me se xcaj nij sís israelitá yaj chuman' Tesalónica cuentá se vaa ndaa chuman' Berea nata' uún sís cu'naj Pabló se-nana Diose rihaan nij yuvií a. Che'é dan ca'anj nij so' chuman' Berea yo', ne ca'mii ne nij so' che'é Pabló, ne cuyanj rá nij sís man Berea ni'yaj nij so' man sís cu'naj Pabló ga Silas, qui'yaj nij sís man Tesalónica yo' a. ¹⁴Gaa ne nu' ca'néé nij tinúú ní' man Pabló ca'anj so' ndaa tu'va na ya'anj, tzaj ne quináj sís cu'naj Silas do', sís cu'naj Timoteo do', chuman' Berea yo' a. ¹⁵Ne ta'aj nij sís man Berea yo' me se ca'anj tacuachéé man Pabló, ne ca'anj nicaj nij so' man so' ndaa chuman' Atenas a. Gaa ne rqué Pabló nana rihaan nij sís man Berea nata' nij so' rihaan sís cu'naj Silas ga Timoteo se vaa cuaj ca'na' roj so' rihaan Pabló a. Gaa ne canicaj nij sís man Berea yo' quinan' nij so' chiháán nij so' a.

Nana nihánj taj xna'anj che'é nij nana ca'mii natáj Pabló rihaan nij sís man chuman' Atenas a

¹⁶Dan me se gaa na'vij Pabló ca'na' roj sís cu'naj Silas ga Timoteo

chuman' Atenas, ne ve'lee ndo'o nimán Pabló gaa quene'en so' se vaa man ndo'o ya'anj qui'yaj ra'a nij síi man Atenas yo' rque chuman' yo', ¹⁷ne che'é dan nanó ndo'o so' cuentó ga nij yuvii israelitá do', ga nij síi yanij aráj guee rihaan Diose do', rá ve' tucu'yón nij so' se-tucuanj Moisés a. Ne daj a güii ca'anj so' yu'vee, ne nanó so' cuentó ga me ma'an síi chéé yu'vee yo' a. ¹⁸Dan me se man ndo'o síi chruun yanj ne chuman' Atenas yo', ne ta'aj nij so' me síi tucu'yón se-nana síi cu'naj Epicuro, ne yo'ó ta'aj nij so' cu'naj estoico a. Ne doj tuvi' nij so' nanó cuentó ga Pabló a. Dan me se ta'aj nij so' cataj:

—Me taj síi nihánj tu'va rma'an so' danj, rá soj ga —taj nij so', xná'anj nij so' man tuvi' nij so', ni'yaj nij so' man Pabló a.

Ne yo'ó ta'aj nij so' cataj:

—Síi nata' se-nana ya'anj curuvi' naca me so' nanj á —taj yo'ó ta'aj nij yuvii, ese nata' Pabló se-nana Jesucristó nana sa' rihaan nij so', ne nata' Pabló se vaa ca'vee cunuu i'na' uún nij síi cavi' a.

¹⁹Dan me se ca'anj nicaj nij so' man Pabló ra' 'o quij le'ej cu'naj Areópago, ne cataj nij so' rihaan Pabló:

—Qui'yáá so' se ndo'o cataj xna'anj so' rihaan núj daj vaa nij nana naca nana tucu'yón so' rihaan yuvii á. ²⁰O se caráya'anj ndo'o núj ta'aj nij nana ca'mii so' cuno núj, ne che'é dan me rá núj xcaj núj cuentá daj vaa tucuaán tucu'yón so' a —taj nij síi man Atenas rihaan síi cu'naj Pabló a.

²¹O se nij síi man chuman' Atenas do', nij síi 'na' aran' chuman'

Atenas do', inanj uun rá nij so' nata' nij so' nana naca do', nari' nij so' nana naca do', nanj adonj.

²²Dan me se canicun' Pabló tanuu sca'núj nij so' ra' quij cu'naj Areópago, gaa ne cataj so' rihaan nij so':

—Cuno soj sij man chuman' Atenas nihánj ca'mij á. Aj ne'enj se vaa sij aran' ndo'o rá na'vij rihaan nij ya'anj me nij soj adonj. ²³O se gaa cachenj chuman' man soj, ne quene'én 'unj nij rej na'víj soj rihaan nij ya'anj noco' soj, ne quene'én 'unj yo'ó chraan altar, ne nana no rihaan chraan altar yo' cataj, “Rej na'víj ní' rihaan ya'anj ne ne'en ní' man a”, taj nana no rihaan chraan altar yo' a. Ne xa' 'unj, tzaj ne nihánj me se nata' 'unj rihaan nij soj che'é ma'an ya'anj yo' ya'anj na'víj soj rihaan, ya'anj ne ne'en soj man nanj adonj.

²⁴”Dan me se Diose ro', me ya'anj qui'yaj nu' chumii do', nu' rasuun man rihaan chumii do', ne se ca'vee guun tucua so' ve' une' yuvii cane so' che'é se so' me síi 'nij ra'a nu' rej xta' nu' yo'óo nu' a. ²⁵O se so' me síi 'yaj vaa i'na' ní', ne so' me síi 'yaj naránj ní' nana, ne dan me se rque so' nu' rasuun achiin man ní' adonj. Ne che'é dan taj vaj rasuun achiin man so', ne se ca'vee ra'cuíj yuvii man so' ma'. ²⁶Ne orún' snó'o qui'yaj so' asij rque ro', veé ton dan qui'yaj so' man daj a x'ne' nij yuvii, che'é rej cayáán nij yuvii rihaan nu' cachra' chumii adonj. Ne aj ne'en Diose me daj yo' cayáán 'o 'o x'ne' nij yuvii rihaan chumii, ne aj ne'en Diose me rej guun ran' to'óo 'o 'o x'ne' nij yuvii ei. ²⁷O se

guun rá Diose se vaa xcaj nij yuvii cuentá che'é Diose ne nari' nij yuvii man Diose chuguanj. 'O se nuveé sij ne gan' ndo'o rihaan 'o 'o ní' me Diose ma'. ²⁸'O se vaa i'na' ní', 'yaj so', ne chéé ní', 'yaj so', ne vaa ní' rihaan chumii nihánj, 'yaj so' adonj. 'O se ta'aj tuvi' nij soj síi chruun yanj cachrón nana nihánj rihaan yanj se vaa: "'O se ndaa ta'níi so' me ní' adonj'", taj ta'aj tuvi' ma'an soj nanj ei. ²⁹Ne che'é se ta'nij Diose me ní' ro', che'é dan ne nó xcúun ní' guun rá ní' se vaa ase vaa Diose ro', danj vaa nij aga' oró míi titaa ní' do', nij aga' platá catzii titaa ní' do', nij yahij acó'j ní' do' ma'. 'O se inanj rasuun avii raá ma'an ní' yuvii me nij rasuun vaa danj ei.

³⁰"Dan me se asij rque me se ne qui'yaj Diose sayuun man nij síi na'víj rihaan aga' do', rihaan yahij do' ma'. 'O se ne ca'vee xcaj nij yuvii cuentá ma'. Tzaj ne yaj me se cataj xna'anj Diose rihaan nij yuvii man cunudanj nij chuman' naj rihaan chumii se vaa canicaj nimán nij yuvii canoco' nij yuvii tucuáan sa' adonj. ³¹Ne dan me se cachrón Diose 'o güii ca'ne' nica so' cacun' che'é cunudanj nij yuvii man rihaan chumii a. Ne aj cune' so' man 'o snó'o guun síi ca'ne' cacun' che'é yuvii a. Ne che'é se cunuu i'na' uún snó'o yo', qui'yaj Diose, gaa cavi' so', ne che'é dan no xcúun cunudanj yuvii cuchuman rá nij yuvii se vaa veé ya snó'o yo' me so' adonj —taj Pabló rihaan nij síi man Atenas yo' a.

³²Dan me se gaa cuno nij síi man Atenas nana se vaa cunuu i'na' uún 'o síi cavi', ne ta'aj nij so' ca'nga' nacoo, ne yo'ó ta'aj nij so' cataj:

—Ndaa yo'ó güii uún me se ca'na' núj cuno núj se-nana so' nanj ei —taj yo'ó ta'aj nij síi man chuman' Atenas yo' a.

³³Veé dan, ne curihanj Pabló sca'núj nij so' a. ³⁴Tzaj ne doj nij yuvii guun tuvi' ga Pabló, ne cuchumán rá nij so' ni'yaj nij so' man Jesucristó a. Ne yo'ó so' me 'o síi uun chij cu'naj Dionisio, ne yo'ó no' me chana cu'naj Dámaris, ne vaa doj yuvii ga nij so' uún a.

Nana nihánj taj xna'anj che'é suun qui'yaj suun Pabló chuman' Corinto a

18 Cachén doj, gaa ne cavii Pabló chuman' Atenas, ca'anj so' ndaa chuman' Corinto a. ²Tihaj yuun nari' tuvi' so' ga 'o síi israelitá cu'naj Aquila, ne xa' so', tzaj ne sij cavii rej cu'naj Ponto me so', ne gaa cayáan so' chuman' Romá, ne ca'ne' síi nicaj suun emperador cu'naj Claudio suun se vaa cavii cunudanj nij yuvii israelitá chuman' Romá ca'anj yaníj nij so' a. Che'é dan cavii so' ga nica so' chana cu'naj Priscila yo'óo nocoo cu'naj Italia, ne che'é dan sij ca'na' naca chuman' Corinto me roj so' a. Dan me se cuchi' Pabló rihaan roj so', ³ne che'é se cuyaan vaa suun 'yaj suun Pabló ga suun 'yaj suun roj so' ro', che'é dan caran' Pabló ga roj so', ne qui'yaj suun so' ga roj so' a. ⁴Ne daj a nij güii cuetan' naránj rá nij yuvii israelitá me se ca'mii so' ga nij yuvii cunuu chre' rá ve' tucu'yón nij yuvii israelitá se-tucuanj Moisés, ne cuchumán rá doj síi israelitá do', doj síi yaníj a'mii xna'ánj griego do', gaa cuno nij so' se-nana so' a.

⁵Dan me se gaa cavii síi cu'naj Silas ga Timoteo estadó Macedonia ca'na' roj so' chuman' Corinto, ne yo'ò ca'née nimán Pabló nata' so' se-nana Diose rihaan nij yuvii, ne inanj cataj xna'anj so' rihaan nij yuvii israelitá se vaa Jesucristó me síi ca'née Diose tīnanii man yuvii rihaan sayuun a. ⁶Tzaj ne ca'mii canó tuvi' nij yuvii israelitá ga Pabló, ne quij ca'mii nij so' che'é Pabló a. Che'é dan tucuayuu so' yo'óo tachruu nò rihaan sagan' so', gaa ne cataj so' rihaan nij yuvii a:

—Ma'an inanj soj me rá ca'anj rihaan ya'an nanj á. Ne tumé 'unj cacun' se vaa quiran' soj sayuun qui'yaj Diose ma'. Ne yaj me se rej rihaan nihánj me se ca'anj 'unj nata' 'unj se-nana Diose rihaan nij síi yaníj nanj á —taj Pabló rihaan nij so' a.

⁷Gaa ne cavii so' rej mán nij so', ne ca'anj so' ve' tucua' 'ò síi cu'naj Titó Justo, ne so' ro', me 'ò síi yaníj ne 'ò síi aráj guēe rihaan Diose me so', ne ve' tucua' so' ro', ne rej x'nuj ve' tucu'yón nij yuvii israelitá se-tucuanj Moisés a.

⁸Dan me se 'ò síi cu'naj Crispo síi 'nij ra'a ve' tucu'yón nij yuvii israelitá se-tucuanj Moisés ro', me 'ò so', ne cuchumán rá nu' nij tucua' so' ni'yaj nij so' man Diose sij 'nij ra'a man ní' a. Gaa ne cuchí' nana rihaan nij síi man Corinto se vaa síi cu'naj Crispo me síi cuchumán rá ni'yaj man Diose sij 'nij ra'a man ní', ne che'é dan cuchumán rá uún que'ee nij so' ni'yaj nij so' man Jesucristó, ne cata' ne cunudanj nij so' a.

⁹Ne rej nií me se naqui'yaa Diose sij 'nij ra'a man ní' rihaan Pabló, ne cataj so' a:

—Se cuchu'ví' so' ma'. Yo'ò ca'mii so' se-nanaj, ne se gaa dínj tu'vá so' ma'. ¹⁰'O se vaj 'unj ga so', ne taj vaj síi go' mán so' ne qui'yaj chí'ii mán so' ma'. 'O se man uxrá yuvii man chuman' nihánj canoco' manj adonj —taj Diose sij 'nij ra'a man ní' rihaan Pabló a.

¹¹Gaa ne dan me se quináj Pabló 'ò yo' táa yanée, tucu'yón so' se-nana Diose rihaan nij síi man chuman' Corinto yo' a.

¹²Dan me se yo' dan me se síi cu'naj Galión me síi nicaj suun gobernador uun chij rihaan chuman' Corinto yo' a. Ne naxumaan yuvii israelitá, ne yo'ò me nimán nij so' ni'yaj nij so' man Pabló, ne ca'anj nicaj nij so' man Pabló rihaan síi nicaj suun cu'naj Galión yo', che'é rej naqui'yaj cuu so' che'é Pabló a.

¹³Gaa ne cataj nij so':

—Síi nihánj ro', 'yaj tanáj xco yuvii se-tucuanj núj che'é suun na'víj nij yuvii rihaan Diose, ne ino' doj na'víj nij yuvii rihaan Diose, 'yaj síi nihánj ei —taj nij yuvii israelitá yo', ni'yaj nij so' man Pabló a.

¹⁴Daj doj tzín' se cavii nana tu'va Pabló, tzaj ne ma'an síi cu'naj Galión me síi ca'mii rihaan nij yuvii israelitá yo', ne cataj so':

—Cuno soj sij israelitá ca'mij á. Sese vaa cacun' chí'ii qui'yaj síi nihánj, ne nò xcúnj cunoj se vaa taj soj saj á. ¹⁵Sese taj, gaa ne che'é inanj se-nana soj do', che'é se-tucuanj soj do', araa soj cacun' xráá so', gaa ne che'é dan ma'an soj nò xcúún ca'ne' cacun' che'é so' nanj adonj. 'O se xa' 'unj nihánj, tzaj ne na'vej uxrá raj naqui'yaj cuú 'unj che'é rasuun vaa danj ma' —taj

sí cu'naj Galión rihaan nij yuviï israelitá yo' a.

¹⁶Gaa ne quirii so' man cunudañj nij so' tucua' suun a. ¹⁷Gaa ne quita'aa cunudañj nij yuviï man sí cu'naj Sóstenes sí 'nij ra'a man ve' tucu'yón nij so' se-tucuañj Moisés, ne go' nij so' chruun xráa so' rihaan tucua' suun a. Tzaj ne ne rihuun rá sí cu'naj Galión yo' gaa qui'yaj nij so' danj a ma'.

**Nana nihánj taj xna'anj se
vaa nanicaj Pabló nan' so'
chuman' Antioquía a**

¹⁸Dan me se guun que'ee doj güii guun raan Pabló ga nij tinúu ní' sí ne chuman' Corinto, gaa ne cataj so' se vaa ca'anj so', ne cavii so' rque rihoo chée rihaan na, ne ca'anj so' ndaa estadó cu'naj Siria, ne ca'anj chana cu'naj Priscila do', sí cu'naj Aquila do', ga so' a. Tzaj ne asino yaan caca caan nii raaj Pabló, qui'yaj Pabló, gaa vaj nij so' chuman' Cencrea, che'é se aj cata' tu'va so' 'o nana rihaan Diose a. ¹⁹Dan me se cuchi' nij so' chuman' Efeso, ne tanáj Pabló man roj so' chuman' yo' a. Gaa ne catúj ma'an so' rá ve' tucu'yón nij yuviï israelitá se-tucuañj Moisés, ne ca'mii so' ga nij yuviï che'é se-nana Diose a. ²⁰Ne cachín ni'yaj nij sí man chuman' Efeso se vaa guun raan so' doj chiháan nij so', tzaj ne ne ca'vej so' a. ²¹Tzaj ne cataj so':

—Ca'anj 'unj nanj ei. Vaa che'é ndo'o canicún' 'unj 'o cha'anj canuü chuman' Jerusalén, tzaj ne sese Diose ca'vej, ne ndaa yuún xe ca'na' uún 'unj a —taj so', ne cavii so' rque rihoo chée rihaan na, ne tanáj so' man chuman' Efeso yo' a.

²²Dan me se ca'anj so' ndaa chuman' Cesarea, ne cavii so' ca'anj ni'yaj so' man x'ne' nij sí amán rá ni'yaj man Jesucristó yanj chuman' Jerusalén a. Gaa ne nanij so' ndaa chuman' Antioquía a. ²³Ne guun raan so' doj chuman' Antioquía, gaa ne ca'anj so' ndaa vaa naj 'o 'o chuman' naj estadó Galacia do', estadó Frigia do', ne nari' nucaj rá cunudañj nij sí tucu'yón se-nana Jesucristó yanj nij chuman' yo', qui'yaj so' a.

**Nana nihánj taj xna'anj
che'é sí cu'naj Apolos a**

²⁴Dan me se vaa 'o sí israelitá cu'naj Apolos, ne sij cavii chuman' Alejandría me so', ne sij ve'é ndo'o a'mii me so', ne sa' uxrá nari' so' danj Diose a. Dan me se ca'anj so' ndaa chuman' Efeso a. ²⁵Ne aj nari' so' se-tucuañj Diose sij 'nij ra'a man ní', ne guun ndo'o rá nimán so', ne che'é dan nica nata' so' ne tucu'yón so' se-nana Jesucristó rihaan nij yuviï a. Tzaj ne ataa xcaj so' cuentá se vaa no xcúun yuviï cata' ne yuviï che'é Jesucristó, ne inanj quene'en so' daj qui'yaj sí cu'naj Juan gaa cuta' ne Juan man yuviï a. ²⁶Dan me se guun che'e so' ve'é ca'mii natáj so' rá ve' tucu'yón nij yuviï israelitá man chuman' Efeso se-tucuañj Moisés a. Ne cuno chana cu'naj Priscila do', sí cu'naj Aquila do', gaa ne nicaj tuvi' roj so' ga so', ne nica doj ne sa' doj tucu'yón roj so' se-tucuañj Diose man Apolos a.

²⁷Dan me se guun rá sí cu'naj Apolos cachén so' ndaa estadó Acaya, gaa ne doj a nari' nucaj so' qui'yaj nij tinúu ní' sí man

chuman' Efeso, ne qui'yaj nij so' yanj cartá nayaá nij sí tucu'yón se-nānā Jesucristó man estadó Acaya, ne cataj nij so' se vaa ve'é nīcaj tuvi' nij sí man Acaya ga sí cu'naj Apolos yo' a. Gaa ne gaa cuchí' sí cu'naj Apolos ndaa estadó Acaya, ne racuúj ndo'o so' man nij tinúú ní' sí cuchumán rá ni'yaj man Jesucristó che'é se luj qui'yaj Diose a. ²⁸Q se cunaj uxrá tihaan so' rihaan nij yuvií israelitá ne amán rá ni'yaj man Jesucristó se vaa taj danj Diose se vaa Jesucristó me sí ca'neé Diose tinanii man yuvií rihaan sayuun, ne ca'mii canó tuvi' so' ga nij so' rej man ndo'o nij yuvií, ne qui'yaj canaán se-nānā sí cu'naj Apolos rihaan se-nānā nij sí israelitá yo' a.

Nana nihánj taj xna'anj se vaa ca'na' Nimán Diose rihaan nij sí tucu'yón se-nānā Jesucristó yanj chuman' Efeso a

19 Dan me se gaa cayáan sí cu'naj Apolos chuman' Corinto, ne cachén Pabló rej xraj doj cuchí' so' chuman' Efeso, ne nari' so' doj sí tucu'yón se-nānā Jesucristó a. ²Gaa ne xná'anj Pabló man nij so' a: —Ne catúj Nimán Diose nimán nij soj gaa cuchumán rá soj ni'yaj soj man Jesucristó na' —taj Pabló, xná'anj so' man nij so' a.

Gaa ne cataj nij so':

—Taj ma'. 'Q se a ne cunó núj nana se vaa vaa 'o Nimán Diose a ma' —taj nij so' rihaan Pabló a.

³Gaa ne xná'anj Pabló man nij so' a:

—Ne me sí che'e cata' ne nij soj ga —taj so', xná'anj so' man nij so' a.

Gaa ne cataj nij so':

—'Q se cata' ne núj ndaa vaa cataj xna'anj sí cu'naj Juan nanj á —taj nij so' rihaan Pabló a.

⁴Gaa ne cataj Pabló rihaan nij so' a:

—Xa' Juan, tzaj ne cuta' ne so' man yuvií che'é yan canicaj nimán nij yuvií canoco' nij yuvií tucuáan sa' a. Ne cataj Juan rihaan nij yuvií se vaa sí ca'na' rej xco Juan ro', me sí no xcúun nij yuvií cuchuman rá nij so' ni'yaj nij so' man, ne sí ca'na' rej xco Juan ro', me Jesucristó a —taj Pabló rihaan nij sí ne chuman' Efeso a.

⁵Dan me se gaa cuno nij so' nana vaa danj, gaa ne cata' ne nij so' che'é Jesucristó sij 'nij ra'a man ní' a. ⁶Gaa ne cuta' Pabló ra'a so' raa nij so', ne catúj Nimán Diose nimán nij so', ne ca'mii nij so' xna'ánj naca, ne nata' nij so' nana rqué Diose rihaan ma'an nij so' nata' nij so' a. ⁷Ne cunudanj nij snó'o me se quisíj ya 'o chuvij nij so' ta' asuun a.

Nana nihánj taj xna'anj se vaa ca'anj

Pabló ca'mii so' ga yuvií man rá escuela' 'nij ra'a sí cu'naj Tiranno a

⁸Gaa ne catúj Pabló rá ve' tucu'yón nij yuvií israelitá man chuman' Efeso se-tucuanj Moisés, ne va'nuy yavii 'o rihāan inanj ca'mii so' ga nij so' che'é se me rá so' cuchuman rá nij so' nana che'é suun uun chij Diose nimán yuvií do', rihaan chumií nihánj vaa güii do' a. ⁹Tzaj ne nichraj ndo'o rá ta'aj nij so', ne ne ca'vej rá nij so' cuchuman rá nij so' nana sa' yo' ma'. Gaa ne quij ca'mii nij so' che'é tucuáan noco' ní' cuno

cunudanj nij yuvii man rá ve' yo', gaa ne che'é dan tanáj Pabló man nij síí nichraj rá yo', ne ca'anj yaníj nij síí tucu'yón se-nana Jesucristó rihaan nij so', quí'yaj Pabló, ne ca'anj so' ve' escuelá 'nij ra'a 'o síí cu'naj Tiranno, ne daj a güii ca'mii so' ga yuvii rá ve' escuelá yo' a. ¹⁰Ne quisíj vij ya yo' quí'yaj so' danj, ne che'é dan cunudanj nij síí israelitá ga nij síí yaníj a'mii xna'ánj griego yanj estadó Asia xcaj cuentá che'é se-nana Jesucristó sij 'nij ra'a man ní' a.

Nana nihánj taj xna'anj se vaa quiran' nij ta'níí síí cu'naj Esceva sayuun, quí'yaj 'o nana chree a

¹¹Dan me se guun nucuaj Pabló quí'yaj so' suun sa' nocoo, quí'yaj Diose, ¹²ne ndaa nicaj nii se-vitó Pabló do', yatzíj numíj catuun Pabló do', ca'anj nii cuta' nii raaj nij síí ran', ne nahuun sa' nij síí ran', ne curihanj nana chree nimán nij síí ran' yo', quí'yaj Diose a. ¹³Ne vaa doj síí israelitá chée canó chuman', ne nij so' me síí uta' ra'a raaj síí ran' ne urihanj nana chree nimán nij síí ran' yo', 'yaj nij so' a. Ne cata' tu'va nij so' se-chuvii Jesucristó sij 'nij ra'a man ní' se vaa guun rá nij so' racuíj so' man nij so' quí'yaj nij so' ndaa vaa 'yaj Pabló a. Dan me se cataj nij so' rihaan nana chree a: “Nihánj me se a'né' 'unj suun rihaan nij soj nana chree se vaa curihanj soj nimán síí ran' nihánj che'é Jesucristó síí a'mii natáj síí cu'naj Pabló che'é á”, taj nij so' a. ¹⁴Ne vaa chij ta'níí 'o síí israelitá cu'naj Esceva, ne xrej atá suun nocoo doj me so', ne chij nij ta'níí so' ro',

ca'mii danj rihaan 'o nana chree nuu nimán 'o so' a. ¹⁵Gaa ne nana chree yo' ro', ca'mii rihaan nij so', ne cataj yo':

—Ne 'unj me se ne'enj man Jesucristó, ne ne'enj daj sij me Pabló a. Tzaj ne soj me se ne ne'en uxrá 'unj man soj a ma' —taj nana chree yo' rihaan chij nij so' a.

¹⁶Gaa ne síí nuu nana chree yo' nimán ro', güéj so', ne tuguáj tuvi' so' ga nij so', ne nucuaj so' doj rihaan nij so', ne quí'yaj canaán so' man cunu' chij nij so' a. Dan me se cunánj nij so', curihanj nij so' rá ve' yo', ne cánj uun vaa nij so', ne quiran' ndo'o nij so' sayuun, quí'yaj síí nuu nana chree nimán yo' a.

¹⁷Gaa ne xcaj cunudanj nij yuvii israelitá ga nij yuvii yaníj a'mii xna'ánj griego yanj chuman' Efeso yo' cuentá se vaa quiran' chij nij so', ne che'é dan cuchu'vi' ndo'o cunudanj nij so', ne cataj nij so' se vaa sa' uxrá vaa Jesucristó sij 'nij ra'a man ní' a. ¹⁸Ne que'ee nij síí cuchumán rá ni'yaj man Jesucristó me se naxra' tu'va nij so', ne nata' ya nij so' che'é cacun' quí'yaj nij so' a. ¹⁹Ne que'ee nij síí quí'yaj chree gaa rque doj ro', naqui'yaj chre' nij so' danj nij so' yanj libró nq nana chree, ne caxríj ya'an nij so' man nij yanj yo', ni'yaj cunudanj nij yuvii a. Gaa ne narii nij so' cuentá me daj sa'anj nó nij yanj yo', ne quisíj vij chihaa chí' míj sa'anj platá catzii nó nij yanj tucuacaa nij so' a. ²⁰Veé dan me se cha'nuu uxrá se-nana Jesucristó sij 'nij ra'a man ní', ne nari' nucuaj doj se-nana so' a.

Nana nihánj taj xna'anj se
vaa ca'maan rá nij sí 'yaj
ya'anj aga' yanj chuman' Efeso
ni'yaj nij so' man Pabló a

²¹Veé dan gaa ne ca'née nimán Pabló cachén so' estadó cu'naj Macedonia ga Acaya ne ca'anj so' ndaa chuman' Jerusalén, ne cataj so' se vaa asa' quisj ca'anj so' ndaa chuman' Jerusalén, ne no xcúun so' ca'anj ni'yaj so' ndaa chuman' Romá, taj so' a. ²²Gaa ne ca'née so' vij tuvi' nij sí 'yaj suun ga so' catuu roj so' rej Macedonia a. Dan me se sí cu'naj Timoteo do', sí cu'naj Erasto do', me roj sí ca'née so', ne ma'an so' guun raan doj güii estadó Asia a. ²³Ne güii dan me se guun ndo'o sayuun che'é se-tucuanj ní' sij nocó' man Jesucristó a. ²⁴Dan me se vaa 'o sí cu'naj Demetrio ne sí 'yaj suun aga' me so', ne nij tuvi' nij so' nicaj aga' platá catzii ne 'yaj nij so' nuví le'ej nii, ne ase vaa ma'an nuví na'víj yuvií rihaan ya'anj chana cu'naj Diana vaa yo' a. Ne 'yaj canaán ndo'o nij so' sa'anj a. ²⁵Dan me se canacúun sí cu'naj Demetrio man cunudanj nij sí 'yaj suun ase vaa suun 'yaj suun ma'an so' ne chuman' Efeso yo', ne ca'mii natáj so' rihaan nij so', cataj so':

—Cunó nij soj nana ca'mij rihaan soj, tinuj. Dan me se aj ne'en soj se vaa che'é suun 'yaj suun ní' ro', che'é dan 'yaj canaán ndo'o ní' sa'anj á. ²⁶Ne nihánj me se aj ne'en ní' daj 'yaj sí cu'naj Pabló yo', ne ca'na nana rihaan ní' se vaa vaj so' nata' so' se-nana so' se vaa xa' ya'anj 'yaj yuvií, tzaj ne nuveé ya'anj ya me ya'anj vaa danj ma'.

Ne nuveé inanj chuman' Efeso nihánj me rej tu'va so' danj ma'. Tananj vaj so' ndaa nu' estadó Asia nihánj ta' asuun, ne cuchumán rá que'ee ndo'o yuvií man estadó Asia nihánj cuno nij so' se-nana Pabló, ne tanáj nij so' se-tucuanj ní' qui'yaj Pabló adonj. ²⁷Dan me se xraj ne vaa güii nachri' yuvií ni'yaj yuvií se-suun ní', gaa ne dan me se guun rá uún nij yuvií se vaa taj se gún' nuví na'víj ní' rihaan ya'anj chana sa' ndo'o cu'naj Diana a ma'. Ne cataj nij yuvií se vaa nuveé ya'anj sa' me no' ma'. Ne xa' no', tzaj ne nu' ní' sij man estadó Asia nihánj do', ndaa yuvií man rihaan nu' chumii do', na'víj rihaan no' ei —taj sí cu'naj Demetrio cuno nij tuvi' so' a.

²⁸Dan me se gaa cuno nij so' se-nana Demetrio, ne cuyanj uxrá rá nij so', ne caguáj nij so', cataj nij so':

—Guee uxrá Diana ta'anj ní' sij man Efeso ei —taj nij so', caguáj nij so' a.

²⁹Gaa ne yo'o nachej raa cunudanj nij yuvií man chuman' Efeso yo', ne quita'aa nij yuvií man sí cu'naj Gayo ga sí cu'naj Aristarco che'é se sij chéé ga Pabló me roj so', ne sij cavii estadó Macedonia me roj so' a. Dan me se nicaj cunudanj nij yuvií man roj so', ca'anj nij yuvií, ne cunánj nij so' catúj nij so' rej estadió nuu chre' que'ee ndo'o yuvií a. ³⁰Ne guun rá Pabló catuu so' rej man nij yuvií, tzaj ne ne ca'vej rá yo'ó nij sí tucuyón se-nana Jesucristó ca'anj so', ne ne ca'vee catuu Pabló rej yo' qui'yaj tuvi' so' a ma'. ³¹Ne ta'aj nij

sí uun chij rihaan nu' estadó Asia ro', me tuvi' Pabló, ne ca'néé nij so' nana rihaan Pabló se vaa daj chihaa mǝj se guun catuu Pabló rej cunuu chre' nij yuvií a.

³²Dan me se ino doj vaa nana caguáj 'o 'o ta'aj nij yuvií, che'é se nachej se-nana nij so' a. Ne me doj uxrá doj nij so' ne ne'en daj me che'é cunuu chre' nij so' ma'. ³³Dan me se tiguíj ra'a nii man sí cu'naj Alejandro, ne canicun' so' rihaan nij yuvií, qui'yaj nij yuvií israelitá, ne guun rá ta'aj nij yuvií se vaa ca'mii Alejandro rihaan nij so' a. Gaa ne tucunó ra'a so' rihaan nij yuvií se vaa dínj gaa tu'va nij yuvií, gaa ne ca'vee ca'mii nacaj so' rihaan chuman' a. ³⁴Tzaj ne xcaj nij yuvií cuentá se vaa sij israelitá me sí canicun' rihaan nij so', ne che'é dan yo'lo caguáj cunudanj nij yuvií, cataj nij so':

—Guee uxrá Diana ta'anj ní' sij man Efeso ei —taj taran' nij yuvií, ne cunú' vij ya orá caguáj nij so' danj a.

³⁵Ndaa síj, gaa ne ca'ne' rá nij yuvií caguáj nij so', qui'yaj sí utá' yanj tucúá suun, ne cataj ma'an so' rihaan nij yuvií a:

—Cuno soj sij man chuman' Efeso ca'mij á. Ya ya cunudanj yuvií man rihaan chumií ne'en se vaa chuman' Efeso nihánj me chuman' na'víj rihaan ya'anj guee cu'naj Diana ga yahij quinij rej xta' cuyaan vaa ga no' adonj. ³⁶Che'é se ya vaa nu' nana nihánj ro', che'é dan no xcúún nij soj dínj cumán soj, ne xcaj soj cuentá, ne se guun qui'yaj soj a doj se nij ma'. ³⁷O se ca'na' roj snó'o nihánj, qui'yaj soj, ne nuveé

sij qui'yaj se nij rque nuví me roj so', ne nuveé sij ca'mii nana nij che'é ya'anj na'víj ní' rihaan me roj so' ma'. ³⁸Dan me se xa' nij tuvi' sí cu'naj Demetrio, tzaj ne sese me rá nij tuvi' nij so' cuta' nij so' cacun' xráá 'o yuvií, ne vaa ya'núj rihaan nij so' ca'anj nij so' rihaan cuese, ne ca'vee cuta' nij so' cacun' xráá tuvi' nij so' nanj á. ³⁹Ne sese me rá soj naquiyaj cuu soj doj che'é yo'lo rasuun, ne güii nuu chre' ní' ndaa vaa tucúáán noco' ní' ro', güii dan me ca'vee qui'yaj soj danj ei. ⁴⁰O se nihánj me se ca'vee cuta' nii cacun' xráá ní' se vaa qui'yaj rma'an ní' sayuun cuan', ne se guun nucuaj ní' cataj xna'anj ní' me che'é me ca'na' ní' ne caguáj ndo'o ní' nihánj ma' —taj sí utá' yanj tucúá suun rihaan nij yuvií, ⁴¹gaa ne na'néé so' chrej man taran' nij so' a.

Nana nihánj taj xna'anj se vaa ca'anj Pabló estadó cu'naj Macedonia ga Grecia a

20 Dan me se gaa cha'nuu nij yuvií yo', gaa ne canacúún Pabló man nij sí tucuyón se-nana Jesucristó se vaa cunuu chre' nij so' ga so', ne nago' so' chrej nucuaj man nij so' a. Gaa ne quita'aa so' ra'a cunudanj nij so', ne cataj so' se vaa ca'anj so', ne veé dan cavii so' ne ca'anj so' ndaa estadó Macedonia a. ²Dan me se cachén so' nu' estadó Macedonia yo', ne nago' ndo'o so' chrej nucuaj man nij sí noco' man Jesucristó ne chuman' yo', gaa ne ca'anj so' ndaa estadó cu'naj Grecia a. ³Dan me se quisj va'núj yavii guun raan so' estadó Grecia yo', gaa ne guun

rá so' cavii so' rque rihoo chéé rihaan na ne ca'anj so' estadó cu'naj Siria, tzaj ne xcaj so' cuentá se vaa guun rá nij yuvii israelitá qui'yaj nij so' sayuun man so', ne che'é dan ca'néé nimán so' asino yaan cachee tacoj so' cachén so' sca'núj estadó Macedonia gaa ne canicaj so' ndaa estadó Siria a. ⁴Ne yo'lo tuvi' nij síí cachéé ga Pabló ro', me síí cu'naj Sópater, ne ta'níí síí cu'naj Piro me so', ne síí cavii chuman' Berea me so' a. Ne yavíj tuvi' nij so' me síí cavii chuman' Tesalónica, ne Aristarco do', Segundo do', cu'naj roj so' a. Ne yo'ó so' me síí cu'naj Gayo, ne síí cavii chuman' Derbe me so' a. Ne vaa síí cu'naj Timoteo, ne yavíj tuvi' nij so' me síí cavii estadó Asia, ne Tíquico do', Trófimo do', cu'naj roj so' a. ⁵Dan me se guun yaan nij so' rihaan núj, ca'anj nij so' chuman' Troas, gaa ne na'vij nij so' man núj rej yo' a. ⁶Gaa ne gaa cachén cha'anj chá nij yuvii israelitá chraa yo'óó trigó, ne cavii núj 'o rihoo chéé rihaan na, ne cavii núj chuman' Filipos, ca'anj núj, ne cachén 'un' güii, gaa ne cuchi' núj rihaan nij so' chuman' Troas yo' a. Gaa ne guun raan núj yo'ó chíj güii chuman' yo' a.

Nana nihánj taj xna'anj se vaa cunuu i'na' uún 'o síí cavi', qui'yaj Pabló a

⁷Dan me se güii cotungó me se gaa cunuu chre' taran' núj cuxra' ta'aj núj rachrúún, ne ca'mii natáj Pabló nana rihaan yo'ó nij tinúú ní' a. 'O se guun rá so' cavii so' ranga' yo'ó güii ca'anj so' níchrej, ne che'é dan yo'ó ca'mii so' ndaa guun ta'aj yan' a. ⁸Ne ve' nata' rej

nuu chre' nij so' me se man ndo'o aga' ya'an chuguun rá ve' yo' a.

⁹Dan me se táá 'o síí tachruu cu'naj Eutico 'o ta'yaa le'ej, ne che'é se xcaan ndo'o ca'mii Pabló, gaa ne che'é dan ca'na' ndo'o nej rihaan Eutico, ne yuun che'e cotoj so', ne quini' so' ca'anj so' rej taj xe' a. Dan me se ndaa rej nata' va'núj raá ve' táá so' gaa quini' so' a. Gaa ne nanij yo'ó nij so' rihaan yo'óó, ne naxcaj nij so' man so', tzaj ne aj cavi' un' so' nanj á. ¹⁰Gaa ne nanij Pabló, ne ca'anj quina'j Pabló rihaan nee man síí cu'naj Eutico yo', ne na'yaan Pabló man so', ne cataj Pabló rihaan yo'ó nij so' a:

—Se cuchu'vi' soj ma'. 'O se vaa i'na' so' ei —taj Pabló rihaan nij so' a.

¹¹Gaa ne cavii uún Pabló ga yo'ó nij so' rá ve' nata' yo', ne cuxra' ta'aj so' rachrúún chá nij so', ne dan me se gaa quisíj chá nij so', gaa ne ca'mii natáj so' doj rihaan nij so' ndaa se quisíj güii a. Gaa ne curiha'nj Pabló, ca'anj so' a. ¹²Dan me se cunuu i'na' uún xnii quini'j, ne ca'anj nicaj nii man so', ne guun xej ndo'o nimán taran' nij so' a.

Nana nihánj taj xna'anj se vaa cavii nij tuvi' Pabló chuman' Troas, ne ca'anj nij so' ndaa chuman' Mileto a

¹³Dan me se cavii núj rque rihoo chéé rihaan na, ne táá yaan núj rihaan Pabló, ca'anj núj chuman' cu'naj Asón a. 'O se guun rá Pabló cachee tacoj so' ca'anj so' chuman' Asón, ne che'é dan guun ya ca'mii Pabló ga núj se vaa nari' tuvi' núj ga so' chuman' Asón ne ca'anj taran' núj a. ¹⁴Dan me se gaa nari'

tuvii' núj gā Pabló chuman' Asón, ne cavii so' rque rihoo gā núj, ne ca'anj taran' núj ndaa chuman' Mitilene a. ¹⁵Gaa ne cavii rihoo chuman' Mitilene, qui'yaj núj, ne yo'ó güii me se cachén núj nichrun' rej naj chuman' cu'naj Quío a. Ne yo'ó güii uún me se cuchi' núj ndaa rej cu'naj Samos, ne yo'ó güii uún me se ca'anj núj ndaa chuman' cu'naj Mileto a. ¹⁶Q se guun ya rá Pabló se vaa se cachén so' chuman' Efeso, che'é se na'vej rá so' guun raan so' estadó Asia ma'. Tananj guun rá so' cuchi' ra'yanj so' chuman' Jerusalén che'é cha'anj Pentecostés canuú a.

Nana nihánj taj xna'anj daj ca'mii Pabló gā nij síi chij nicaj yu'unj man x'ne' nij síi cuchumán rá ni'yaj man Jesucristó yanj chuman' Efeso a

¹⁷Dan me se gaa caran' Pabló chuman' Mileto, ne ca'neé so' nana rihaan nij síi chij nicaj yu'unj man x'ne' nij yuvii cuchumán rá ni'yaj man Jesucristó yanj chuman' Efeso se vaa ca'nā' nij so' rihaan so' a. ¹⁸Dan me se gaa ca'na' nij so' rihaan Pabló, ne cataj Pabló rihaan nij so' a:

—Aj ne'en nij soj daj vaa 'unj daj a güii canej gā soj asij naca ca'ná' 'unj estadó Asia nihánj ndaa cuano a. ¹⁹Q vaa nica' nimán 'unj nuu 'unj rihaan Diose sij 'nij ra'a man ní', ne ne'en soj daj vaa ta'veé 'unj, ne daj vaa quirán' 'unj sayuun che'é se nuchruj raā nij síi israelitá qui'yaj nij so' sayuun manj a. ²⁰Dan me se ne a'ne' rá 'unj gā suun natá' 'unj rihaan soj nu' nana qui'yaj cavii sa' soj doj, ne tucu'yón 'unj nana

yo' rihaan soj rej cuno que'ee yuvii ca'mij do', ndaa rá ve' tucúa ma'an soj do', tucu'yonj man soj a. ²¹Ne 'o xraan inanj cataj xna'anj 'unj rihaan nij yuvii israelitá do', rihaan nij yuvii yanij a'mii xna'ánj griego do', se vaa no xcúún nij so' canicaj nimán nij so' canoco' nij so' man Diose ne cuchuman rá nij so' ni'yaj nij so' man Jesucristó sij 'nij ra'a man ní' a.

²²Ne nihánj me se guun ya raj se vaa no xcúnj ca'anj 'unj chuman' Jerusalén, qui'yaj Nimán Diose, tzaj ne ne ne'enj daj quiranj sese cuchij yo' ma'. ²³Tzaj ne ne'én 'unj se vaa me ma'an chuman' vaj 'unj, ne Nimán Diose 'o xraan inanj taj xna'anj rihaan 'unj se vaa vaa güii, ne caxrii nii taga' manj ne qui'yaj nii sayuun manj nanj adonj. ²⁴Tzaj ne a doj ne chu'ví' 'unj sese ndaa ticavi' nii mán 'unj rihaan chumi' nihánj a ma'. Tzaj ne ve'é inanj me raj tisij suun ca'ne' Jesucristó sij 'nij ra'a man ní' rihanj, ne che'é dan 'o xraan inanj taj xna'anj 'unj nana sa' rihaan yuvii che'é se luj qui'yaj Diose che'é taran' ní' a. ²⁵Ne nihánj me se ne'én 'unj se vaa nij soj sij cuno nana ca'mii natáj 'unj che'é suun uun chij Diose nimán yuvii do', rihaan chumi' nihánj vaa güii do', a 'ó soj se quene'en uún manj daj chihāa mīj a ma'. ²⁶Che'é dan me cuano yaj me se cataj yá 'unj rihaan soj se vaa nuveé 'unj me síi tumé cacun' sese ca'anj ni'ya 'o tuvi' soj rihaan Diose ma'. ²⁷Q se ne a'ne' rá 'unj gā suun taj xna'anj 'unj rihaan cunudanj soj nu' se vaa me rá Diose cuno soj ma'.

²⁸”Dan me se ase vaa tumé yuvii man daán yuvii matzinj ro', danj qui'yaj soj, tumé soj man ma'an soj do', man x'ne' nij sí amán rá ni'yaj man Jesucristó do' á. Dan me se Nimán Diosé me sí cune' man soj nicaj yu'unj soj man x'ne' nij sí amán rá ni'yaj man Jesucristó a. Ne dan me se quiránj Jesucristó man cunudanj nij sí noco' x'ne' yo' che'é ton cavii man ma'an so' adonj.

²⁹Dan me se ne'enj se vaa asa' ca'anj 'unj, ne catuu sí chi'ii sca'núj soj, ne ase vaa xca'yanj ca'nu' yuvaa ro', danj gaa nij sí chi'ii yo', ne se caráj x'naa nij so' man nij tinúu ní' nij sí noco' man Jesucristó, ne qui'yaj ndo'o nij sí chi'ii yo' sayuun man nij so' a. ³⁰Ne ndaa tuvi' ma'an ya soj me sí guun che'e tuguáj nij so' nana ya, che'é se guun rá nij so' canoco' nij sí tucu'yón se-nana Jesucristó man ma'an nij so' a. ³¹Che'é dan yo'o ni'yaj soj, ne xcaj soj cuentá á. 'O inanj nanuj rá soj se vaa rque va'núj ya yo' me se ne ca'ne' raj ga suun narqué chrej nucuaj man 'o 'o nij soj nuvii nigan' ma'. Ne ndaa ta'veé 'unj che'é soj adonj.

³²”Ne cuano nihánj me se nucuaj rá 'unj man ma'an Diosé se vaa tumé Diosé man soj, ne nucuaj rá 'unj man se-nana Diosé se vaa cuno soj nana yo' ne ca'vee qui'yaj ndo'o Diosé se luj che'é soj a. Dan me se sa' doj canoco' soj man Diosé, qui'yaj se-nana Diosé yo', ne guun tuví' soj ga cunudanj yo'ó nij sí cunuu sa' rihaan Diosé, ne ca'vee quirí' soj xna'anj ni'yaj cata' tu'va Diosé gaa rque adonj.

³³”Dan me se ne sijn uun ne rá guun si'yaj si'yaj yo'ó yuvii, se aga'

platá catzii do', se aga' oró mí do', se yatzíj sa' do', mé 'unj ma'. ³⁴Ne aj ne'en ma'an nij soj se vaa ma'anj ra'aj nihánj qui'yaj suun che'é rej ca'vee quirí' 'unj nij rasuun achiin manj do', achiin man nij sí chéé gaj do' a. ³⁵Cunudanj qui'yaj suun 'unj, che'é se guun raj xcaj soj cuentá se vaa no xcuún soj qui'yaj suun ma'an soj, che'é rej ca'vee racuíj soj man tinúu ní' sí achiin rasuun man a. Ne yo'o cunuú rá soj nana nihánj nana ca'mii ma'an Jesucristó sij 'nij ra'a man ní' a: “Síi rqué rasuun rihaan tuvi' ro', uun niha' rá so' doj rihaan síi ri' rasuun yo' ra'a tuvi' a”, taj síi 'nij ra'a man ní' a —taj Pabló rihaan nij sí chij nicaj yu'unj man x'ne' nij sí cuchumán rá ni'yaj man Jesucristó yanj chuman' Efeso a.

³⁶Dan me se gaa quisíj ca'mii Pabló nu' nana yo', gaa ne canicun' ruj so' ga nij so', ne cachín ni'yaj Pabló rihaan Diosé ga taran' nij so' a. ³⁷Gaa ne ta'vee uxrá cunudanj nij so', ne na'yaan nij so' man Pabló, ne cachrón tu'va nij so' xruu Pabló a. ³⁸'O se quinano doj rá nij so' che'é se-nana Pabló nana se vaa daj chihaa míj se quene'en uún nij so' man Pabló ma'. Gaa ne ca'anj tanáj nij so' man Pabló ndaa rej cavii so' rque rihoo chéé rihaan na a.

Nana nihánj taj xna'anj daj guun gaa ca'anj Pabló ndaa chuman' Jerusalén a

21 Dan me se gaa tanáj xcō núj man nij sí man chuman' Efeso, ne ca'anj núj vaj núj rque rihoo, ne yo'o chrej ca'anj núj, cuchí' núj rej cu'naj Cos, ne yo'ó

güii me se cuchi' núj ndaa rej cu'naj Rodas, ne ca'anj uún núj, cuchi' núj ndaa chuman' cu'naj Pátara a. ²Gaa ne nari' núj yo'ó rihoo ca'anj ndaa rej cu'naj Fenicia a. Gaa ne cavii núj rque rihoo, ne ca'anj núj a. ³Gaa ne quene'en núj yo'óo taj rihaan na ya'anj cu'naj Chipre, ne tanáj xco núj Chipre rej nichruun núj, ne cachén núj ca'anj núj ndaa estadó Siria a. Dan me se cuchi' núj chuman' Tiro, ne 'o se yo' me rej guun rá nij síí tumé rihoo tucuyuu nij so' cargá man rque rihoo rihaan yo'óo yo' a.

⁴Dan me se nano' núj man nij síí tucuyón se-nana Jesucristó yanj chuman' Tiro yo', ne nari' núj man nij so', ne chij güii caran' núj chuman' yo' a. Dan me se gaa nari' tuvi' núj, ne dan me se nata' nij so' nana rqué Nimán Diosé rihaan nij so' rihaan Pabló se vaa se guun ca'anj Pabló chuman' Jerusalén a.

⁵Dan me se gaa quisj chij güii yo', ne curihanj núj ca'anj núj rej taj rihoo rihaan na, ne cachéé cunudanj nij tucua nij síí tucuyón se-nana Jesucristó ga núj ndaa se cuchi' núj tu'va chuman' a. Gaa ne canicun' ruj núj rihaan yo'óo chruu naj tu'va na ya'anj rej yo', ne cachín ni'yaj núj rihaan Diosé, ⁶ne cataj núj rihaan tuvi' núj se vaa ca'anj núj, ne dan me se cavii núj rque rihoo, ne canicaj nij so' quinan' nij so' tucua nij so' a.

⁷Dan me se tanáj núj chuman' Tiro yo', ne ca'anj uún núj rque rihoo, ne cuchi' núj ndaa chuman' cu'naj Tolemaida, ne nanó núj cuentó ga nij tinúú ní' síí yanj chuman' yo', ne quináj núj orún'

güii ga nij so' a. ⁸Ne yo'ó güii me se cavii uún núj rque rihoo ga Pabló, ca'anj núj, ne cuchi' núj chuman' Cesarea, gaa ne catúj núj ndaa chuman' Cesarea, ne ca'anj núj ve' tucua síí cu'naj Felipé síí nata' se-nana Diosé nana sa' rihaan yuvií a. Ne so' ro', me 'o tuvi' chij nij síí rqué se chá rihaan nij chana cavi' nica yanj chuman' Jerusalén gaa rque doj a. Ne caran' núj tucua so' a. ⁹Ne vaa ca'anj ta'níí so' chana yaan, ne ca'anj nij no' me níí nata' nana rqué Diosé rihaan a. ¹⁰Dan me se gaa guun raan núj que'ee güii tucua síí cu'naj Felipé, ne nanij 'o síí cavii estadó Judea, ne síí nata' nana rqué Diosé rihaan me so', ne Agabo cu'naj so' a. ¹¹Dan me se ca'na' so' rihaan núj, ne nicaj so' marque 'nij catuun Pabló, numíj so' tacóo Pabló do', ra'a Pabló do' a. Gaa ne cataj so':

—Síí si'yaj yatzij nihánj me se ase vaa qui'yáá 'unj cuano nihánj ro', danj gaa qui'yaj nij síí israelitá man chuman' Jerusalén, numíj nij so' man so', ne taçuachén nij so' man so' ra'a nij síí yanj adonj —taj síí cu'naj Agabo yo' a.

¹²Dan me se gaa cuno núj nana yo', ne rquee uxrá núj ga nij síí yanj chuman' Cesarea yo' rihaan Pabló se vaa se cavii so' ca'anj so' ndaa chuman' Jerusalén ma'. ¹³Gaa ne cataj Pabló:

—Taj che'é ta'vee soj ne quinanó rá 'unj qui'yaj soj ma'. 'O se 'unj nihánj me se a'vej raj numíj nii manj ne ndaa ticavi' nii manj rej Jerusalén che'é se síí nata' che'é Jesucristó sj 'nij ra'a man ní' mej chuguanj —taj Pabló rihaan nij so' a.

¹⁴Ne taj se qui'yá' cunō so' se-nāna núj a ma'. Che'é dan ca'ne' rá núj, ne cataj núj:

—Qui'yaj Diose sij 'nij ra'a man ní' ndaa vaa me rá ma'an so' qui'yaj so' á —taj núj a.

¹⁵Dan me se quisj caran' núj chuman' Cesarea yo', gaa ne qui'yaj chuvii núj, ne cavii núj ca'anj núj ndaa chuman' Jerusalén a. ¹⁶Ne chéé ta'aj nij sí tucu'yón se-nāna Jesucristó yanj chuman' Cesarea ga núj, ne táa yaan nij so' rihaan núj ca'anj núj ve' tucúa 'o sí cu'naj Mnasón, caran' núj a. Ne sí cu'naj Mnasón me se sij cavii yo'óo taj rihaan na ya'anj cu'naj Chipre me so', ne aj quisj que'ee yo' tucu'yón so' se-nāna Jesucristó a.

Nana nihánj taj xna'anj se vaa cuchi' Pabló chuman' Jesusalén a.

¹⁷Dan me se gaa cuchi' núj chuman' Jerusalén, ne guun nihá' ndo'o rá nij tinúú ní' sí man Jerusalén nano nij so' cuentó ga núj a. ¹⁸Ne yo'ó güii me se ca'anj ni'yaj núj ga Pabló man sí cu'naj Santiagó ne catúj núj rque 'o ve' ne so', ne nari' chre' núj man nu' nij sí hij nicaj yu'unj man nij yuvii cuchumán rá ni'yaj man Jesucristó ga Santiagó a. ¹⁹Dan me se ve'é ca'mii sa' taran' núj, gaa ne cataj xna'anj Pabló rihaan nij sí hij nuu chre' ga Santiagó ndaa 'o 'o se vaa qui'yaj Diose ga nij sí yanj gaa nata' Pabló se-nāna Diose rihaan nij sí yanj yo' a. ²⁰Ne gaa cuno nij sí hij se-nāna Pabló, ne cataj nij so' se vaa sa' uxrá qui'yaj Diose ga nij sí yanj a. Gaa ne cataj nij tuvi' Santiagó rihaan Pabló a:

—Aj ne'éen so' se vaa que'ee mīj tuvi' ní' sij israelitá amán rá ni'yaj man Jesucristó, tinuj. Ne nij so' ro', me sí yanj uxrá qui'yaj nu' ndaa vaa taj se-tucuanj Moisés a. ²¹Ne cuchi' nana ne rihaan nij so' se vaa tucu'yón so' man cunudanj nij yuvii israelitá yanj chiháan nij sí yanj se vaa tanáj xco nij so' se-nāna Moisés, ne cataj so' se vaa ca'ne' rá nij so' ga suun uta' ta'nga' man ta'ní do', ga suun noco' se-tucuanj Moisés do' a. ²²Me se no xcúun ní' qui'yaj ní', rá so' ga. 'O se ya cunuu chre' yuvii gaa xcaj cunudanj nij so' cuentá se vaa ca'ná' so' nihánj adonj.

²³”Che'é dan me rá núj qui'yáá so' ndaa vaa cataj núj rihaan so' á. Dan me se vaa ca'anj tinúú ní', ne aj cata' tu'va ma'an nij so' rihaan Diose che'é 'o rasuun qui'yaj nij so' rihaan Diose a. ²⁴Ne me rá núj nīcaj tuví' so' ga nij so', ne cunuu guee so' rihaan Diose ga nij so', gaa ne naru'vee so' che'é xcuu nago' nij so' rihaan Diose, gaa ne ca'vee cacā caan nii raā nij so' ne quisij nu' se vaa cata' tu'va nij so' rihaan Diose á. Gaa ne xcaj nij tinúú ní' cuentá se vaa xa' nana cuno nij so' che'é so', tzaj ne ne ya vaa nana yo' ma'. Ne ma'an so' me sí noco' raan man se-tucuanj Moisés a.

²⁵”Ne xa' nij sí yanj amán rá ni'yaj man Jesucristó, tzaj ne aj ca'néé núj yanj cartá rihaan nij so', ne cataj xna'anj núj rihaan nij so' se vaa taj che'é canoco' ma'an nij so' se-tucuanj Moisés ma'. Maan se xcaj nij so' cuentá, ne se chá nij so' rasuun rque yuvii rihaan ya'anj cacój yuvii ma'. Ne se chá nij so' ton ma'. Ne se chá nij so' nee xcuu

tuguáj ni gaán chihá ma'. Ne snó'o do', chana do', se cotoj nij so' ga yo'ó yuvií sese ne nica nij so' me yo' ma'. Danj taj yanj ca'née núj rihaan nij so' adonj —taj nij síí chij yo' rihaan Pabló a.

²⁶Gaa ne nicaj tuvi' Pabló ga ca'anj nij snó'o yo', ne yo'ó güii me se cunuu guee so' ga nij so' rihaan Diose, ne catúj so' rá nuvií nocoo, ne nata' so' rihaan xrej me güii quisij cunuu guee nij so' rihaan Diose ne ca'na' nicaj nij so' nij rasuun guee nago' 'o 'o nij so' rihaan Diose a.

**Nana nihánj taj xna'anj daj
guun gaa quita'aa nii man
Pabló rá nuvií nocoo a**

²⁷Dan me se gaa nichrun' quisij chij nij güii nuu guee 'un' nij so' rihaan Diose, ne nij síí israelitá cavii estadó Asia ro', quene'en nij so' man Pabló rá nuvií nocoo, ne naxumaan cunudanj nij yuvií man rej yo', qui'yaj nij so', ne quita'aa nij so' man Pabló a. ²⁸Ne caguáj nij síí cavii estadó Asia, cataj nij so':

—Cunq soj sij israelitá ca'mii núj, ne racuíj soj man núj á. 'O se síí nihánj ro', me síí tucu'yón man nij yuvií yanj cunudanj chuman' se vaa nij vaa ní' sij israelitá do', se vaa nij vaa tucuáán noco' ní' do', se vaa nij vaa nuvií nocoo nihánj do', taj so' a. Ne ndaa yuvií yanj catúj nuvií nocoo nihánj, ne quirir' rej guee nihánj, qui'yaj so' nanj á —taj nij so', ni'yaj nij so' man Pabló a.

²⁹'O se aj quene'en nij so' man síí cu'naj Trófimo síí yanj cavii chuman' Efeso se vaa vaj so' ga Pabló rque chuman' Jerusalén, ne guun rá nij so' se vaa catúj síí cu'naj

Trófimo yo' rá nuvií nocoo, qui'yaj Pabló a.

³⁰Dan me se naxumaan cunudanj nij yuvií man chuman' Jerusalén yo', ne cunánj nij so' ndaa nuvií nocoo, gaa ne quita'aa nij yuvií man Pabló, ne nucuaj rij nij so' man so' xe', ne nu' naráán nii nij ta'yaa rihaan nuvií nocoo yo' a. ³¹Dan me se guun rá nij yuvií ticavi' nij yuvií man Pabló, ne cuchi' nana rihaan síí 'nij ra'a man cunudanj nij tanuu romanó man chuman' Jerusalén se vaa ca'maan ndo'o rá nij síí man chuman' Jerusalén ne naxumaan ndo'o sayuun a. ³²Ne nicaj so' tanuu nicaj so' síí 'nij ra'a 'o cientó tanuu, ne cunánj so' ndaa rej man nij yuvií yo' a. Ne gaa quene'en nij yuvií se vaa ca'na' síí uun chij rihaan cunudanj nij tanuu do', se vaa ca'na' nij tanuu do', gaa ne ca'ne' rá nij so' ga suun o' man Pabló a. ³³Gaa ne cuchi' síí 'nij ra'a man nij tanuu yo' rihaan Pabló, ne quita'aa so' man Pabló, ne ca'ne' so' suun se vaa numíj nij tanuu vij aga' ne' man Pabló, ne xná'anj so' man nij yuvií me síí me Pabló ne daj qui'yaj so' a.

³⁴Ne inq vaa nana caguáj 'o 'o nij yuvií a. Dan me se ne ca'vee xcaj so' cuentá daj me che'é me ca'maan rá nij yuvií ma'. 'O se caguáj ndo'o nij yuvií, ne ne ca'vee cunq so' se-nana nij yuvií ma'. Che'é dan ca'ne' so' suun rihaan nij tanuu se vaa ca'anj nicaj nij tanuu man Pabló rá cuarteé man nij tanuu a. ³⁵Ne gaa cuchi' nij tanuu cuarteé, gaa ne che'é se man ndo'o nij yuvií a'maan rá ni'yaj man Pabló, gaa ne ndaa atá xtá' ma'an nij tanuu man

Pabló, che'é se guun ndo'o rá nij yuvii quirii nij so' man Pabló go' nij so' man so' a.

³⁶Q se canoco' raan nij yuvii man nij tanuu, ne caguáj nij yuvii, cataj nij yuvii:

—Ticavi' soj man so' cuaj ei —taj nij yuvii, caguáj nij yuvii, ni'yaj nij yuvii man Pabló a.

Nana nihánj taj xna'anj se vaa guun che'e Pabló nacaj so' man so' rihaan nij sí israelitá a

³⁷Dan me se daj doj catuu Pabló cuarteé man nij tanuu, qui'yaj nij tanuu, gaa ne cataj Pabló rihaan sí 'nij ra'a man cunudanj nij tanuu a:

—Ne ca'vee ca'mij 'o nana rihaan so' na' —taj so', xná'anj so' man sí 'nij ra'a man nij tanuu a.

Ne so' cataj:

—Ne'én so' ca'mii so' xna'ánj griego na'. ³⁸Ne nuveé so' me sí cavii rej cu'naj Egiptó sí me rá cunú' ga gobiernó ne ca'anj nicaj ca'anj mÍj nij sí me rá ticavi' man yuvii ndaa rej tacaan asij rque doj na' —taj sí 'nij ra'a man nij tanuu, xná'anj so' man Pabló a.

³⁹Gaa ne cataj Pabló rihaan so' a: —'Unj ro', me 'o sí israelitá cavii chuman' Tarso chuman' naj estadó Cilicia, ne chuman' vaa suun ndo'o me chihánj á. Rqueé 'unj rihaan so', ne ca'vej rá so' ca'mij doj ga nij yuvii á —taj Pabló rihaan sí 'nij ra'a man nij tanuu a.

⁴⁰Dan me se ca'vej rá so', ne che'é dan canicun' Pabló rej xta' rej atúj nii cuarteé, ne tucunó ra'a so', che'é rej cunuu dínj tu'va nij yuvii a.

Dan me se cunuu dínj tu'va nij yuvii, gaa ne guun che'e Pabló

ca'mii so' xna'ánj hebreo rihaan nij yuvii, ne cataj so':

22 —Cuno soj ca'mij, tinuj, ta'nuj. Ne nano xrej soj se vaa ca'mii nacaj 'unj manj —taj Pabló rihaan nij sí israelitá a.

²Dan me se xcaj nij yuvii israelitá cuentá se vaa ca'mii Pabló xna'ánj hebreo, ne che'é dan ndaa dínj ma'an mán nij so' a. Gaa ne cataj uún Pabló a:

³—Dan me se ya sí israelitá mé 'unj, ne ca'ngaa 'unj chuman' Tarso chuman' naj estadó Cilicia a. Tzaj ne cachij 'unj chuman' Jerusalén nihánj, ne narí' 'unj nocó' 'unj nu' se-tucuanj xii ní', qui'yaj maestró Gamaliel a. Ne cuano nihánj me se sij yanj qui'yaj nu' ndaa vaa me rá Diosé mé 'unj ase vaa 'yaj ma'an soj güii cuan' adonj.

⁴Ne qui'yaj ndo'oj sayuun man nij yuvii nocó' se-tucuanj Jesucristó yo', ne guun ndo'o raj cavi' nij so' a. Dan me se snó'o do', chana do', numÍj, ne canú' 'unj man nij so' taga', ⁵ne xrej ata suun nocóo doj do', nij sí uun chij rihaan ní' do', me sí cataj se vaa ya vaa nana nihánj nana natá' 'unj rihaan soj adonj. 'Q se ma'an nij so' rque yanj cartá rihaan 'unj nayaa tuvi' ní' sí man chuman' Damasco, gaa ne ca'anj 'unj chuman' Damasco, ne guun rá 'unj cunumÍj 'unj man nij yuvii nocó' man Jesucristó yanj chuman' Damasco, che'é rej ca'na' nij so' chuman' Jerusalén nihánj ne quiran' nij so' sayuun, qui'yáj adonj.

⁶”Dan me se vaj 'unj chrej, ne caxuj me ta' asuun, ne nichrún' 'unj chuman' Damasco, gaa ne taj ni'yón cuchuguun nu' xta' nu' anicaj rej

nicun' 'unj a. ⁷Gaa ne quiniñ 'unj rihaan yo'óó, ne cunó 'unj se vaa ca'mii 'o so' rihanj, ne cataj so': "Saulo, Saulo, me che'é 'yáá so' sayuun manj, ga", taj sí ca'mii rihanj, xná'anj so' manj a. ⁸Gaa ne: "Me sí mé so', Señor!", cataj 'unj rihaan so', xná'anj 'unj man so' a. Gaa ne cataj so': "'Unj ro', me Jesús sí cavii chuman' Nazaret, ne sí 'yaj ndo'o so' sayuun man mej adonj", taj so' rihanj a. ⁹Gaa ne dan me se nij sí vaj ga 'unj ro', ya quene'en nij so' ya'an chuguun rej nicun' 'unj, tzaj ne ne cunó nij so' nana ca'mii Jesús rihanj a ma'. ¹⁰Gaa ne cataj 'unj rihaan so' a: "Daj quiyáá 'unj, rá so' ga", taj 'unj, xná'anj 'unj man so' a. Gaa ne sí 'nij ra'a man ní' ro', cataj: "Naxumaan so', ne ca'anj so' chuman' Damasco, gaa ne asa' cuchí' so' yo', ne cataj xna'anj nii rihaan so' che'é nu' se vaa no xcúún so' quiyáá so' á", taj sí 'nij ra'a man ní' rihanj a. ¹¹Dan me se che'é se nucuaj ndo'o chuguun ya'an yo' ro', che'é dan ne ca'vee curuvi' rlij rihanj, ne che'é dan nij sí chéé gaj ro', quita'aa nij so' ra'aj, racuúj nij so' manj, ne ca'anj 'unj catúj 'unj chuman' Damasco a.

¹²"Dan me se chuman' Damasco ro', yáán 'o sí cu'naj Ananías, ne sí ve'é noco' man Dioso me so', ne sí quiyaj nu' se-tucuanj Moisés me so', ne cunudanj nij yuvii israelitá yanj chuman' Damasco taj se vaa sij sa' me so' a. ¹³Dan me se ca'na' so' rihanj ne canicun' so' x'núj, ne cataj so': "Nachuguun rihaan so', gaa ne ni'yaj so', tinuj Saulo", taj so' rihanj a. Ne maan orá dan nachuguun rihanj, ne quene'enj

man so' a. ¹⁴Gaa ne cataj sí cu'naj Ananías: "Dioso sí noco' xii ní' gaa naá ro', narii so' mán so' che'é rej xcaj so' cuentá daj me rá so' quiyaj so' che'é yuvii, ne guun rá so' quene'én so' man Jesucristó sí sa' inanj ne cunó so' nana ca'mii so' rihaan so' á. ¹⁵Gaa ne guún so' sí ne'en che'é so', ne dan me se ca'anj so', ne nata' so' rihaan nu' nij yuvii che'é se vaa quene'én so' do', che'é nij nana cunó so' do' a. ¹⁶Ne nihánj me se se guun raan so' doj a ma'. Maan se naxumaan so', ne cata' ne so', ne cachinj ni'yáá so' rihaan Jesucristó che'é rej tinaruvii Dioso nu' cacun' xráá so' á", taj sí cu'naj Ananías yo' rihanj a.

¹⁷"Dan me se nanicaj 'unj ca'ná' 'unj chuman' Jerusalén nihánj, ne gaa cachín ni'yáá 'unj rihaan Dioso, ne naqui'yaa 'o rasuun rihaan 'unj, ¹⁸ne dan me se quene'én 'unj man Jesucristó, ne cataj so' rihanj a: "Yoó so' cuaj, curihanj so' rque chuman' Jerusalén nihánj á. 'O se se cuno nij sí man chuman' Jerusalén nana nata' so' rihaan nij so' che'é 'unj ma'", taj so' rihanj a. ¹⁹Gaa ne cataj 'unj rihaan so' a: "Tzaj ne aj ne'en nij so' se vaa 'unj me sí catúj daj a nij ve' tucu'yón nij so' se-tucuanj Moisés, ne quita'aa 'unj nij sí cuchumán rá ni'yaj mán so', ne canú' 'unj man nij so' taga' ne gó' 'unj quartá xráá nij so', Señor. ²⁰Ne aj ne'en nij so' se vaa gaa cavi' sí cu'naj Esteban sí nata' rihaan yuvii che'é so', ne 'unj me sí 'o vaa rá ga nij sí ticavi' man so', ne dan me se cutumej sagan' nij so' gaa go' nij so' yahij man Esteban adonj. Che'é dan cunó nij so' se-nanaj

nanj á”, taj 'un̄j rihaan Jesucristó a.
 21 Gaa ne cataj so': “Ca'an̄j so' á. 'O se 'un̄j ca'nej mán so' ca'an̄j so' gan' rihaan nij síf yan̄j a”, taj so' rihan̄j a —taj Pabló rihaan nij síf israelitá yo' se-xna'an̄j nij so' a.

22 Dan me se ndaa dan ca'mii Pabló nana yo', ne nanó xrej nij síf israelitá se-nana so' a. Tzaj ne gaa canicaj so' ca'mii so' che'é nij síf yan̄j, gaa ne canicaj uún nij so', nucuaj caguáj nij so', cataj nij so':

—Cavi' síf nihánj á. Ne nó xcúún síf nihánj gaa i'na' so' rihaan chumii nihánj a ma' —taj nij so', caguáj nij so' a.

23 Dan me se caguáj ndo'o nij so', ne quirii nij so' roto nij so', ne taman' ndo'o nij so' yo'óó tachruu xta' che'é se ca'maan ndo'o rá nij so' a. 24 Gaa ne ca'ne' síf uun chij suun rihaan nij tanuu se vaa ca'an̄j nijcaj nij so' man Pabló rá cuarteé ne nij so', gaa ne go' nij so' cuartá xráá Pabló, che'é rej cataj xna'an̄j so' me che'é caguáj nij yuvī dan̄j ni'yaj nij so' man Pabló a. 25 Dan me se nicaj nij tanuu nuj xcaan, num̄j nij tanuu man Pabló, ne gaa qui'yaj nij so' dan̄j, gaa ne ca'mii Pabló rihaan 'o' síf nicun' rej nicun' so', ne tanuu uun chij rihaan 'o' cientó tanuu me so', ne dan me se cataj Pabló rihaan so' a:

—Nó xcúún soj go' soj cuartá xráá 'o' síf guun chihan̄j Romá gaa ataa ca'ne' nii cacun' che'é so' axe —taj so' rihaan tanuu yo' a. '

26 Gaa cuno tanuu yo' nana ca'mii Pabló rihaan so', ne ca'an̄j so' cataj xna'an̄j so' rihaan síf uun chij rihaan cunudan̄j nij tanuu, ne cataj so':

—Ya me rá so' go' ní' cuartá xráá so' na'. 'O se sij romanó me snó'o nihánj ei —taj so' rihaan tuvi' tanuu so' tanuu uun chij rihaan cunudan̄j nij tanuu a.

27 Gaa ne cuchi' tanuu uun chij yo' rihaan Pabló, ne xná'an̄j so' man Pabló, cataj so':

—Cataj so' 'o' nana rihan̄j á. Ya ya sij romanó mé so' na' —taj so', xná'an̄j so' man Pabló a.

—Vej adon̄j —taj Pabló rihaan so' a.

28 Gaa ne cataj tanuu uun chij yo' rihaan Pabló a:

—'Un̄j nihánj, tzaj ne nocoo ndo'o sa'an̄j gó' 'un̄j che'é rej ca'vee guún 'un̄j 'o' síf romanó nan̄j á —taj so' rihaan Pabló a.

Gaa ne cataj Pabló:

—Tzaj ne 'un̄j ro', me síf romanó asij ca'ngaa 'un̄j adon̄j —taj so' rihaan tanuu uun chij yo' a.

29 Nu' ca'mii so' dan̄j, ne nu' ca'an̄j yan̄j nij tanuu guun rá go' cuartá xráá Pabló a. Ne ma'an̄ tanuu uun chij rihaan nij so' cuchu'vi', che'é se xcaj so' cuentá se vaa sij romanó me Pabló ne aj num̄j so' man Pabló a.

Nana nihánj taj xna'an̄j daj ca'mii Pabló gaa canicun' so' rihaan juntá qui'yaj nij síf uun chij rihaan nij yuvī israelitá a

30 Ne ranga' yo'óó güii me se tanuu uun chij rihaan cunudan̄j nij tanuu ro', guun ya rá so' xcaj so' cuentá me che'é guun rá nij síf israelitá cuta' nij so' cacun' xráá Pabló a. Che'é dan ca'ne' so' suun se vaa nach̄e nij tanuu man Pabló, ne ca'ne' so' suun se vaa cunuu

chre' nij xrej atə suun nocoo doj do', nu' nij sí uun chij rihaan nij yuvii israelitá do', qui'yaj nij so' juntá a. Gaa ne catúj Pabló rej man nij so', qui'yaj so', ne canicun' Pabló tanuu rihaan nij so' a.

23 Dan me se ni'yaj uxrá Pabló man taran' nij sí uun chij yo', ne cataj so':

—Cunə nij soj ca'mij, tinuj. Nu' cavii nu' ca'na' ro', inanə sa' uxrá 'yáá 'unj rihaan Diose, raj a. Taj cacun' tumej ma' —taj Pabló rihaan nij so' a.

²Gaa ne xrej atə suun nocoo doj sí cu'naj Ananías ro', ca'ne' so' suun rihaan nij sí nicun' rej x'núú Pabló se vaa coxrə nij so' tu'va Pabló, gaa ne danj qui'yaj nij so' a.

³Gaa ne cataj Pabló rihaan sí cu'naj Ananías yo' a:

—Vaa güii coxrə Diose tu'vá so' á. 'O se sí nucui' rá mé so' á. 'O se táá so' naqui'yaj cuú so' che'ej sese qui'yáá 'unj cacun' rihaan se-tucuənj Moisés, rá so' a. Tzaj ne nihánj me se tanənj ca'né' so' suun se vaa coxrə nii tu'vaj, ne se-tucuənj Moisés taj se vaa ne nó xcúún so' a 'ó xco' qui'yáá so' danj ma' —taj Pabló rihaan sí cu'naj Ananías a.

⁴Gaa ne nij sí nicun' rej x'núú Pabló ro', cataj nij so' rihaan Pabló a:

—Ne nó xcúún so' caxrii yuvaa so' man sí cune' Diose guun xrej atə suun nocoo doj ma' —taj nij so' rihaan Pabló a.

⁵Gaa ne cataj Pabló:

—Ne quene'én 'unj se vaa xrej atə suun nocoo doj me sí tu'va danj, man tinuj. 'O se danj Diose taj se

vaa se ca'mii chi'ii ní ni'yaj ní sí uun chij rihaan nij tuvi' ní a ma' —taj Pabló rihaan nij so' a.

⁶Dan me se xcaj Pabló cuentá se vaa ta'aj nij sí uun chij yo' me sí saduceo ne yo'ó ta'aj nij so' me sí fariseo, ne che'é dan caguáj so', cataj so' rihaan cunudanəj nij so' a: —Sí fariseo mej, ne ta'níi sí fariseo mej, tinuj. Ne nihánj me se cuta' nii cacun' xráj che'é se 'unj me sí amán rá se vaa cunuú i'na' uún nij sí cavi' vaa güii, tinuj —taj Pabló rihaan cunudanəj nij so' a.

⁷Dan me se gaa ca'mii Pabló danj, ne ca'maan rá nij sí fariseo do', nij sí saduceo do', ni'yaj nij so' tuvi' nij so', ne xra' ta'aj nij so' a. ⁸'O se nij sí saduceo ro', taj se vaa se ca'vee cunuú i'na' uún nij sí cavi' ma'. Ne se-mozó Diose do', nimán yuvii do', taj vaj ma', taj nij sí saduceo yo' a. Tzaj ne nij sí fariseo ro', taj se vaa ya ya cunuú i'na' uún nij sí cavi' vaa güii, ne vaa se-mozó Diose, ne vaa nimán yuvii, taj nij so' a.

⁹Dan me se caguáj ndo'o cunudanəj nij sí uun chij yo', ne canicun' ta'aj nij sí fariseo atə suun naqui'yaj cūu se-tucuənj Moisés rihaan yuvii, ne ca'mii canó tuvi' nij so' ga nij sí saduceo, cataj nij so':

—Nuvi' cacun' tumé sí nihánj, rá núj ma'. 'O se ca'vee se aj ca'mii 'o nimán rihaan so' ca'vee se aj ca'mii 'o se-mozó Diose rihaan so' ca'vee nanəj á —taj nij so', ca'mii nacaj nij so' man Pabló a.

¹⁰Gaa ne ca'maan uxrá rá cunudanəj nij so', ne che'é dan cuchu'vi' tanuu uun chij doj se vaa cutun' nij so' man Pabló, ne che'é

dan ca'ne' so' suun rihaan nij tanuu se vaa ca'anj nij tanuu quita'aa nij tanuu man Pabló ne quirii' nij tanuu man Pabló sca'núj nij sí uun chij rihaan nij yuvii' israelitá yo' ne ca'anj nicaj nij tanuu man Pabló rá cuarteé man nij tanuu a.

¹¹Ti'nuu yo'ó güii me se curuvi' ma'an Jesucristó sij 'nij ra'a man ní' rihaan Pabló, ne cataj so' rihaan Pabló a:

—Gaa nucuaj nimán so' á. 'O se ase vaa 'o xraan taj xna'anj so' rihaan nij sí man chuman' Jerusalén nihánj che'é 'unj ro', danj gaa cataj xna'anj so' rihaan nij sí man chuman' Romá uún che'é 'unj adonj —taj sí 'nij ra'a man ní' rihaan Pabló a.

Nana nihánj taj xna'anj se vaa guun rá nij sí israelitá ticavi' nij so' man Pabló a

¹²Dan me se yo'ó güii cunuu chre' nij sí israelitá che'é rej qui'yaj nij so' sayuun man Pabló, ne cataj nij so' rihaan Diose a:

—Sese cha núj do', sese co'ó núj na do', gaa ataa cavi' Pabló qui'yaj núj, ne ca'vee qui'yáá so' sayuun man núj á —taj nij so' rihaan Diose a.

¹³Ne vij chihaa táá doj nij so' me nij sí guun 'o rá qui'yaj danj man Pabló a.

¹⁴Gaa ne nij sí me rá ticavi' man Pabló ro', cuchi' nij so' rihaan nij xrej atá suun nocoo doj do', rihaan nij sí uun chij do', ne cataj nij so' a:

—Aj cata' tu'va núj rihaan Diose se vaa ca'vej rá núj qui'yaj Diose sayuun man núj sese cha núj me ma'an rasuun gaa ataa cavi' Pabló qui'yaj núj a. ¹⁵Che'é dan soj ga

yo'ó nij sí uun chij ro', cataj xna'anj soj rihaan tanuu uun chij doj se vaa me rá soj ca'na' uún Pabló rihaan soj che'é se me rá soj xcaj sa' soj doj cuentá che'é Pabló, cataj soj rihaan tanuu yo' a. Tzaj ne cumán núj rá chrej, caráán núj chrej man Pabló, ne se gaa i'na' Pabló cuchi' Pabló rihaan soj, qui'yaj núj a man adonj —taj nij so' rihaan xrej atá suun nocoo doj do', rihaan tuvi' nij so' sí uun chij do' a.

¹⁶Tzaj ne cuno xticun' Pabló se vaa ca'mii nij so' che'é rej caráán nij so' chrej man Pabló, ne che'é dan ca'anj so' catúj so' rá cuarteé, gaa ne nu' tacuachén so' nana rihaan Pabló a. ¹⁷Gaa ne canacúun Pabló ca'na' yo'ó nij tanuu uun chij rihaan 'o cientó tanuu rihaan so', ne cataj so' rihaan tanuu yo' a:

—Catuu sí tachruu nihánj nata' so' rihaan tanuu uun chij doj, qui'yáá so' á. 'O se vaa nana me rá so' nata' so' rihaan tanuu uun chij doj a —taj Pabló rihaan tanuu yo' a.

¹⁸Che'é dan nicaj tanuu yo' man xticun' Pabló, ca'anj so' rihaan tanuu uun chij rihaan cunudanj nij tanuu, ne cataj so' rihaan tanuu a:

—Sí cu'naj Pabló sí 'nij taga' ro', canacúun so' manj cuchij rihaan so', ne cachín ni'yaj so' rihanj se vaa ca'na' sí tachruu nihánj rihaan so' qui'yá a. 'O se vaa nana me rá sí tachruu nihánj nata' so' rihaan so', taj Pabló a —taj tanuu yo' rihaan tanuu uun chij doj a.

¹⁹Dan me se coró' tanuu uun chij yo' ra'a xticun' Pabló, gaa ne ca'anj yaníj roj so', gaa ne xna'anj tanuu yo' man so', cataj so':

—Me nana nata' so' rihanj, rá so' ga —taj so' rihaan sí tachruu yo' a.

²⁰Gaa ne so' cataj:

—Nij sí israelitá ro', cyaan guun rá nij so' se vaa cachinj ni'yaj nij so' rihaan so' se vaa a'yuj ca'anj nicaj so' man Pabló rej cunu chre' nij sí uun chij rihaan nij so' a. 'O se cataj nij so' se vaa me rá nij so' xcaj nij so' cuentá sa' doj che'é Pabló a. ²¹Tzaj ne se cuchumán rá so' se-nanā nij so' ma'. 'O se vaa vij chihaa tuvi' nij so' táa doj caráán chrej man Pabló, ne aj cata' tu'va nij so' rihaan Diose se vaa se chá nij so' do', se co'o nij so' na do', gaa ataa cavi' Pabló qui'yaj nij so', ne sese se cavi' Pabló qui'yaj nij so', ne ca'vee qui'yaj Diose sayuun man nij so', taj nij so' nanj á. Ne cuano nihánj me se me ndo'o rá nij so' se vaa cata' tu'vá so' se vaa ya ca'anj nicaj so' man Pabló rihaan nij sí uun chij yo' adonj —taj xticun' Pabló rihaan tanuu uun chij doj a.

²²Ne tanuu yo' ro', na'née so' chrej man sí tachruu yo', ne ca'ne' so' suun rihaan sí tachruu se vaa se cataj xna'anj so' rihaan a 'ó yuvii se vaa aj nata' so' nanā vaa danj rihaan tanuu yo' ma'.

Nanā nihánj taj xna'anj se vaa ca'née tanuu uun chij doj man Pabló rihaan sí nicaj suun gobernador cu'naj Félix a

²³Dan me se canacúun tanuu uun chij yo' man vij nij tanuu uun chij rihaan 'o cientó tanuu, ne cataj so' rihaan roj so' a:

—Nicaj roj soj vij cientó tanuu chée tacoj do', va'núj chihaa chi' tanuu taj xráa cuayó do', vij cientó tanuu nicaj chruun lanzá do', ne cumān chruun soj cavii soj aga'

uun nii corá, ca'anj soj chuman' Cesarea á. ²⁴Ne quirii soj 'o cuayó quitaj sí cu'naj Pabló, gaa ne cuchí' Pabló rihaan sí nicaj suun gobernador cu'naj Félix, qui'yaj soj, ne dan me se quinani so' rihaan nij sí israelitá a —taj tanuu uun chij doj cuno roj so' a.

²⁵Gaa ne qui'yaj so' 'o yanj cartá, ne ase vaa nanā nihánj ro', danj vaa nanā cachrón so' rihaan yanj cartá yo' a: ²⁶“Unj sij cu'naj Claudio Lisias ro', 'yáá 'unj yanj cartá nihánj ca'nej 'unj rihaan so' sij nicaj suun gobernador cu'naj Félix sij sa' ndo'o a. Ve'é cayáán so' á. ²⁷Xa' sí ca'nej 'unj rihaan so' nihánj, tzaj ne quita'aa nij sí israelitá man so', ne guun rá nij so' ticavi' nij so' man so' a. Gaa xcaj 'unj cuentá, ne nacaj núj ga nij tanuu man so', che'é se xcaj 'unj cuentá se vaa sij romanó me so' a. ²⁸Dan me se guun rá 'unj xcaj 'unj cuentá me che'é me guun rá nij sí israelitá cuta' nij so' cacun' xráa so', ne che'é dan ca'anj nicaj 'unj man so' rihaan nij sí uun chij rihaan nij so' a. ²⁹Ne xcaj 'unj cuentá se vaa inanj che'é tucuáán noco' ma'an nij so' me cuta' nij so' cacun' xráa so' a. Tzaj ne taj vaj cacun' chi'ii tumé so' ma'. Taj che'é cavi' so' do', taj che'é qui'nij so' taga' do' ma'. ³⁰Tzaj ne cataj xna'anj nii rihanj se vaa guun rá ta'aj nij sí israelitá ticavi' nij so' man so', ne che'é dan ca'nej 'unj man so' rihaan so', ne cataj 'unj rihaan nij sí me rá cuta' cacun' xráa so' se vaa cuchí' nij so' rihaan so' ne ca'mii nij so' ga so' a”, taj nanā cachrón tanuu uun chij doj rihaan yanj cartá ca'née so' rihaan

sí nicaj suun gobernador cu'naj Félix a.

³¹Dan me se qui'yaj nij tanuu ndaa vaa cataj xna'anj so' rihaan nij so', ne rej ni ca'anj nicaj nij so' man Pabló ndaa chuman' cu'naj Antípatris a. ³²Gaa ne yo'ó güii me se cavii nij tanuu taj xráa cuayó, ca'anj nij so' ga Pabló, ne yo'ó nij tanuu ro', canicaj nij so' chuman' Jerusalén ndaa cuarteé a. ³³Dan me se gaa catúj nij tanuu taj xráa cuayó ga Pabló chuman' Cesarea, ne nago' nij so' yanj cartá yo' ra'a sí nicaj suun gobernador, ne tacuachén nij so' man Pabló rihaan so' uún a.

³⁴Gaa quisj nayaa so' yanj cartá, ne xná'anj so' me estadó cavii Pabló, ne cataj xna'anj nii rihaan so' se vaa cavii Pabló estadó Cilicia a. ³⁵Gaa ne cataj so' rihaan Pabló a:

—Naqui'yaj cuú 'unj che'é so' asa' ca'na' nij sí cuta' cacun' xráa so' á —taj so' rihaan Pabló a.

Gaa ne ca'ne' so' suun rihaan nij tanuu se vaa ca'anj nicaj nij tanuu man Pabló rá tucúa suun nocoo cune' sí cu'naj Herodes ne tumé nij tanuu man so' a.

Nana nihánj taj xna'anj che'é cacun' cuta' nii xráa Pabló a

24 Dan me se cachén 'un' güii, gaa ne nanij xrej atá suun nocoo doj cu'naj Ananías ndaa chuman' Cesarea, ne ca'anj ta'aj nij sí uun chij rihaan nij yuvii israelitá do', 'o' sí a'mii natáj cu'naj Tértulo do', ga so', ne cuta' nij so' cacun' xráa Pabló rihaan sí nicaj suun gobernador a. ²Dan me se gaa canacúun nii ca'na' sí cu'naj Pabló, ne ca'na' Pabló, ne guun che'e

sí cu'naj Tértulo cuta' so' cacun' xráa Pabló rihaan sí cu'naj Félix, cataj so':

—Che'é se so' me sí acaj ndo'o cuentá ro', che'é dan dínj mán núj sij israelitá, ne naxcaj ndo'o chiháán núj, ³ne cunudanj núj me sí taj se vaa inanj sa' uxrá qui'yáa so', Félix sij sa' ndo'o a. Ne: “O guun ni'yaj ndo'o ní”, taj taran' núj rihaan so' me rej ma'an vaj núj a. ⁴Tzaj ne taj che'é guun rmiij so' doj qui'yáj ma'. Ne che'é dan rqueé 'unj rihaan so' se vaa veé danj gaa inaj nimán so', ne cunó so' doj tzin' se-nana núj nanj adonj.

⁵”Dan me se xcaj núj cuentá se vaa xa' sí nihánj, tzaj ne ase vaa yupee xij man naa vaa so', ne so' me sí 'yaj se vaa ino vaa rá cunudanj nij sí israelitá yanj rihaan chumiij nihánj ne xra' ta'aj nij so', ne so' me sí uun chij rihaan nij sí nocoo' 'o' tucúaán ne se-tucuanj sí cavii chuman' Nazaret a. ⁶Ne ndaa guun rá so' qui'yaj chi'ii so' man nuvií nocoo, ne che'é dan quita'aa núj man so', ne guun rá núj ca'ne' núj cacun' che'é so' ndaa vaa a'mii tucúaán nocoo' ma'an núj a. ⁷Tzaj ne sí cu'naj Lisias tanuu uun chij rihaan taran' nij tanuu man chuman' Jerusalén ro', ca'néj yuvaa so' man sí nihánj ra'a núj, ⁸ne cataj xna'anj so' rihaan nij sí me rá cutá' cacun' xráa Pabló se vaa ca'na' nij so' rihaan so' nihánj a. Ne dan me se ma'an so' me sí guun nucuj naqui'yaj cuu che'é nu' rasuun nihánj, ne xcaj ma'an so' cuentá che'é cacun' cuta' núj xráa Pabló nanj adonj —taj sí cu'naj Tértulo cuno sí cu'naj Félix a.

⁹Gaa ne yo'ó nij yuvií israelitá ro', caraa ndo'o nij so' cacun' xráá Pabló, ne cataj nij so' se vaa ya vaa se-nana síí cu'naj Tértulo yo' a.

Nana nihánj taj xna'anj che'é nana ca'mii ma'an Pabló rihaan síí nicaj suun gobernador cu'naj Félix yo' a

¹⁰Gaa ne guun ra'a síí nicaj suun gobernador cataj so' se vaa ca'vee ca'mii Pabló, ne che'é dan cataj Pabló a:

—Ne'én 'unj se vaa quisj que'ee yo' guún so' síí a'ne' cacun' che'é nij síí man chiháán núj, ne che'é dan uun niha' raj ca'mii nacaj 'unj che'é ma'anj rihaan so' á. ¹¹Ne guun nucuaj ma'an so' xcaj so' cuentá se vaa ataa quisij chuvij güii asij cavii 'unj chuman' Jerusalén caraa guee 'unj rihaan Diose a.

¹²Ne rá nuvíí nocoo do', rá nij ve' tucu'yón núj sij israelitá se-tucuanj Moisés do', rque chuman' do', ne cano tuví' 'unj ga yuvií ma'. Ne a doj ne ca'maan rá nij yuvií qui'yáá 'unj ma'. ¹³Ne se ca'vee tihaan nij síí nihánj se vaa vaa che'é cuta' nij so' cacun' xráj ma'.

¹⁴”Tzaj ne cataj yá 'unj rihaan so' se vaa xa' tucuaán tucu'náj nij síí nihánj tucuaán ne ro', danj 'yáá 'unj aráj guee 'unj rihaan Diose sij noco' nij xii 'unj a. 'O se amán raj nu' nana no rihaan yanj no se-tucuanj Moisés do', se-nana nij síí nata' se-nana Diose gaa naá do' a. ¹⁵Ne nucuaj rá 'unj man Diose ndaa vaa 'yaj ma'an nij síí nihánj se vaa vaa güii cunuu i'na' uún nij síí sa' cavi' do', nij síí chi'ii cavi' do' a. ¹⁶Che'é dan nu' se vaa 'yáj, tzaj ne ve'é inanj 'yáj che'é rej se guun quitaj

cacun' xráj rihaan Diose do', rihaan yuvií do' ma'.

¹⁷”Dan me se cachén que'ee yo', gaa ne guun rá 'unj rque 'unj caridad rihaan tuvi' 'unj síí nique ne rque 'unj rasuun guee rihaan Diose, ne che'é dan ca'anj 'unj ndaa chuman' Jerusalén a. ¹⁸Ne gaa qui'yáá 'unj danj, ne nari' doj síí israelitá cavii estadó Asia mán 'unj rá nuvíí nocoo, ne aj cunuu sa' 'unj rihaan Diose daj vaa taj se-tucuanj núj a. Tzaj ne taj vaj yuvií vaj ga 'unj, ne taj vaj sayuun chi'ii qui'yáá 'unj gaa nari' nij so' manj ma'. ¹⁹Ne xa' nij so', tzaj ne sese vaa cacun' tumé 'unj rá nij so', ne no xcúún nij so' ca'na' ma'an nij so' canicun' nij so' nihánj rihaan so' á. ²⁰Ne sese taj, ne no xcúún ma'an nij síí nihánj cataj xna'anj nij so' rihaan so' me cacun' tumé 'unj nari' nij so' gaa canicún' 'unj rihaan juntá qui'yaj nij síí atá suun rihaan núj á. ²¹'O se vaa orún' nana caguáj 'unj gaa canicún' 'unj rihaan nij síí uun chij rihaan nij yuvií israelitá yo', ne dan me se cataj 'unj danj: “Maan che'é se 'unj me síí amán rá se vaa vaa güii cunuu i'na' uún nij síí cavi' qui'yaj Diose ro', che'é dan naqui'yaj cuu nij soj che'ej cuan' a”, cataj 'unj rihaan nij so' a —taj Pabló rihaan síí nicaj suun gobernador cu'naj Félix a.

²²Ese síí cu'naj Félix ro', me síí quene'en sa' daj vaa se-tucuanj ní' sij noco' man Jesucristó, gaa ne cataj so' se vaa guun raan doj, gaa ne ca'ne' so' cacun' che'é Pabló a. Che'é dan cataj so':

—Asa' ca'na' tanuu uun chij cu'naj Lisias nihánj, ne naqui'yaj cuú 'unj che'é nij soj á —taj síí cu'naj Félix a.

²³Ne ca'ne' síi cu'naj Félix suun rihaan tanuu uun chij rihaan 'o cientó tanuu se vaa cutomé tanuu man Pabló, tzaj ne ca'vee cachee uun Pabló doj, ne ca'vee ca'na' nij tuvi' Pabló raçuíj nij so' doj man Pabló, qui'yaj tanuu, taj síi cu'naj Félix yo' a.

Nana nihánj taj xna'anj se vaa yo'o 'nij Pabló taga', qui'yaj síi cu'naj Félix a

²⁴Dan me se cachén doj güii, gaa ne ca'na' síi cu'naj Félix ga nica so' chana israelitá cu'naj Drusila, ne canacúun so' se vaa ca'na' Pabló rihaan so', ne cuno so' nana ca'mii Pabló rihaan so' che'é tucuáán noco' ní' sij amán rá ni'yaj man Jesucristó a. ²⁵Dan me se cataj xna'anj Pabló rihaan síi cu'naj Félix se vaa no xcúun ní' cunu sa' ní' rihaan Diose ne no xcúun ní' cutomé ní' man ma'an ní' se vaa ve'é inanj qui'yaj ní' a. Ne ca'mii so' che'é güii ca'ne' Diose cacun' che'é yuvií a. Gaa ne cuchu'vi' ndo'o síi cu'naj Félix, ne cataj so': —Cuanó nihánj me se ca'anj so' yaj, tzaj ne asa' vaa i'núj rihanj, ne canacunj uún 'unj mán so' á —taj so' rihaan Pabló a.

²⁶Danj cataj Félix che'é se me rá so' caráán Pabló sa'anj rihaan ma'an so' che'é rej quirii so' taga' man Pabló, rá so' a. Che'é dan que'ee güii canacúun so' man Pabló ca'na' Pabló rihaan so', ne ca'mii so' ga Pabló a.

²⁷Dan me se quisj vij ya yo' 'nij Pabló taga', gaa ne x'néj suun ra'a síi cu'naj Félix, ne catúj síi cu'naj Porcio Festo a. Ne guun rá síi

cu'naj Félix qui'yaj so' se luj che'é nij yuvií israelitá, ne che'é dan tanáj so' man Pabló taga' a.

Nana nihánj taj xna'anj se vaa cataj Pabló se vaa guun rá so' naqui'yaj cuu síi nicaj suun emperador che'é so' a

25 Quisj va'núj güii yáán síi cu'naj Festo síi nicaj suun gobernador, gaa ne curihanj so' chuman' Cesarea cavii so' ndaa chuman' Jerusalén a. ²Gaa ne nij xrej ata suun noco' doj do', nij síi raa doj rihaan nij yuvií israelitá do', cuta' nij so' cacun' xráá Pabló rihaan síi cu'naj Festo a. Gaa ne nucuaj ³cachíin ni'yaj nij síi israelitá rihaan síi cu'naj Festo se vaa ca'ne' so' suun se vaa ca'na' Pabló ndaa chuman' Jerusalén a. 'O se guun rá nij so' caráán nij so' chrej ne ticavi' nij so' man Pabló a. ⁴Che'é dan cataj síi cu'naj Festo se vaa tumé nij tanuu man Pabló chuman' Cesarea a. 'O se rque doj güii nucui' so' chuman' Cesarea, taj so' a. ⁵Gaa ne cataj uún síi cu'naj Festo rihaan nij síi israelitá a: —Che'é dan sese nij tuvi' soj síi guun nucuaj ca'anj ndaa chuman' Cesarea ga 'unj ro', ca'anj nij so', ne sese vaa se chi'ii qui'yaj síi cu'naj Pabló, ne cuta' nij so' cacun' xráá Pabló á —taj síi cu'naj Festo rihaan nij so' a.

⁶Dan me se guun raan síi cu'naj Festo 'o tunj güii chuman' Jerusalén ta' asuun, gaa ne nanii so' ndaa chuman' Cesarea, gaa ne yo'ó güii me se ca'anj quitaj so' chruun xlá sa' rej naqui'yaj cuu so' che'é yuvií, gaa ne ca'ne'

so' suun rihaan nij tanuu se vaa ca'na' Pabló rihaan so' qui'yaj nij tanuu a. ⁷Gaa ne gaa ca'na' Pabló rihaan so', ne man nij sí israelitá nanij ndaa chuman' Jerusalén, ne canicun' nij so' nu' anicaj rej x'nuj Pabló, ne caraa ndo'o nij so' cacun' nocoo xráa Pabló, tzaj ne ne ca'vee tihaan nij so' se vaa ya ya qui'yaj so' cacun' yo' ma'. ⁸Gaa ne canicaj Pabló, ca'mii nacaj so' che'é ma'an so', cataj so':

—Taj cacun' qui'yáa 'unj rihaan se-tucuanj nij sí israelitá do', rihaan nuvií nocoo do', rihaan sí nicaj suun emperador cu'naj César do' a ma' —taj Pabló rihaan sí cu'naj Festo yo' a.

⁹Dan me se guun rá sí cu'naj Festo qui'yaj so' se luj che'é nij yuvií israelitá, ne che'é dan cataj so' rihaan Pabló a:

—Ne me rá so' ca'anj so' ndaa chuman' Jerusalén ne ndaa ti'yaj ca'ne' 'unj cacun' che'é so' che'é nij rasuun nihánj na' —taj so', xná'anj so' man Pabló a.

¹⁰Gaa ne cataj Pabló rihaan so' a:

—Nihánj me nicún' 'unj rihaan so', sij cune' sí nicaj suun emperador cu'naj César se vaa ca'ne' so' cacun' che'é yuvií á. Ne che'é dan no xcúun so' ca'ne' so' cacun' che'é 'unj nanj adonj. Ne qui'yáa 'unj cacun' rihaan a 'ó nij sí israelitá ma'. Ne aj ne'én so' se vaa ya vaa nana nihánj nana a'mii 'unj rihaan so' chuguanj. ¹¹Dan me se sese vaa cacun' qui'yáa 'unj ne sese vaa che'é ticavi' nii man 'unj, ne a'vej 'unj cavi' 'unj á. Tzaj ne sese cacun' rmi' inanj me se-nana nij sí nihánj, ne taj a 'ó sí no

xcúun tacuachén man 'unj rihaan nij so' ma'. Cuanó nihánj me se achíin ni'yáa 'unj rihaan sí nicaj suun emperador cu'naj César se vaa ma'an so' ca'ne' cacun' che'é 'unj adonj —taj Pabló rihaan sí cu'naj Festo a.

¹²Dan me se nuchruj raa sí cu'naj Festo ga nij sí narqué chrej man so' daj qui'yaj nij so', gaa ne cataj so' rihaan Pabló a:

—Aj cachíin ni'yáa so' rihaan sí cu'naj César se vaa ma'an so' ca'ne' cacun' che'é so' á. Che'é dan ca'anj so' rihaan so' adonj —taj so' rihaan Pabló a.

Nana nihánj taj xna'anj daj guun gaa ca'na' Pabló rihaan sí nicaj suun rey cu'naj Agripa do', rihaan ra'vij so' chana cu'naj Berenice do' a

¹³Dan me se cachén doj güii, gaa ne sí nicaj suun rey cu'naj Agripa do', chana cu'naj Berenice do', ca'na' chuman' Cesarea, ca'na' ni'yaj roj so' sí nicaj suun gobernador cu'naj Festo a. ¹⁴Ne guun raan roj so' que'ee güii chuman' Cesarea a. Che'é dan cataj xna'anj sí cu'naj Festo rihaan sí nicaj suun rey yo' che'é Pabló a. Dan me se cataj so':

—Dan me se sí quináj taga' nihánj qui'yaj sí cu'naj Félix me yo'o so', ¹⁵ne gaa nuu 'unj chuman' Jerusalén, ne nij xrej ata suun nocoo doj do', nij sí uun chij rihaan nij yuvií israelitá do', cataj xna'anj nij so' rihaan 'unj che'é so', ne guun rá nij so' se vaa nari' 'unj cacun' xráa so' ne qui'yáa 'unj sayuun man so' a. ¹⁶Gaa ne cataj xna'anj 'unj rihaan nij so' se vaa nuvee se-tucuanj núj sij romanó me

tacuachén uun ní' man 'o so' ticavi' nii man so' ma'. Tananj asino yaan quene'en síí ata' cacun' man nij síí cuta' cacun' xráá so', gaa ne ca'mii nacaj so' che'é ma'an so', cataj 'unj rihaan nij so' a.

17”Dan me se ca'na' nij so' chuman' Cesarea nihánj, ne ne guun raan 'unj ma'. Tzaj ne yo'ó güii me se quitáá 'unj chruun xlá sa' rej a'né' 'unj cacun' che'é yuvií, gaa ne ca'né' 'unj suun rihaan nij tanuu se vaa ca'na' síí 'nij taga' yo' rihaan 'unj qui'yaj nij so' a. 18Ne gaa ca'na' so', ne nij síí guun rá cuta' cacun' xráá so' ro', canicun' nij so' ne cuta' ndo'o nij so' cacun' xráá so', tzaj ne nuveé cacun' chi'ii me cacun' cuta' nij so' xráá so', rá 'unj ma'. 19'O se ino doj vaa rá nij so' ga síí 'nij taga' yo', ni'yaj nij so' tucuaán noco' ma'an nij so' do', 'o síí cavi' cu'naj Jesús do' a. 'O se vaa i'na' síí cu'naj Jesús, cataj síí 'nij taga' cu'naj Pabló yo' a.

20”Dan me se ne quene'én 'unj daj naquiyaj cuj che'é rasuun vaa danj ma'. Che'é dan xná'anj 'unj man síí cu'naj Pabló yo' sese guun rá so' ca'anj so' chuman' Jerusalén, ne ca'vee ca'ne' 'unj cacun' che'é so' che'é nij rasuun yo', taj 'unj rihaan so' a. 21Tzaj ne cachíin ni'yaj Pabló se vaa yo'o qui'nij so' taga' nihánj ndaa se ca'vee naquiyaj cuu síí nicaj suun emperador che'é so' a. Che'é dan ca'né' 'unj suun rihaan nij tanuu se vaa yo'o cutumé nij so' man Pabló taga' ndaa se ca'nej 'unj man so' rihaan síí cu'naj César yo' a —taj síí cu'naj Festo rihaan síí cu'naj Agripa a.

22Gaa ne cataj síí cu'naj Agripa rihaan síí cu'naj Festo a:

—Me rá 'unj cunó ma'an 'unj ca'mii snó'o yo' á —taj so' rihaan síí cu'naj Festo a.

—A'yuj me se cunó so' ca'mii so' adonj —taj síí cu'naj Festo rihaan síí cu'naj Agripa a.

23Ne yo'ó güii me se ve'é ndo'o qui'yaj nij yuvií gaa ca'na' síí nicaj suun rey cu'naj Agripa do', chana cu'naj Berenice do', ne catúj roj so' rá ve' 'yaj nii juntá a. Ne ca'na' tanuu uun chij rihaan 'o míj tanuu ca'na' nij síí raa man chuman' Cesarea yo' ca'na' ga roj so' a. Gaa ne ca'ne' síí cu'naj Festo suun rihaan nij tanuu se vaa ca'na' Pabló rihaan nij so' qui'yaj nij tanuu a. 24Ne gaa catúj Pabló, ne cataj síí cu'naj Festo rihaan síí cu'naj Agripa a:

—Cunó so', sij nicaj suun rey Agripa. Cunó soj sij cunuu chre' ga núj nihánj á. Nihánj me se ni'yaj nij soj man síí nihánj á. 'O se rque chuman' Jerusalén do', ndaa ma'an chuman' nihánj do', ca'na' ndo'o nij yuvií israelitá rihanj ne caguáj nij so' cataj nij so' se vaa ne nó xcúun so' gaa i'na' so' doj a ma'. 25Tzaj ne xcaj 'unj cuentá se vaa taj se chi'ii qui'yaj so', ne taj che'é ticavi' nii man so' qui'yáá 'unj ma'. Tzaj ne ma'an so' cachíin ni'yaj rihaan síí nicaj suun emperador se vaa ca'ne' ma'an emperador cacun' che'é so', ne che'é dan guun raj se vaa ca'nej 'unj man so' rihaan síí nicaj suun emperador adonj. 26Tzaj ne ne cavii raá 'unj me nana cachron 'unj rihaan yanj ca'nej 'unj rihaan síí nicaj suun emperador yo' che'é cacun' tumé síí nihánj ma'. Che'é dan ca'na' so' rihaan so' sij nicaj

suun rey Agripa do', rihaan yo'ó nij soj do', che'é rej naquilyaj cūu nij soj che'é so' nē cataj xna'anj nij soj rihaan 'unj me nana cachron 'unj rihaan yanj che'é so' á. ²⁷'O se snúú rma'án 'unj, sese ca'nej 'unj man 'o síí 'nij taga' rihaan síí nicaj suun emperador, sese nuvi' nana cataj xna'anj 'unj rihaan so' che'é cacun' tumé síí 'nij taga' yo', rá 'unj a —taj síí cu'naj Festo rihaan yo'ó nij so' a.

Nana nihánj taj xna'anj daj
ca'mii Pabló rihaan síí nicaj
suun rey cu'naj Agripa a

26 Gaa nē cataj síí cu'naj
Agripa rihaan Pabló a:
—Ca'vee ca'mii so' che'é so' á —
taj so' rihaan Pabló a.

Gaa nē ticun' ra'a Pabló, nē ca'mii nacaj so' che'é ma'an so', cataj so':

²—Aj cavii sa' uxrá 'unj nihánj, che'é se vaa i'núj rihanj ca'mii nacaj 'unj manj rihaan so' cuan', sij nicaj suun rey cu'naj Agripa. Nē nihánj me se ca'mij che'é nu' cacun' cuta' yo'ó nij síí israelitá xráj a. ³'O se ne'én 'unj se vaa so' me síí nicaj cuentá che'é nu' se-tucuanj ní' sij israelitá, nē ne'én so' daj vaa nu' nana noco' ní' a. Che'é dan achíín ni'yáá 'unj rihaan so' se vaa qui'yáá so' se ndo'o, nē gaa inaj nimán so', nē cunó so' nana a'mij á.

⁴”Dan me se gaa síí tachruu mé 'unj, nē cayáán 'unj chuman' Jerusalén ga yo'ó nij síí israelitá, nē aj ne'en cunudanj nij síí israelitá se vaa qui'yáj gaa mej síí tachruu a. ⁵Nē sese guun rá nij so', nē guun nucuaj nij so' cataj xna'anj ma'an nij so' se vaa sij fariseo mé 'unj asino yaan, nē qui'yáá 'unj nu'

ndaá vaa 'yaj nij síí fariseo, nē nij síí fariseo ro', me síí nica doj noco' se-tucuanj ní' nanj á. ⁶Nē nihánj me se cuta' nij síí israelitá cacun' xráj, nē nicún' 'unj nihánj rihaan so', che'é se guun ya raj se vaa qui'yaj Diose nu' ndaa vaa cata' tu'va so' rihaan xij ní' gaa naá a. ⁷Nē nuvij nigan' yo'ó na'vij cunu' chuvij nij x'ne' nij síí israelitá rihaan Diose, che'é se guun ya rá ma'an nij so' se vaa qui'yaj Diose nu' danj che'é nij so' a. Nē che'é rasuun yo' rasuun qui'yaj Diose che'é ní' ro', che'é dan cuta' nij so' cacun' xráj, nanj rey Agripa. ⁸Nē me che'é ne amán rá soj se vaa ca'vee cunu i'na' uún nij síí cavi' qui'yaj Diose ga.

⁹”Dan me se 'unj nihánj me se gaa rque me se guun ya ya rá 'unj qui'yaj ndo'o 'unj sayuun man nij síí noco' man Jesucristó síí cavii chuman' Nazaret a. ¹⁰Nē danj qui'yáá 'unj rque chuman' Jerusalén nanj á. 'O se 'unj me síí canu' man que'ee nij síí sa' noco' man Diose taga', nē rque nij xrej atá suun nocoo doj se nucuaj rihanj se vaa qui'yáj danj a. Nē gaa ca'ne' núj cacun' che'é nij so' se vaa cavi' nij so', nē ndaa 'unj me síí cataj se vaa no xcuún nij so' cavi' nij so' adonj. ¹¹Nē guun que'ee ndo'o ca'anj 'unj cunudanj nij ve' tucu'yón ní' sij israelitá se-tucuanj Moisés, nē qui'yáá 'unj sayuun man nij síí noco' man Jesús, nē ndaa rqueé 'unj man nij so' ca'mii chi'ii nij so' che'é Jesucristó, nē che'é se ca'maan ndo'o rá 'unj ni'yaj 'unj man nij so', nē ndaa canocó' 'unj man nij so' ndaa yo'ó chuman' naj gan' che'é rej qui'yáá 'unj doj sayuun man nij so' adonj.

12”Dan me se gaa qui'yáj danj, ne 'o güii me se ca'anj 'unj chuman' Damasco, ne aj rqué nij xrej ata suun nocoo doj rej nucujaj, ne ca'née nij so' mán 'unj ca'anj 'unj qui'yáá 'unj sayuun man nij sí nocó' man Jesucristó yanj chuman' Damasco yo' a. 13Cunó so' nana ca'mij rihaan so' nihánj, nanj rey. 'O se caxuj me yo', ne vaj 'unj chrej, ne rej xta' ro', cuchuguun 'o ya'an nu' anicaj rej nicun' 'unj ga nij sí vaj chrej ga 'unj, ne nucujaj doj ya'an yo' rihaan naán güii á. 14Dan me se quinij taran' núj rihaan yo'óó, ne cunó 'unj ca'mii yo'lo so' rihaan 'unj, ne xna'ánj hebreo ca'mii so', cataj so': “Me che'é 'yáá so' sayuun manj, ga Saulo'. 'O se me rá so' qui'yáá so' sayuun manj, tzaj ne man ma'án so' 'yáá so' sayuun ase 'yaj scúj o' tacanj rihaan chruun sihaa nicaj sí 'yaj suun ga yuntá nanj á”, taj sí ca'mii rihanj a. 15Gaa ne taj 'unj: “Me sí mé so', Señor!”; taj 'unj, xná'anj 'unj man so' a.

”Gaa ne cataj sí 'nij ra'a man ní': “'Unj ro', me Jesús, ne sij 'yáá so' sayuun man mej adonj. 16Tzaj ne naxagaa so', canicun' cayá so' á. 'O se nihánj me se curuvi' 'unj rihaan so' che'é se narii 'unj mán so' qui'yaj suun so' rihanj ne nata' so' rihaan yuvií che'é nij rasuun nari' so' cuano do', che'é rej quene'én so' manj do', che'é nij rasuun nari' so' asa' curuvi' uún 'unj rihaan so' rej rihaañ doj do' a. 17Dan me se tinanii 'unj mán so' rihaan nij sí man chiháan so' yuvií israelitá do', rihaan nij sí yaníj do', ne yaj ca'nej 'unj mán so' rihaan nij so', 18che'é rej naxra' rihaan nij so' ne xcaj nij

so' cuentá qui'yáá so', gaa ne tanáj xco nij so' rej rmi' rej uun chij sí chree rihaan nij so', ne canicaj nij so' rihaan Diose rej ranga' rej guun nucujaj nij so' xcaj nij so' cuentá a. Gaa ne ca'vee quinavij nu' cacun' tumé nij so', ne ca'vee cavii sa' nij so' ga nij sí cunuu sa' nimán rihaan Diose, sese cuchuman rá nij so' ni'yaj nij so' mán 'unj, qui'yáá so' á”, taj sí 'nij ra'a man ní' rihanj a.

19”Ne xcaj so' cuentá, sij nicaj suun rey Agripa. 'O se ne guun nichraj nimanj ma'. Tananj qui'yáá 'unj nu' ndaa vaa cataj Jesucristó rihanj gaa curuvi' so' rihanj rej xta' a. 20Asino yaan natá' 'unj chuman' Damasco do', chuman' Jerusalén do', nu' estadó Judea do', gaa ne natá' 'unj ndaa rej man nij sí yaníj uún a. Natá' 'unj rihaan cunudanj nij yuvií se vaa canicaj nimán nij yuvií canoco' nij so' Diose, ne ve'é qui'yaj nij so' ndaa vaa 'yaj sí canicaj ya nimán nanj adonj. 21Che'é dan quita'aa nij yuvií israelitá mán 'unj rá nuvií nocoo, ne guun rá nij so' ticavi' nij so' manj a.

22”Che'é dan nicun' 'unj rihaan nij soj cuano, ne ta'aj soj me sí yanj uun ne ta'aj soj me sí raa ata suun, tzaj ne Diose me sí racuíj manj ndaa cuano nihánj, ne che'é dan natá' 'unj se-nana Diose rihaan nij soj a. Tzaj ne ne ino vaa nana natá' 'unj rihaan nij soj cuano ga se-nana nij sí nata' se-nana Diose gaa naá do', se-nana ma'an sí cu'naj Moisés do', gaa cataj xna'anj nij so' daj guun rej rihaan nij so' ma'. 23Dan me se ma'an nij so' cataj se vaa

sí ca'nej Diose t̄inanii man yuvii rihaan sayuun me se quirañ' so' sayuun, ne guun so' sí cunuu i'na' uún asino yaan rihaan yo'ó nij sí cavi', ne nata' so' nana ya rihaan nij yuvii israelitá do', rihaan nij yuvii yaníj do' a —taj Pabló rihaan sí cu'naj Agripa yo' a.

²⁴Dan me se gaa ca'mii so' danj rihaan sí cu'naj Agripa, ne caguáj sí cu'naj Festo, cataj so':

—Snúú so', Pablo. Che'é se tucu'yón ndo'o so' yanj ro', che'é dan guun snuj raá so' nanj á —taj so' rihaan Pabló a.

²⁵Gaa ne cataj Pabló rihaan sí cu'naj Festo yo' a:

—Ne snuj 'unj, man Festo sij uun chij. Tananj ya vaa nana natá 'unj, ne nana ve'é vaa no xcúún ní' cunó ní' me nij nana yo' a. ²⁶'O se sij nicaj suun rey me sí nihánj, ne so' me sí ne'en daj vaa nu' rasuun natá 'unj rihaan nij soj cuano á. Ne ne chu'ví' 'unj nata' 'unj nu' nana nihánj rihaan so' ma'. 'O se aj xcaj sí cu'naj Agripa nihánj cuentá che'é nu' rasuun nihánj, rá 'unj á. 'O se nuveé rasuun 'nij yuve me rasuun nihánj a man adonj —taj Pabló rihaan sí cu'naj Festo a.

²⁷Ne cataj so' rihaan sí cu'naj Agripa a:

—Ne cataj so' 'o nana rihanj, Agripa. Amán rá so' daj taj se-nana nij sí nata' se-nana Diose gaa naá na'. Aj ne'éen 'unj se vaa amán rá so' nanj adonj —taj Pabló rihaan sí cu'naj Agripa yo' a.

²⁸Gaa ne cataj Agripa rihaan so' a:

—Ca'mii so' doj rihanj, gaa ne cuaj guún 'unj sí noco' man Jesucristó,

rá so' na' —taj Agripa rihaan Pabló a.

²⁹Gaa ne cataj Pabló rihaan so' a: —Achíín ni'yáá 'unj rihaan Diose se vaa, ca'vee se doj nana ca'mij, ca'vee se nocoo ndo'o ca'mij, tzaj ne nuveé curuún so' cuchuman rá se-nanaj ma'. Tananj me rá 'unj cuchuman rá cunudanj soj sij uno nana a'mij cuano, ne ase vaa 'unj ro', danj gaa soj uún nanj adonj. Tzaj ne se cunumii soj ga aga' ne' nihánj, rá 'unj ma' —taj Pabló rihaan nij so' a.

³⁰Gaa ne canicun' caya sí nicaj suun rey do', sí nicaj suun gobernador do', chana cu'naj Berenice do', yo'ó nij sí yanj ga nij so' do', ³¹ne curihanj nij so', ne cataj nij so' rihaan tuvi' nij so' se vaa taj vaj cacun' qui'yaj Pabló, ne ne nó xcúún so' cavi' so' do', qui'nij so' taga' do' ma'.

³²Gaa ne cataj sí cu'naj Agripa rihaan sí cu'naj Festo a:

—Sese ne cachinj ni'yaj sí nihánj se vaa ca'ne' César cacun' che'é so', ne ca'vee curihanj so' taga' asuun saj á —taj sí cu'naj Agripa rihaan sí cu'naj Festo a.

Nana nihánj taj xna'anj se vaa ca'neé sí cu'naj Festo man Pabló ca'anj Pabló chuman' Romá a

27 Dan me se guun ya rá sí cu'naj Festo se vaa ca'anj núj ndaa yo'óo nocoo Italia rej ne sí nicaj suun emperador cu'naj César a. Gaa ne tacuachén so' man Pabló do', man yo'ó doj sí 'nij taga' do', rihaan 'o tanuu uun chij rihaan 'o cientó tanuu, ne Julio cu'naj tanuu yo', ne sí

nūu rihaan ma'an sīí nicaj suun emperador me so' a. ²Dan me se cavii núj ga tinú Aristarco sīí cavii chuman' Tesalónica chuman' naj estadó Macedonia rque 'o rihoo chéé rihaan na a. Ne xa' rihoo yo', tzaj ne rihoo cavii chuman' Adramitio me yo', ne ca'anj yo' ndaa nij chuman' naj tu'va na ya'anj estadó Asia a. ³Ne yo'ó güii me se cuchi' núj chuman' cu'naj Sidón, ne ve'é inanj qui'yaj sīí cu'naj Julio ga Pabló, ne ca'vej rá so' ca'anj Pabló rihaan nij tuvi' Pabló sīí yanj chuman' Sidón yo', che'é rej taj ya'anj nij so' man Pabló a.

⁴Gaa ne cavii uún núj rque rihoo, ne ca'anj uún rihoo, ne cachén núj rej sur rej nichrun' yo'óó taj rihaan na ya'anj cu'naj Chipre a. 'O se go' ndo'o nana rej rihaan rihoo yo' a. ⁵Gaa ne cachén uún núj rihaan na ya'anj, ne cachén núj tu'va estadó Cilicia do', estadó Panfilia do', ne cuchi' núj ndaa chuman' Mira chuman' naj estadó Lisia a. ⁶Ne chuman' yo' ro', nari' tanuu yo' 'o rihoo cavii chuman' Alejandría, ne rihoo ca'anj ndaa Italia me yo' a. Che'é dan cavii núj rque rihoo yo' qui'yaj tanuu yo' a.

⁷Dan me se nanaj ndo'o cachéé rihoo yo' rque que'ee güii, ne che'é dan sayuun ndo'o vaa cuchi' núj rihaan chuman' Gnido a. Ne ne ca'vee ca'anj núj a doj, qui'yaj nana ma'. Che'é dan cachén núj nichrun' yo'óó taj rihaan na ya'anj cu'naj Creta, ne nichrun' rej cu'naj Salmón rej naj yo'óó Creta cachén núj a. ⁸Ne sayuun uxrá vaa cachén núj rej yo', ne cuchi' núj ndaa 'o rej cu'naj Buenos Puertos, ne nichrun'

naj chuman' yo' ga chuman' cu'naj Lasea a.

⁹Dan me se aj cachén ndo'o güii, qui'yaj rihoo yo', ne aj cachén güii toco' nij yuvií israelitá x'naa man ma'an nij so' che'é se aráj guee nij so' rihaan Diose, ne nichrun' quisij dió avii nana yuvaa rihaan na ya'anj a. Che'é dan cuchu'vi' núj se vaa quiran' núj sij man rque rihoo yo' sayuun a. Che'é dan narqué Pabló chrej rihaan nij sīí man rque rihoo yo', ¹⁰ne cataj so' rihaan nij so' a:

—Ne'én 'unj se vaa xa' rihoo nihánj, tzaj ne sese yo' o ca'anj rihoo nihánj, ne quiran' ndo'o nij rasuun man rque rihoo nihánj do', ma'an rihoo nihánj do', sayuun, ne quirí' ndo'o nij yo', qui'yaj nana yuvaa, ne ndaa cavi' ma'an ní' adonj —taj Pabló rihaan nij so' a.

¹¹Tzaj ne tanuu uun chij rihaan 'o cientó tanuu yo' ro', ne cuchuman rá so' se-nana Pabló ma'. Tananj cuchumán rá so' se-nana sīí tuguáj rihoo do', sīí si'yaj rihoo do' a. ¹²Dan me se rej cu'naj Buenos Puertos yo' ro', nuveé rej sa' quinaj rihoo nu' dió avii nana yuvaa me rej yo' a. Che'é dan nocco doj ta'aj nij sīí man rque rihoo cataj se vaa guun rá nij so' curihanj rihoo rej yo', ne guun rá nij so' se vaa cuchi' rihoo chuman' Fenice ne guun raan rihoo chuman' yo' nu' dió avii nana yuvaa a. Ne chuman' Fenice ro', me chuman' naj yo'óó cu'naj Creta, ne caráán quij rihaan nana yuvaa rej chuman' Fenice, rá nij so' a.

Nana nihánj taj xna'anj che'é sayuun quiran' nij so' rihaan na ya'anj, qui'yaj nana yuvaa a

¹³Dan me se cavii 'o nana catun' rej rque tu'va na ya'anj, ne guun

rá nij so' se vaa guun nucuaj nij so' qui'yaj nij so' ndaa vaa guun rá nij so' a. Che'é dan guun che'e rihoo ca'anj rihoo, ne nichrun' yo'óo cu'naj Creta vaj nij so' qui'yaj nana a. ¹⁴Dan me se doj orá vaj rihoo, gaa ne taj ni'yón cavii 'o nana yuvaa rej xraj rihaan na ya'anj, ne go' uxrá nana yuvaa rihaan rihoo, ne nana cu'naj Euroclidón me yo' xna'anj griego a. ¹⁵Ne ne guun nucuaj rihoo ca'anj rihoo rej rihaan rihoo ne qui'yaj canaán rihoo rihaan nana yuvaa ma'. Che'é dan ca'ne' rá núj, ne canicaj rihoo ne vaj rma'an rihoo, qui'yaj nana yo' a. ¹⁶Ne cachén núj nichrun' yo'o yo'óo nii taj rihaan na ya'anj, ne yo'óo cu'naj Claudia me yo' a. Ne sayuun uxrá guun nucuaj núj naxcaj núj rihoo cunii noco' rej xcō rihoo xij ne naqui'yaj raan núj man rihoo cunii yo' rque rihoo xij yo' a. ¹⁷Ne gaa quisij naxcaj núj man rihoo cunii yo', ne numij nij so' ne' naqui'yaj raan nij so' man rihoo xij yo' a. Dan me se cuchu'vi' ndo'o nij so' se vaa canō rihoo rihaan yo'óo chruu naj rque na ya'anj rej cu'naj Sirte ne quirí' nu' rihoo yo' a. Che'é dan nacué nij so' mantá o' nana rihaan, che'é rej se ca'anj yoo rihoo ma'. Ne me rej ma'an go' nana ro', ca'anj rihoo uún adonj.

¹⁸Ne yo'óo güii me se che'é se go' uxrá nana rihaan núj, ne che'é dan quirí'fj nij so' nij rasuun man rque rihoo rque na ya'anj, ¹⁹ne güii va'núj me se ma'an nij so' ra'a nij so' ri'fj nij so' nij rasuun rásuun ma'an yuvií tuguáj rihoo rque na ya'anj, che'é rej cunu yoo rihoo ne nij so' a. ²⁰Ne güii do', yati' do', ne

curuvi' ni'yaj núj que'ee güii a ma'. Ne yo'o go' nana yuvaa rihaan núj, ne che'é dan guun ya rá núj se vaa daj chihaa mǐj se ca'vee quinanií núj rihaan sayuun yo' a ma'. ²¹Dan me se a 'óo nij síi man rque rihoo ne cha nij so', ne che'é dan canicun' Pabló sca'núj nij so', ne cataj so':

—Ve'é doj sese cuno nij soj se-nanaj, tinuj. 'O se sese ne cavii ní' yo'óo cu'naj Creta, ne ne quiran' ní' sayuun nihánj, ne ne ca'anj ni'ya cunudanj nij rasuun asuun saj ma'. ²²Ne nihánj me se cuno soj chrej nago' 'unj man soj, ne naqui'yaj niha' soj nimán soj á. 'O se a 'óo tuvi' nij soj se cavi' ma'. Maan orún' rihoo nihánj ca'anj ni'ya a. ²³'O se 'unj me síi noco' man Diose, ne 'yaj suun 'unj che'é so', ne nií cua'aa ro', canicun' yo'o se-mozó Diose rihanj, ²⁴ne cataj so': “Se cuchu'ví' so', man Pablo. 'O se nō xcúún so' canicún' so' rihaan síi cu'naj César, ne nihánj me se cataj xna'anj 'unj rihaan so' se vaa aj guun rá Diose se vaa caráán Diose rihaan sayuun che'é so' ga cunudanj nij síi nuu rque rihoo nihánj adonj”, taj se-mozó Diose rihanj a. ²⁵Che'é dan naqui'yaj niha' soj nimán soj, tinuj. 'O se 'unj me síi amán ya rá ni'yaj Diose se vaa qui'yaj Diose nu' ndaa vaa cataj xna'anj se-mozó Diose rihanj adonj. ²⁶Tzaj ne 'o se cataj se-mozó Diose rihanj se vaa ya quirí' rihoo nihánj tu'va 'o yo'óo taj rihaan na ya'anj adonj —taj Pabló rihaan yo'óo nij so' a.

²⁷Dan me se quisij xca'anj güii vaj núj rihaan na ya'anj cu'naj Adria, qui'yaj nana a. Ne rej yan'

ro', guun rá nij sí tuguáj rihoo se vaa daj doj cuchí' núj rihaan 'o yo'óo a. ²⁸Che'é dan xcaj ta'nga' nij so' me daj metró cunuu nuû na, ne xcaj nij so' cuentá se vaa ico xnu' yaan metró nuû na rej yo' a. Gaa ne na'vij nij so' 'o orá nii, ne xcaj ta'nga' uún nij so', ne xcaj nij so' cuentá se vaa ico chij guee metró cunuu nuû na a. ²⁹Che'é dan kuchu'vi' nij so' se vaa cano rihoo yo' rihaan yujej naj rque na ya'anj ne cachran' rihoo a. Che'é dan ca'anj nij so' rej xco rihoo, ne tananij nij so' ca'anj aga' ganchó rque na ya'anj, che'é rej nucu'lu' aga' yo' rque nij yujej naj rque na ya'anj, ne canicun' rihoo yo' a. Ne guun ndo'o rá nij so' se vaa cuaj cuaj quisj güii ne guun nucuaj nij so' quene'en nij so' me rej vaj nij so' a. ³⁰Gaa ne nij sí tuguáj rihoo ro', guun rá nij so' cunanj ma'an inanj nij so', ne quinani' nij so' rihaan sayuun quiran' tuvi' nij so' qui'yaj rihoo yo', rá nij so' a. Che'é dan tu'va rma'an nij so' cataj nij so' se vaa ca'anj nij so' tananij nij so' doj aga' ganchó rque na ya'anj rej tacúun rihoo, ne ca'anj tananij nij so' rihoo cunii yo' rihaan na ya'anj catuu nij so' a. ³¹Tzaj ne ca'mii Pabló rihaan tanuu uun chij rihaan 'o cientó tanuu do', rihaan yo'óo nij tanuu do', cataj so':

—Sese se quináj nij sí nihánj rque rihoo nihánj, ne se ca'vee quinani' ma'an soj rihaan sayuun a ma' —taj Pabló rihaan nij so' a.

³²Gaa ne ca'anj nij tanuu, ca'ne' nij tanuu ne' numi' rihoo cunii yo', ne quinij ma'an rihoo cunii yo' rihaan na ya'anj, ca'anj ni'ya ma'an yo' a.

³³Ne nichrun' rá ranga', ne nago' Pabló chrej man yo'óo nij so' se vaa cha' nij so' doj se chá a. Ne cataj so':

—Cuan' me síj 'o xnu' güii quinano' ndo'o rá nij soj, ne a doj ne cha' soj se chá ma'. ³⁴Che'é dan narque 'unj chrej man nij soj cuano se vaa cha' soj á. Gaa ne guun nucuaj soj quinani' soj rihaan sayuun nanj á. 'O se a 'o yuvé ra' a 'o'óo nij soj se ca'anj ni'ya a ma' —taj so' rihaan yo'óo nij so' a.

³⁵Síj ca'mii so' danj, gaa ne nicaj so' rachrúun, ne nago' so' graciá rihaan Dioso che'é rachrúun ni'yaj cunudanj nij so', gaa ne cuxra' ta'aj so' rachrúun, ne guun che'e so' chá so' a. ³⁶Gaa ne guun niha' rá cunudanj nij so', ne ndaa ma'an nij so' chá uún a. ³⁷Ne cunudanj núj sij vaj rque rihoo yo' ro', me vij cientó táa va'núj chihaa xnu' yaan ya yuvi' a. ³⁸Ne gaa quisj caraa rque nij so', ne quiril'ij nij so' nu' 'núú trigó rihaan na ya'anj, che'é rej gaa yoo doj rihoo a.

³⁹Dan me se quisj güii, ne quene'en núj yo'óo, tzaj ne ne cunuu yaan núj yo'óo yo' a ma'. Tzaj ne quene'en nij so' 'o rej atúj yaníj doj tzin' na ya'anj, ne naj yo'óo chruu tu'va na ya'anj rej yo' a. Ne guun rá nij so' ca'anj rihoo rej yo' sese ca'vee ca'anj rihoo a. ⁴⁰Che'é dan ca'ne' nij so' ne' nocó' nij aga' ganchó, ne quináj nij aga' ganchó rque na ya'anj, qui'yaj nij so' a. Ne nache nij so' ne' numi' chruun tuguáj rihoo, ne naxumaan mantá rej tacúun rihoo, qui'yaj nij so', ne guun rá nij so' go' nana' rihaan mantá ne ca'anj rihoo rej

naj yo'óo chruu yo', rá nij so' a.
⁴¹Tzaj ne ca'anj rihoo canó rihoo
 xráa 'o tacaan yo'óo chruu naj
 rque na, ne raan canó tacúun rihoo
 yo'óo chruu, ne ne ca'vee curihanj
 yo' a ma'. Ne nucuaj ndo'o go' na
 rej xco rihoo, ne daj doj quirí' rej
 xco rihoo, qui'yaj na yo' a. ⁴²Ne
 guun rá nij tanuu ticavi' nij so' man
 nij síf 'nij taga' tumé nij so', che'é
 rej se ca'vee go' nij so' xtáj rihaan
 na ne cunanj nij so' rihaan nij
 tanuu a. ⁴³Tzaj ne tanuu uun chij
 rihaan 'o cientó tanuu ro', ne ca'vej
 rá so' cavi' Pabló ma'. Che'é dan
 caráan so' chrej se qui'yaj yo'óo nij
 tanuu danj ma'. Ne ca'ne' so' suun
 se vaa nij síf ne'en go' xtáj rihaan
 na ro', güej asino nij so' rihaan na
 go' nij so' xtáj rihaan na ca'anj nij
 so' rihaan yo'óo a. ⁴⁴Ne yo'óo nij so'
 ro', cano nij so' rcuchra' do', chruun
 cavii rihoo yo' gaa cachran' rihoo
 do', ne ca'anj nij so' rihaan yo'óo
 yo', taj so' a. Ne danj qui'yaj nij so',
 ne cuchi' cunudanj nij so' rihaan
 yo'óo, ne quinanii cunudanj nij
 so' a.

**Nana nihánj taj xna'anj daj qui'yaj
 Pabló yo'óo cu'naj Malta a**

28 Dan me se gaa cuchi' sa'
 núj yo'óo taj rihaan na
 ya'anj yo', ne xcaj núj cuentá se vaa
 yo'óo cu'naj Malta me yo' a. ²Ne nij
 síf chihanj yo'óo yo' ro', ve'é uxrá
 qui'yaj nij so' ga núj a. 'O se nicaj
 tuvi' ndo'o nij so' ga núj, ne che'é se
 caman' maan ne acoj tiha', ne che'é
 dan naran' nij so' ya'an cunu guun
 núj a. ³Gaa ne naran' Pabló 'o nánj
 rca', ne cuta' so' rihaan ya'an a.
 Ne che'é se ya'aan ndo'o ya'an, ne

che'é dan curihanj 'o xcuáa yuvaa
 rque rca' yo', ne canó xo' ra'a
 Pabló a. ⁴Ne gaa quene'en nij síf
 man rej yo' se vaa noco' xcuáa ra'a
 Pabló, ne cataj nij so' rihaan tuvi'
 nij so' a:

—Ya ya sij ticavi' yuvii me
 síf nihánj nanj á. 'O se nda' se
 quinanii so' rihaan na ya'anj, tzaj ne
 che'é se tumé so' cacun', ne che'é
 dan ne no xcúun so' gaa i'na' so' ma'
 —taj nij so' rihaan tuvi' nij so' a.

⁵Tzaj ne nacunan' Pabló ra'a so',
 ne quinij xcuáa rihaan ya'an, ne ne
 qui'yaj chi'ii xcuáa a doj man Pabló
 a ma'. ⁶Tzaj ne nij síf man yo'óo
 yo' ro', guun rá nij so' se vaa caraa
 cu'maan ra'a so', ase taj ni'yón
 cavi' so' ne naxru' so' rihaan yo'óo,
 tzaj ne gaa guun raan na'vij nij so'
 quiran' so' danj, ne gaa quene'en
 nij so' se vaa ne quiran' so' a doj se
 chi'ii, ne noná nij so' se-nana nij so',
 ne cataj nij so' se vaa 'o ya'anj me
 Pabló a.

⁷Dan me se nichrun' rej yo' me
 se naj to'óo síf uun chij doj rihaan
 yo'óo taj rihaan na ya'anj yo', ne
 Publio cu'naj so' a. Ne nicaj tuvi'
 so' ga núj, ne va'núj güii ve'é taj
 ya'anj so' man núj a. ⁸Dan me se
 nacaan ndo'o rej Publio yo', ne naj
 so' rihaan yuvéé, ne ran' ndo'o
 so' chi'ii ton a. Gaa ne catúj Pabló
 rej naj so', ne cachín ni'yaj Pabló
 rihaan Diose che'é so', gaa ne cuta'
 Pabló ra'a Pabló xráa so', ne dan me
 se nahuun sa' so', qui'yaj Pabló a.
⁹Gaa quisj qui'yaj Pabló danj, ne
 yo'óo nij síf anó chi'ii yanj yo'óo
 yo' ro', ca'na' nij so' uún rihaan
 Pabló, ne nahuun sa' nij so', qui'yaj
 Pabló a. ¹⁰Gaa ne caráj cochroj

uxrá nij so' rihaan núj, ne gaa curihañj núj yo'óo yo', ne rque nij so' rihaan núj cunudañj nij rasuun cachiin man núj a.

**Nana nihánj taj xna'anj se vaa
cuchi' Pabló chuman' Romá a**

¹¹Dan me se cachén va'núj yavii, gaa ne cavii núj rque yo'ó rihoo chéé rihaan na ca'anj núj a. Ne xa' rihoo yo', tzaj ne rihoo quináj sa' tu'va yo'óo taj rihaan na ya'anj yo' nù' nij yavii avii nana yuvaá me yo', ne rihoo cavii chuman' Alejandría me yo', ne no se-tinanga' roj ya'anj cuaté cu'naj Cástor ga Pólux rihaan rihoo yo' a. ¹²Dan me se cuchi' núj chuman' cu'naj Siracusa, ne va'núj güii caran' núj chuman' yo' a. ¹³Gaa ne cavii uún rihoo chuman' Siracusa, ne cachén rihoo nichrun' tu'va na ya'anj, ne cuchi' rihoo ndaa chuman' Regio a. Gaa ne cachén 'o güii, gaa ne cavii 'o nana rej rque rihaan na ya'anj, ne ca'anj rihoo, ne rque vij güii cuchi' núj ndaa chuman' cu'naj Puteoli a. ¹⁴Ne chuman' Puteoli ro', nari' núj doj tinúú ní', ne cachín ni'yaj nij so' rihaan núj se vaa caran' núj chij güii ga nij so' a. Ne gaa quisj chij nij güii, ne nayón núj chrej, ne ca'anj núj chrej vaj ndaa chuman' Romá a. ¹⁵Ne cuchi' nana che'é núj rihaan nij tinúú ní' sí yanj chuman' Romá, ne ca'na' nij so' nari' tuvi' nij so' ga núj chuman' cu'naj Foro de Apio do', chuman' cu'naj Tres Tabernas do' a. Ne gaa quene'en Pabló man nij so', ne nago' so' graciá rihaan Diose, ne nari' nucaj nimán so' a.

¹⁶Ne gaa quisj catúj núj chuman' Romá, ne tacuachén tanuu uun chij

rihaan 'o cientó tanuu man nij sí 'nij taga' rihaan yo'ó tanuu uun chij doj, ne ca'vej rá nij sí nicaj suun caran' Pabló rá 'o ve' ne cayáán orún' so' ga tanuu tumé man so' a.

**Nana nihánj taj xna'anj daj ca'mii
Pabló ga nij sí uun chij rihaan nij
yuvii israelitá yanj chuman' Romá a**

¹⁷Dan me se cachén va'núj güii, gaa ne canacúun Pabló man nij sí uun chij rihaan nij yuvii israelitá yanj chuman' Romá se vaa cunuú chre' nij so' ga so' a. Ne gaa quisj cunuú chre' nij so', ne cataj so' rihaan nij so' a:

—Xa' 'unj nihánj, tzaj ne taj vaj cacun' qui'yáá 'unj rihaan tuvi' ní' sij israelitá do', rihaan se-tucañj xii ní' do' man tinuj. Tzaj ne tuvi' ní' sí yanj chuman' Jerusalén ro', numij nij so' manj ne tacuachén nij so' manj rihaan nij sí romanó adonj. ¹⁸Ne nij sí romanó ro', taj se vaa taj che'é cavi' 'unj rá nij so' gaa naqui'yaj cuu nij so' che'ej ma'. Ne guun rá nij so' quirii nij so' taga' manj a. ¹⁹Tzaj ne cuta' ndo'o nij sí israelitá yo' cacun' xráj, ne che'é dan nó xcúnj cachinj ni'yáj rihaan sí cu'naj César se vaa ca'ne' so' cacun' che'ej a. Tzaj ne taj a 'o cacun' cuta' 'unj xráá soj sij man chiháán 'unj ma'. ²⁰Che'é dan canacúun 'unj man nij soj ca'na' soj, che'é se guun rá 'unj quene'én 'unj man soj do', ca'mii 'unj ga soj do' a. 'O se che'é sí ca'vee qui'yaj cavii sa' ní' sij israelitá me se numíí 'unj 'yaj aga' ne' nihánj adonj —taj Pabló rihaan yo'óo nij sí israelitá yo' a.

²¹Gaa ne cataj nij so' rihaan Pabló a:

—Xa' nij tuvi' ní' síf yanj estadó Judea, tzaj ne taj yanj cartá ca'néé nij so' rihaan núj nayaa núj ma'. Ne a 'ó tinúú ní' ne ca'na' rihaan núj nata' nana chi'ii che'é so' rihaan núj ma'. ²²Ne vaa che'é cataj ma'an so' rihaan núj daj uun rá so', rá núj a. 'O se tucuáán ino noco' nij tuvi' nij soj me se ne'en núj se vaa me rej ma'an a'mii chi'ii yuvií che'é tucuáán yo' nanj á —taj nij so' rihaan Pabló a.

²³Dan me se cachrón nij so' güii ca'na' uún nij so' ve' yanj Pabló, ne güii yo' me se ca'na' que'ee tuvi' nij so' a. Gaa ne nata' Pabló rihaan nij so' che'é suun uun chij Diose nimán yuvií do', rihaan chumij nihánj vaa güii do' a. Ne nayaa so' se-tucuanj síf cu'naj Moisés do', nana cachrón nij síf nata' se-nana Diose rihaan yanj gaa naá do', ne cataj xna'anj so' me che'é no xcúún nij so' cuchuman rá nij so' cunó nij so' se-nana Jesucristó a. Dan me se asij na'yaan guun che'e so' ca'mii so' rihaan nij so', ne ndaa ca'anj güii navij ca'mii so' a. ²⁴Ne ta'aj nij so' ro', cuchumán rá se-nana so', ne yo'ó ta'aj nij so' ne cuchuman rá nana yo' ma'. ²⁵Ne ne guun cuyaan rá cunudanj nij so' a ma'. Ne guun che'e nij so' ca'anj nij so' a. Tzaj ne gaa ataa ca'anj nij so', ne ca'mii Pabló orún' nana rihaan nij so', cataj so':

—Cunaj uxrá vaa nana nihánj nana rqué Nimán Diose rihaan xij ní' gaa ca'mii síf cu'naj Isaías síf nata' se-nana Diose gaa naá rihaan nij so' a. ²⁶Nana ca'mii Isaías rihaan nij so' me nana ca'mii ma'an Diose rihaan so' a: “Cuchij'

so' rihaan nij so' ne cataj xna'anj so' rihaan nij so' se vaa catuu uxrá nana xréé nij so', tzaj ne se xcaj nij so' cuentá ma'. Ne ni'yaj uxrá nij so', tzaj ne se quene'en nij so' ma'. ²⁷'O se caráán ma'an nij yuvií nihánj rihaan nij so' che'é rej na'vej rá nij so' quene'en ma'an nij so', ne caráán nij so' xréé nij so', che'é rej na'vej rá nij so' cunó nij so' uún a. Ne ne atúj nana nimán nij so', 'yaj nij so', che'é yan na'vej rá nij so' xcaj nij so' cuentá ne canicaj nimán nij so' ma'. 'O se na'vej rá nij so' nahuun sa' nimán nij so' qui'yaá 'unj a man adonj”, me se-nana Diose ca'mii síf cu'naj Isaías gaa naá a. ²⁸Che'é dan xcaj soj cuentá se vaa aj ca'anj nana nihánj rihaan nij síf yanj, ne nij so' me síf cuchuman rá se vaa tinanii Diose man nij so' rihaan chrej chi'ii uun chij nimán nij so' a. 'O se nij so' me síf cunó ya nana nihánj nanj á —taj Pabló rihaan nij síf uun chij rihaan nij yuvií israelitá yanj chuman' Romá yo' a.

²⁹Sij ca'mii so' danj, gaa ne cavii nij yuvií israelitá yo' ca'anj nij so', ne ca'mii canó tuvi' ma'an nij so' ga tuvi' nij so' a.

³⁰Dan me se vij ya yo' cayáán Pabló chuman' Romá yo', ne ma'an so' go' tu'vee ve' ne so' a. Ne ve'é ca'mii so' ga cunudanj nij síf ca'na' ni'yaj man so' a. ³¹Ne ca'mii natáj so' che'é suun uun chij Diose nimán yuvií do', rihaan chumij nihánj vaa güii do', ne tucu'yón so' se-nana Jesucristó sij 'nij ra'a man ní', ne a doj ne cuchu'vi' so', ne ne caráán nii chrej rihaan so' qui'yaj so' danj a ma'.